



UPU FOU
a le
ALII

Tusi Paia mo se suiga

Ianuari - Iuni
2020

Upu Tomua

E fa'atalofa atu i le paia ma le mamalu o le Ekalesia, o le vi'iga ma le loto fa'afetai i le Alii, ina ua tatou aulia mai ma le manuia o lenei tausaga fou i lona alofa ma le agalelei. O le sāvaliga na asa mai ma le olioli, ona o le Atua ua fa'amanuia i lo tatou atunu'u fa'apea ma ona tagata. E ui foi i mafutaga ua motusia ona o 'auala na lei mafaufauina, fa'apea foi ni isi e pele i le agaga ua fai i lagi le folauga ona o le malaga a le maliu ma le oti, ae o le vi'iga ma le fa'afetai i le Matai o i le Lagi ona ua ia aumaia le malosi fou e fa'auau ai galuega e pei ona vala'auina i ai i tatou, e tusa ma lona finagalo. Talofa, Talofa lava.

O le Upu a le Alii e fou pea i lea aso ma lea aso. O le Agaga o le Alii na te fa'amanatu ma musuia lou tagata ma fa'aosofia le olioli o le loto, ona o le Atua e ala ia Iesu Keriso, ua ia aumaia o suiga fou i lou soifua ma lo tatou ola, e ala i ana a'oa'oga ma fa'atinoga.

O tatou o 'tagata o le Upu.' O le Upu a le Alii e iloa ai o ala tonu e manuia ai, ma ala e fa'aseseina ai. O le Upu ua saili atu ai le tagata i le Atua ma le loto atoa, atoa ai ma le tagata ua lē mānatua le Alii – ua pa'ū atu i ala o le puapuaga. O le mea lea pe ā e alafa'i mai i le taeo ma le afiafi e lagona le Upu o le Ola ma le fa'amanatu mai, o ala o le manuia ma ala ua fa'aseseina ai, a o tatou faimalaga fa'atasi ma lo tatou Alii na te fa'amalosi mai.

Ua iloa e le tele o atunu'u o le lalolagi o le vaitau o suiga ua tatou i ai nei. O "tectonic plates" e pei ona mamau ai o atunu'u i le Kelope, ua fēsoloa'i ma fēse'e-ta'i, ma agai ina a mavaevae ma fa'aumatia ai le foafoaga. E fa'apea foi o mālō ma ona ta'ita'i, ua foliga o le a fevaevae'i o lagona ma manatu o tagata i tiute ma fa'atinoga. O le mea lea e lē nofo lelei ai le tagata lotu, ma va'ava'ai atu i le Alii ma lona fetalai mai i lana Afioga Paia, e ala i lana savaliga i lona tuana'i ma le aga'i atu i le lumana'i. O le tagata lotu lava ia e tatau ona fa'alogi i le Atua ma lona fetalai mai, a o feagai ma lenei vaitau.

O le manatu autu o le vaitau o le Leni i lenei tausaga, ua fa'aulutalaina: **'O tiute tauave tatou te fa'asoa fa'atasi ai: O le Tusi Paia i le taga'i mai o le lalolagi** (*The responsibilities we share – The Bible on the world stage*). Ua vala'auina le tagata i ona tiute tauave, i le fa'atuatua ma le ofoina atu o le loto, poo fea lava o loo soifua ai i soo se atunu'u ma soo se gagana, ina ia fefa'asoa a'i o taleni, mo le manuia mo tagata uma. O le manatu ina ia fusia fa'atasi, ma fa'asoa atu o agava'a ma le loto fuatiaifo e lelei, e mafuta ai ma tagata uma. E fa'apea fo'i le vala'au i le 'Tusi Paia' i lona feagai ai ma le lalolagi.

I lenei vaitau ma le filifilia o ta'ita'i o atunu'u, e le gata ia Amerika ae fa'apea atunu'u uma, ina ia toe va'ai ma filifili i ta'ita'i talafeagai, e pei ona iloa o latou tiute e manuia ai le atunu'u ma ona tagata, e pei o nisi ua fa'ailoa mai i a latou tusitusiga fa'ale-fa'atuatua, e pei o Desmond Tutu, Matini Luteru King Jr. fa'apea Mother Teresa. O tala fiafia e pei ona faia e Iesu, o le soifua auuuna lea mo le manuia o ona tagata. O tala ua tatou maua i le Tusi Paia, ua fa'apea foi ona fa'atino e nisi o auuuna ua fa'amatalaina le olaga auuuna e pei ona faia e Iesu.

O le ā tele nisi va'aiga silisili o le ā fa'aioa atu e le Tusi Faitau Aso i lenei afa o le tausaga 2020, i nisi o va'aiga tāua, fa'apea fo'i faitauga mai le Evagelia a Mataio, le Pese a Solomona, Roma 9-16, Ieremia, 1 & 2 Tesalonia, fa'apea le 1 & 2 Peteru. O lenei ua fa'aliliu atu le Tusi Faitau Aso e le tatou ofisa o le Lamepa; le susuga ia Emau Petaia FS (Ianuari/Iuni), le faletua o Usugafono Satele (Fepuari), susuga ia Iese Fa'avaoga AK (Mati), le susuga ia Eteuati Semaia AK (Aperila), ma le Fa'atonu (Me).

O mafaufauga o loo avea ma taiala i faigalotu a lo tatou Atunu'u i aso taitasi o le tausaga, o loo i ai lava o mālama e te mafaufau i ai, e tusa ma le fetalai mai a le Atua, i polokalama fa'ataoto a le tatou Atunu'u i lea aso ma lea aso. O le tatalo, ia fa'atele ma fa'atumu atu e le Alii lona Agaga, aemaise le togiola ua faia e le Atua ia Keriso Iesu, a o feagai ai ma lau tapua'iga.

Ia manuia tele lau tapua'iga.

L.Nu'usila Samuelu, FS
Fa'atonu, *Lamepa*

Manuia le Tausaga Fou 2020!

Aso Lulu – Ianuari 1: “Alu i le maila fa’aopoopo” (*Going the extra mile*)

Tusi Faitau – Luka 10:25-37

Matua – ff.25-26: “*Fa’auta foi, ua tula’i le tasi a’oa’o tulafono, ma tofo-tofo ia te ia, ua fa’apea mai, ‘Le a’oa’o e, se a se mea ou te faia ina ia ou maua ai le ola e fa’avavau?’ Ua fetalai atu o ia ia te ia, ‘O le a lau faitau?’”*

E fesiligia poo le a se lagona o so’o o Iesu e tusa ma le fesili a le alii a’oa’o tulafono ma le tali tu’u sa’o a Iesu ia te ia. E masani ona tatou tali atu i ni fesili fa’apea i se isi foi fesili, ina ia malamalama atili ai le pogai ua fesili ai. A le o le na, o le fa’amatala o se tala e tau fa’alautele ai le iloa o le pogai o le fesili. Ae foliga mai, e mafai lava ona tofu le tagata ia ma lana ia fa’auigginsa pe a faitau.

O lea ua tatou amataina lenei tausaga fou, fa’atasi ma lo tatou tu’u fesili ma fa’alagolago i se tali mai le Tusi Paia, e tusa ma o tatou mana’oga ta’ito’atasi: “*O le a sau faitau i ai?*” Ua tofu le tagata ma lana filifiliga i le faitau mai le Tusi Paia e fiafia ma mana’o i ai mo se a’oa’oga i lona ola talitonu ma le fa’atuatua i le Atua. Ae pei o le autu o lenei aso, e tatau ona *Alu i le maila fa’aopoopo*. O lona uiga, ‘aia ne’i fa’agata lau faitau i se lagona latalata mai. Ae ia faitau pea ma a’oa’o atili i Afioga tusia a le Atua, ma fa’amoemoe i le musumusuga a le Agaga Paia, e maua ai le fa’amalieina atili o le loto, le mafaufau, aemaise i la le agaga.

Tatalo: Le Alii e, foa’i mai le loto tele e faitau ai i au Afioga tusia, e ala i se va’aiga fou, e manino ai le va’ai ma le fa’alogo i mea matou te manuia ai, **Amene.**

Amata Fuihui Lotu 2020

Aso Tofi – Ianuari 2: “O le ala e ola ai” (*The path of life*)

Tusi Faitau – Salamo 23

Matua – f.4: “*E ui lava ina ou savali i le vanu o le ata o le oti, ou te le fefe lava i se mea leaga; auā o ‘oe ta te fa’atasi ma a’u, o lau la’au ma lou to’oto’o e fa’amafanafanaina ai a’u.”*

Sa i ai se tasi tagata tausimanu, e fiafia e tata’i lana lafu manu i le mea e i ai le mutia lelei e fafaga ai, auā o lea nofoaga, e i ai taimi e mātūtū ai le suavai i aso o le tau vevela ma mafanafana. Ua iloa ma malamalama lelei le tausimanu i uiga o lana lafu--e tofu lava le manu ma ona uiga. Ae foliga foi, ua iloa lelei e le lafu lo latou ta’ita’i, e naunau ma alofa ia i latou.

E leai ni manu fe’ai, ae tele magāala e felavasa’i e ono sesē i ai manu. E toto’a ma va’ava’ai lelei le tagata tausimanu i le gasologa o le solo a manu pe a si’itia mai le isi nofoaga i le tasi nofoaga. Ua masani lelei ai le tausimanu, e o’o lava foi i nisi o manu, ua iloa lelei lava le ‘auala e ui ai, ma le ‘auala e sesē ai.

E foliga fa’apea foi le ata o le soifuaga fa’ale-tagata, e savali i le ‘auala o le olaga nei. E tele magāala e felavasa’i solo, o ‘auala sasa’o ma ‘auala po’ipi’o ma sesē. O le Ta’ita’i sili mo o tatou agaga e iloa ai le ala sa’o, o lo tatou Alii o Iesu. E faigata le ‘auala na ia uia tatou te tau atu ai le manuia o le ola fa’avavau. Tatou te le sesē ai lava i le Ala Tonu na saunia e Keriso e ala i le togiola na ia saunia.

Tatalo: Le Atua e, fa’aailoa atili mai lou alofa, o le ala tonu ma le sa’o matou te talitonu ai ma fa’atuatua i ai, **Amene.**

Aso Faraile – Ianuari 3: “Taimi o fiafiaga” (Party time)

Tusi Faitau – Luka 15:11-32

Matua – ff.31b-32: *“Ta e, ta te nonofo pea ma ‘oe, o a’u mea uma foi, o au ia. Ua tatau foi ona tatou fiafia ma olioli, auā o lou uso lenā na oti, a ‘ua ola mai; na le iloa foi, ‘a ua maua.”*

O Iesu ma le fe’au o loo ia taumafai e fa’ailoa atu---o le taumafaiga ia teuteu ma fa’atulaga lelei le lagona fou o le loto ua salamō---ua fa’ato’ese le atalii, ma le tamā ua talia ma fa’ailoa atu ai le agaga o le alofa ua atoatoa e talia le loto ua salamō ma le toe fo’i e fa’amaulalo ma fa’ato’ese.

Na fa’ai’u e Iesu lana a’oa’oga e fa’atatau i le atalii matua o loo tu i fafo o le fale, o loo mafatia lona loto i le tiga ona o uiga ma fa’atinoga ua faia e le tamā e fa’alelei e ala i uiga alofa e tu’u fa’afeagai ma le manatu fa’amaualuga. O ia fa’atinoga uma o le tala, o loo ‘aumaia ai le ata o le, “fa’aleleiga ona o le maseiga”, i le va o le tagata ma lona Alii lona Atua. E ui lava ina to’ilalo pea le tagata i le leaga o le agasala, a e talia lava, e ala i le “alofa tunoa”, i le togiola na saunia e Iesu Keriso i luga o le satauro tigā ma le mamafatū.

Tatalo: Fesoasoani mai Agaga Paia, ia matou maua le agaga o le loto fa’amagalo i e ita mai, ma le loto fiafia e talia i e ua fai i matou ma o latou fili, *Amene.*

Faai’u Fuifui Lotu 2020

Aso Toonai – Ianuari 4: “O le ‘ele’ele o loo taoto ai le tali”

Tusi Faitau – Mareko 4:1-20 (The answer lies in the soil)

Matua – f.20: *“A o i latou na luluina i le eleele lelei, o i latou ia e ua fa’alogo i le upu, ma latou talia, ma fua mai e ta’itolugafu i nisi, e ta’iono sefulu i nisi, e ta’iselau foi i nisi.”*

O le mitamitaga i le tamā e maua lea i le fa’ato’aga. A o le tinā, e fiafia e galue ma vaavaai i tulaga o mea e fa’atino i totonu o le fale. O le lelei ma le matagofie o le tau, timu ma le la, o le lelei foi lea o le ola ma le tutupu a’e o laau totō. E fiafia le tamā pe a to’aaga tamaiti e tae le ma’a e fefiloi ma le palapala; ua na iloa lelei lava foi le ogā palapala lelei e totō ai la’au ina ia fua lelei mai.

E foliga fa’apea foi le fa’atusatusa i le agaga o le tagata, ina ua tupu le loto talitonu i le Atua, o Ia na te fa’atupu lo tatou fa’alagolago i le tamāoaiga auala eseese mai ia te Ia. O lo tatou fa’amalolosi e auau ‘ese le ma’a, o mea e fa’asalavei i lo tatou taumafai fa’ale-fa’atuatua, o iina tatou te maua ai le eleele lelei, o le fa’atusa i o tatou loto, ina ia tupu a’e ai fua lelei ma le matagofie fa’ale-agaga---ua tatou talia le fa’aolataga na saunia e Keriso, ina ia tatou sao ai i le ola e fa’avavau---i le mafutaga fa’atasi ma le Tupu o tupu, le Alii o alii, i le Nofoaalii e fa’avavau.

Tatalo: Le Alii e, matou te fa’afetai ona o lou alofa tunoa ua matou maua ai fua lelei ma le tamāoaiga sili. Fesoasoani mai ia matou tumau ai. **Amene.**

Epifania: Malamalama mo Atunu’u uma

1 – O Fetu ma Mea e Faanoanoa ai

Aso Sa Epifania

Aso Sa – Ianuari 5: “O mea sili ona lelei e afua mai i mea iti”

Tusi Faitau – Mika 5:2-4 (*The best things come in small parcels*)

Matua – f.2a: *"A o 'oe, Peteleema Efarata, e itiiti 'oe i afe o Iuta, a e tupu mai ia te 'oe mo a'u o lē na te fai ma faipule ia Isaraelu o lona tupu mai talu mai anamua lea, talu mai ona po o le vavau lava."*

O le Epifania, o le sauniuniga lea mo le o'o mai o le tausaga fou, ina ua mae'a ona fa'aali mai le Atua liutino tagata e ala ia Iesu Keriso. O le savalia o le masina o Ianuari, e peiseai o le taimi lea tatou te manatunatu loloto ai i le uiga moni o le upu 'Kerisiano' ma lo tatou fa'ataunuuina. O le uiga o le upu, "o le 'auai ma fa'atasi mai," e pei ona faia e le Atua ina ua liutino tagata. O le fa'aali mai o le Atua, o le fa'amalosi loto lea i le tagata ia saili le malamalama poo fea lava o i ai.

E tele ina maua le malamalama i mea iti, i pitovao e le o ta'ua ma e fa'atauavaa i le tagata. O le tala ia Nasareta, o le nu'u fa'atauavaa ma itiiti e lotolotoi i totonu o le itumalo; ae o iina o loo atagia ai le pupula malamalama o le Atua, ua sulua ai le lalolagi o tagata o loo ola i le pogisa o le agasala. Ma, o le malamalama lea na te ta'ita'ia i tatou i le manuia e fa'avavau, fa'avavau lava.

Tatalo: Le Alii e, fesoasoani mai i o matou ala. O lou lava malamalama matou te sao ai i faigata ma puapuga o le olaga nei, **Amene.**

Epifania

Aso Gafua – Ianuari 6: “Mulimuli i lou fetu” (*Follow your star*)

Tusi Faitau – Mataio 2:1-12

Matua – f.9: *"Ua tatou fa'alogu atu i le tupu, ona latou o ai lea, fa'auta foi, o le fetu na iloa e i latou i sasa'e, ua muamua atu ia te i latou, ua o'o ina tu mai i luga o le mea o i ai le tamaitiiti."*

I isi atunu'u o le lalolagi, aemaise i tua i faoa 'aai, e i ai taimi o le afiafi e iloa ai le malosi o le pupula malamalama o le masina ma fetu o le lagi. Ae mo isi atunu'u, aemaise o atunu'u e tele mōlī ma mea e fa'amalamalama ai le pogisa, e le mafai ona iloa le pupula o le masina ma fetu i le po. O le tu'u fa'afeagai o tulaga ia e lua, e fai lea ma fa'atupu manatu i le fia va'ava'ai ma tepa a'e i le pupula fa'ale-agaga mai o le Atua i o tatou loto o loo ufitia pea i le agasala o le lalolagi. E atagia ai le lagona o le fai Salamo (8:4), *"Se a 'ea le tagata e te manatu mai ai ia te ia? Ma le atalii o le tagata e te asiasi mai ai ia te ia?"*

E ofo o tatou loto i se Atua ina alofa i le tagata, o le "fa'auluuluga o ana galuega uma." E i ai le Agaga o le Alii i mea iti ma tulaga e fa'atauavaa i o tatou manatu. Ia avea le o'o mai o le Epifania ma taimi tatou te toe manatunatu ai i le 'auai mai o le Agaga Paia, o ia lava na te fa'asino ma ta'ita'i i tatou i le malamalama o le Fa'aolataga, lea na saunia e Iesu Keriso, tatou te ola ai e fa'avavau.

Tatalo: Le Tama Paia e, ia e ta'ita'i i matou ia matou iloa le ala i le fetu pupula o lou Alofa Tunoa. Ia matou fiasia e savavali ai i lona pupula, **Amene.**

Aso Lua – Ianuari 7: “Aua le fetu'ua le pouliuli”

Tusi Faitau – Isaia 42:1-9 (*Don't curse the dark*)

Matua – f.3: *"O le ũ gapēpē na te lē gausia; o le vavae ua mū itiiti na te lē tineia; o lē fa'amaoni na te avatu ai le fa'amasinoga."*

E i ai taimi tatou te lagona ai lo tatou lē atoatoa, e ui lava ua tatou taumafai e ola fa'amaoni ma usiusita'i i le loto talitonu ma fa'atuatua. Ona foliga mai ai lea, o mea lelei sa o tatou mafaufauina, ua leai se aogā. Atonu o tatou manatu ma talitonuga sa faia i le amataga o le tausaga, e le lelei ma le talafeagai.

Ua apoapoa'i mai Isaia i upu fa'amafanafana. Ua fa'amanatu mai, ia 'aua lava ne'i galo, o sina 'aloi afi mu itiiti lava, na te fa'aalia mai le malamalama. O se ta'inafi mu itiiti, o loo i ai le avanoa e o'o ina mumū saesae; o sina fa'atinoga fa'atauavaa o le alofa, o se fa'aailoga taūa lea e toe fa'aolaolaina ai lo tatou vaivai.

Pe afai ua tauau ina vaivai lo tatou ola talitonu ma fa'atuatua, 'aua ne'i galo le Alii o loo puipui mai ma tausia i tatou ia fa'asaoina. O nisi taimi, e avea le aloi afi mumū e fai ma fa'asino ala. I le taimi nei, ia taumafai e fai se galuega lelei, e sili lea nai lo le nofonofo e leai se mea e fai.

Tatalo: Le Alii e, ia e fa'aopoopo mai i lo'u ola fa'atuatua ma talitonu i lau Afio. Aua ne'i 'ave'esea ia te a'u le loto talitonu o loo e fa'atasi mai. **Amene.**

Aso Lulu – Ianuari 8: “Pei o manu e tosina i le afi mumū”

Tusi Faitau – Isaia 49:1-7 (*Like moths to a flame*)

Matua – f.6b: *"...Ua ou avatua foi 'oe e fai ma malamalama o nu'u 'ese, e fai ma'u fa'aolataga e o'o i tulu'iga o le lalolagi."*

E faigofie ona manatu māmā i nai mea iti o loo i totonu o le fa'atoaga: o pi ma mogamoga, o sē foi ma lelefua. O le fa'atusa lea o le manatu fa'atauavaa i le soifua tautua ma le ola galulue ma le filifiliga o loo faia e le to'atele i totonu o le fa'atoaga a le Alii – o le lalolagi na saunia e soifua ma ola ai.

Fa'amata e le o le uiga 'ea lea o le manatu fa'apito, a e punitia ai le amana'ia o ia meaalofa ma taleni mai le Alii o loo fa'atamāoaigaina ai le to'atele? O loo tatou tiute tau'ave, e fa'apei o so'o o le Tala Lelei: ia fa'atosina le lalolagi uma i le Alii, ma ia ola felagolagoma'i fa'atasi, o le tasi i le isi.

E i ai pea nisi o loo taulāmua i le fa'atinoga o galuega e le lelei i taimi uma. Peita'i, o le to'atele o loo punonou pea ma taumafai e fa'atino mea lelei i o latou taimi ma le malosia ua latou maua--ua fa'atusaina lea i se afi mu itiiti i totonu o le vao tu'ufua, o loo lotolotoi ai le fa'aolataga mai le Alii.

Tatalo: Le Atua Tolu-Tasi Paia, fa'afetai ona o meaalofa ma taleni ua matou maua. Ia matou maua le loto maualo ma le agamalu, a e le o le fa'asausili, **Amene.**

Aso Tofi – Ianuari 9: “Moe pei o se pepe” (*Sleeping like a baby*)

Tusi Faitau – Isaia 52:7-10

Matua – f.8: *"O le leo o ou tagata vaai, ua latou leo tetele, ua latou alalaga fa'atasi; pe a fa'afoisia Siona e le Alii."*

Ua tatou i ai i se lalolagi ua tele fesuia'iga o le soifuaga e ola ai le tagata, ua tele masini ma fa'atinoga eseese ua saunia e le tagata. Peita'i, ua avea le tele o ia fesuia'iga ma auala e aafia ai le mafaufau i le loto popole ma le atuatuva'e i nisi o taimi. E tatau ona maua se malologa lelei i le tino ma le mafaufau, ina ia fa'a-

fouina ai le malosi i aso ta'itasi. E i ai aso ma taimi e faigata ai i le mafaufau ona fa'avasega, ma o'o ina le maua se moe filemu ina ua fa'apopoleina le mafaufau.

A o'o ina faigata ona maua se moe, mafaufau i le tele o fa'amanuiaga ua e maua; e sili lea nai lo le moe! E le o tu'ulafoa'iina oe e le Alii. Ua i ai lou moega e te moe ai; ua e ta'oto i le mafanafana o lou aluga; e puipui lou fale; e i ai lou aiga o loo manatua oe i le tele o taimi ma aso.

Ua tatau ona e fa'afetai i le tele o ia mea lelei, aemaise i latou o loo tauaalaala i ao ma po i le fa'atinoina o galuega alofa i ē o loo mana'omia le fesoasoani a o e moe ma malolo---i latou o loo galulue i maota gasegase ma le fale puipui, i latou o loo va'aia le saogalemu o tagata uma i luga o 'auala, i le 'ea ma le sami. O le avea o i tatou e fai ma Kerisiano, ua tatou talitonu o loo silasila alofa mai lo tatou Atua.

Tatalo: Le Tamā alofa e, pe a fai e lutia a'u i faigata ma puapuaga o le olaga, ia ou mautinoa o loo e fa'atasi pea ma a'u, **Amene.**

Aso Faraile – Ianuari 10: “O le pogisa la'u pa'aga” (*Darkness my companion*)
Tusi Faitau – Isaia 60:1-9

Matua – f.2: *“Auā...e ufitia le lalolagi i le pouliuli, e ufitia foi nu'u i le pogisa; a e afio a'e le Alii i ou luga, ma le pupula o le Alii e aliali lea i ou luga.”*

Ua le tutusa itu lalolagi e soifua ma ola ai le faitau miliona o tagata. O le masina o Ianuari, e fa'afeagai ai le tasi vaega o le lalolagi ma le tau malūlū, a o le isi vaega, ma le tau vevela. E a'afia le to'atele o tagata i le tino, ona o fesuia'iga o le tau. Atonu o le mea e ao ina tatou faia pe afai e tutupu pea lagona fa'anoanoa ma le lē fiafia i le fesuia'iga o le tau i le masina o Ianuari, o le taumafai lea e fa'alilili le loto fa'anoanoa, a ia fa'atupu le loto fiafia ma le lagona o le fa'afetai ona o mea faigata e feagai pea ma le tagata i lea aso ma lea aso.

Tautala le perofeta o Isaia i le 'oa ma le tamāoaiga o loo natia i le mea pogisa, Iasaia 45:3, *“Ou te foa'i atu foi ia te 'oe 'oloa o loo i le pogisa, ma 'oloa lilo o loo i mea nanā; ina ia e iloa o a'u lava o le Alii, o lē valaau i lou lava igoa, o le Atua o Isaraelu.”* O le a le uiga o lea mea, a o fea foi e maua ai? O mea faigata, loto fa'anoanoa, puapugatia---e leai se tagata e fia a'afia i ia tulaga. Peita'i, o le fa'atuatua ma le loto talitonu, e mafai ona a'oa'oina ai le tagata. E avea pea le pogisa e fai ma o tatou fili. Ae fa'amata ana leai le pogisa, 'ailoga e tupu le loto naunau e fia taunu'u ma o'o atu i le malamalama?

Tatalo: Le Alii e, ia foa'i mai le potu ma le fa'autauta ou te iloa ai galuega ofoofogia. Fa'ailoa mai lou malamalama, e tua i ai lo'u pogisa, **Amene.**

Aso Toonai – Ianuari 11: “Va'ava'ai pea i le uti” (*Clock watching*)
Tusi Faitau – Luka 2:25-38

Matua – ff.30-32: *“Auā ua iloa e o'u mata le fa'aolataga ua e saunia i luma o nu'u uma lava; o le malamalama e fa'amalamalama a'i nu'u ese ma le mamalu o lou nu'u o Isaraelu.”*

Sa fa'alagolago tiute tau'ave o augā tupulaga ua mavae, i mea na foa'i mai e le Atua e ola ai---o le susulu mai o le La ma le malamalama i le taeao, o le tutonu ma le goto ifo o le La i le vaeluaga o le sami ma le lagi. Peita'i, o augā tupulaga o

i nei ona aso, ua fau e le tagata masini ma a'upega eseese e mafai ona feavea'i, e pei o le telefoni e iloa ai le taimi. Ua telē le eseese ua tatou i ai nei! Sa ola le tagata i le olaga ua uma ona fuafuaina mai le amataga. E mulimuli lava i taimi ma itula ua tu'uina mai. E tausisi tagata uma i le "uati" ua uma ona saunia e le Atua, a e le o le pule lava o le tagata ia i lana ia taimi.

Na ola fa'atalitali Simeona i le "uati" mai le lagi, i aso ma vaiaso atoa ma tausaga i le malumalu i Ierusalem. O lona onosa'i, fa'apalepale ma le fa'atuatua, na o'o ina tali fa'aaliali mai ai: *Ua na vaia le fa'aolataga e ala ia Iesu.*

Talosaga: Le Alii e, ia ou fiafia e avatu le fa'amanu ma le viiga i lau Afio i ao ma po, ma ou ola ai pea i le fiafia ma le olioli i lou filemu, **Amene.**

Epifania: Malamalama mo Atunu'u uma 2 – O Mea Lilo ua Fa'aalia

Aso Sa – Ianuari 12: "O le Papatisoa a Iesu" (*Jesus' baptism*)

Tusi Faitau – Mataio 3:13-17

Matua – ff.16-17: *"Ua papatisoina Iesu, ona maliu a'e loa lea o ia nai le vai, fa'auta foi, ua fa'avanoaina le lagi ia te ia, ua ia iloa atu foi le Agaga o le Atua ua afio ifo e peiseai se lupe, ua o'o i ona luga. Fa'auta foi, o le si'ufofoga mai le lagi, ua fa'apea mai, "O lo'u Atalii pele lena, ua ou fiafia lava ia te ia."*

Ua avea le papatisoga a Iesu e tatalaina ai le 'ie pupuni i le fa'aaliga o mea lilo tau i le Atua. E lua vaega e fa'amaonia ai lenei mau. Muamua, ua fa'ailoa Iesu i luma o le lalolagi, o Ia o le Atalii pele e to'atasi o le Atua le Tamā. O lona tula'i fa'aleiloga mai e mulimuli ia Ioane le Papatiso, o se fa'atinoga e 'auala mai fa'avaloga, ma o lona mana'o ia papatisoina, sa fa'atinoina lava i le mamalu o le Atua. O se tupua e lei mātēa e Ioane, auā o Iesu e leai sana agasala. A o ai o ia ua filifilia ai lona tagata agasala e fa'ataunuu lenei papatisoga? O le fa'atinoga lenei ua fa'ailoa ai mea lilo, e ala ia Iesu, i le lalolagi uma.

Lua, ua avea lenei papatisoga e fai ma 'auala e fa'ailoa ai Iesu mo ia lava. O le si'ufofoga mai le lagi ua fa'ailoa mai, o Ia lava o le Atalii e to'atasi o le Atua le Tamā, ma o le ulua'i fa'aaliga lenei mai le Atua e fa'atatau ia Iesu. Ua avea lea fa'aaliga mai le Atua le Tamā ua fa'amaonia ai e Iesu lona fa'afeagai tutusa ma le Tamā. O le mea lea, ua filifilia ai lenei vaiaso, ia tatou manatunatu ma mafaufau atili i lenei fa'aaliga mo i tatou.

Tatalo: Le Atua e o Fa'aaliga, se'i e fa'ailoa mai ia i matou mea-lilo o lou finagalo, ina ia matou ola ma tumau ai e o'o i le iuga. **Amene.**

Aso Gafua – Ianuari 13: "Mea lilo natia i tausaga e tele"

Tusi Faitau – Efeso 3:7-21 (*Mystery hidden for ages*)

Matua – ff.8b-9: *"... Lenei lava alofa tunoa, ina ia ou folafola atu i nu'u ese le oloa faula'i o Keriso e le masu'esu'eina lava; e fa'amalamalamaina atu foi i tagata uma le uiga o le sauniuniga o le mea lilo ua natia talu mai i tupulaga anamua i le Atua, o le na faia mea uma lava."*

Ua fa'amaonia e Paulo o Iesu o le penina tautele na natia e le Atua. O le mea lilo na natia, a ua fa'aalia. O le ulua'i taimi lenei i le tala fa'asolopito o le lalolagi ua fa'ailoa mai ai e le Atua le Tamā, lona lava finagalo, ma le taimi ua ia finagalo ai. O Iesu Keriso o le ala ma le upu moni, e leai se tasi e alu atu i le Tamā pe a le ui mai ia te IA (Atalii). O le mea lea ua ta'utino ai Paulo, o le ala foi lea e tasi e iloa ai mea lilo i le finagalo o le Atua.

O i latou uma ua talitonu o Iesu Keriso o le fa'aaliga a le Atua, ua fai ma o latou tiute tau'ave le tala'i atu o lea tala lelei. Ua ta'utino e Paulo lona fiafia e 'auai i lenei oloa ta'ua, e ui i sona vaivai ma le lē atoatoa. Ua fa'aopoopo le fiafia ia Paulo ona o le avanoa ua fa'aalia nei ia te ia, ina ia tala'i atu lenei tala lelei i Nu'u Ese, o e sa le maua lea avanoa i taimi ua mavae. Ua talitonu Paulo e aunoa ma se masalosalo, o le tiute tau'ave foi lea o le Ekalesia: o le tala'i atu i le lalolagi uma le finagalo lilo o le Atua le Tamā, e ala ia Iesu Keriso le Fa'aola.

Tatalo: Le Alii e, ua e afio mai i le lalolagi e fa'ailoa mea lilo e fa'atatau i lou malo e fa'avavau. Fa'afetai i lou fa'aali mai, **Amene.**

Amata Fonotaga a Komiti Tumau i Kanana Fou

Aso Lua – Ianuari 14: “Silafia mea lilo a le Atua”

Tusi Faitau – Kolose 2:1-15 (*Knowledge of God's mystery*)

Matua – ff.2-3: *“Ina ia fa'amafanafanaina o latou loto, o fa'aso'oina i le alofa, ina ia maua ai le oloa uma o le maotinoia i le loto matala, ina ia iloa lelei le mea lilo a le Atua, o Keriso lea, ua ia te ia le oloa uma o le pota atoa ma le malamalama, ua lilo ai.”*

O le pota, o le ki lea i le iloa o mea lilo ma ala e ui tonu ai. Na tatou va'ai i le aso ananafi ia Iesu, o ia o le ala e tasi e iloa ai mea lilo a le Atua. A o le tusi faitau o lenei aso, ua fa'ailoa mai o Iesu e le na o se fa'asino ala, a o Ia o le Poto i mea lilo tau le Atua. O Iesu Keriso o le Poto na te a'oa'oina le olaga mafuta fa'afe-saga'i, a e le na o se mea e fa'amatalaina poo se manatu e finauina.

O le pota e 'auala mai i le fesoota'iga ma Iesu, e i ai lona amataga, ma o lea amataga, e fa'apogai mai i le soifuaga naunau e fa'atino ma fa'amalosia le ola mafuta ma ia. O manatunatuga e fa'atatau i le fesoota'iga ma le mafuta atu ia Iesu, o iina e fausia mai ai le fa'avae o le ola fa'atuatua. O le mafutaga lea e iloa ai ona ola felagolagoma'i ma fesoasoani le tasi i le isi, e ala i le mafutaga ma Iesu. E leai se tasi mea na te 'ave'esea i tatou mai ia Keriso, auā o ia lava o le Poto; ia tatou fa'amanuina lona alofa.

Tatalo: Le Alii e, le autu o le Poto moni, se'i foa'i mai ia te i matou le iloa ma le malamalama matou te saili atu ai lou finagalo tonu, **Amene.**

Aso Lulu – Ianuari 15: “Ua fa'aalia e Iesu lona mamalu”

Tusi Faitau – Ioane 2:1-11 (*Jesus manifests his glory*)

Matua – ff.2-3, 11: *“Na tala'iina foi Iesu ma ona soo i le tausamaaga. Ua uma foi le uaina, ona fai atu lea o le tina o Iesu ia te ia, “Ua leai sa latou uaina.” ...Na fa'ia e Iesu lenei ulua'i fa'ailoga i Kana i Kalilaia, ma fa'aali mai ai lona mamalu; ona fa'atuatua ai lea o ona soo ia te ia.”*

Na amata le galuega tala'i a Iesu i Kana i Kalilaia i lona fa'aliliuina o le vai e avea ma uaina. O se vavega ofoofogia! E tele ni manatu e uiga i lenei fa'atinoga na faia e Iesu. Muamua, na valaauina Iesu ia 'auai i le fa'aipoipoga. Na naunau lenei aiga ia mafuta fa'atasi ma Ia i le ta'umafataga fiafia. Peitai, i nei ona po, o le ola mafuta ma Iesu o se tulaga ua le ta'ua i le to'atele. Ae mo nisi, o le mafutaga fa'atasi ma Iesu o se fa'atinoga e mana'omia tele lea i taimi fa'aletonu o le olaga. O se tulaga e ao ona fa'amalosia, auā o le mafutaga fa'atasi ma Ia, e maua ai le fesoasoani sili ona ta'ua i taimi o faigata ma puapuaga.

Lona lua, ua ta'u mai ia Iesu le tulaga fa'aletonu ua o'o i le aiga. Ae ui ina lei faia lava e Iesu se vavega e o'o mai i lea taimi, sa fa'ailoa e lona Tinā le mea ua tupu ma le fa'amoemoe o le a fesoasoani Iesu e fa'amalie le tulaga fa'aletonu ua i ai. Ua avea le talosaga na faia e le Tinā ma 'auala o le fa'atinoga o le vavega. E mafai lava ona fa'alatalata mai Iesu e talia o tatou mafatiaga, ae le pei Iesu o se "taavale falema'i" e valaau i ai mo se fa'avelave fa'afuase'i.

Lona tolu, e i ai fa'asinoga ma fa'atonuga e ao ina mulimuli ai. Na fa'atonu auuina e fa'atutumu fagu uaina i le suavai, aemaise o le fa'asinoga ia fa'atofusia i latou uma na 'auai, lea na sologa lelei ai mea uma ma ua iloa ai ua 'auai mai le Mesia i le lalolagi. Pe ana fai e i ai se fa'afinauga e tusa ma nei fa'atonuga, se manū 'ailoga e sologa lelei ia fuafuaga, ma le iloa le mafuta mai o le Mesia.

O lo tatou talia o ana fa'asinoga ma poloaiga e auua ma se fesili, o le fa'ailoga mautinoa lea o lo tatou loto naunau e mafuta ma Iesu Keriso ma lona mamalu i le lalolagi.

Tatalo: Le Atua mamalu e, ia e fesoasoani mai ia avea i matou e fai ma a'upega e iloa ai lou finagalo alofa, ma fa'ailoa atu ai i le lalolagi, **Amene.**

Aso Tofi – Ianuari 16: “Lavea’iina mo ē matitiva” (*Deliverance to the needy*)

Tusi Faitau – Salamo 72:1-14

Matua – ff.12-13a, 14: *"Auā e laveai e ia o lē mativa i lona alaga mai; atoa ma le ua puapugatia, ma le ua leai sona fesoasoani. E alofa atu ia i le ua vaivai ma le ua mativa... E laveai o ia ia i latou ai le saua ma le fa'amalo; e silisili foi o latou toto i lona manatu."*

E i ai se tasi muagagana e fa'apea: "O lē e pule ma le malosi, e i ai le taimi e fa'aletonu ai. A o lē e pule ma le malosi tele, e le masalomia e i ai le taimi e pa'ū ai." E tupu le fa'aletonu i le pule ina ua faia ma le amioletonu ma le manatu fa'apito. Afai o le fa'amoemoe o le pule malosi ia lelei ai na o lē e pule, e o'o ina lelei ai na o ia lava, ina ua fa'ato'ilaloina isi ma pule ai ia te i latou.

Ua molimau le fai Salamo, o le tasi va'aiga e uiga i le pule malosi e fesoasoani i ē vaivai e leai se malosi o i ai. O le pule amioletonu, e fa'apei o le Atua, e fai lea ma fa'ata'ita'iga o pule uma i le lalolagi, e le mafai ona nofonono pe fa'apito ia tasi. Ua fausia le lalolagi ua tatou i ai i pule eseese, e i ai ma le pule fa'ailoga tagata, ua faia le amioletonu i isi, a e mafatia ē ua vaivai. O lona uiga, ua aofia ai itu e lua, o le ola tete'e ma le ola vavae'ese.

E tete'e i ē faia le finagalo o le Atua, ae ola taupulepule fa'atasi ma ē ua faia o latou lava loto e ala i lo latou galulue 'aufa'atasi. Ua latou taumafai e faia uiga tau fa'asesē e ala i le fa'aaogāina o le pule malosi, e o'o lava ina a'afia ai le soifua o

le to'atele. E le fa'apito le finagalo o le Atua, e finagalo tutusa i tagata uma; e finagalo alofa le Atua i ē ua vaivai ma leai se malosi o i ai.

Tatalo: Le Alii e, ua e finagalo ia matou maua le agaga o le alofa i tagata uma. Foa'i mai le pota ma le mafaufau e fa'atino ai lau amiotonu, **Amene.**

Aso Faraile – Ianuari 17: “Poloa’iga i le ‘auso’o” (Disciples’ commission)

Tusi Faitau – Mataio 28:16-20

Matua – ff.17-18, 19a, 20b: *“Ua latou iloa o ia, ona latou ifo mai ai lea ia te ia; a ua masalosalo nisi. Ona...fetalai atu, “Ua tu’uina mai ia te au le pule uma lava i le lagi ma le lalolagi. O lenei, ia outou o atu e fai nu’u uma lava ma soo ... Fa’auta foi, ou te ia te outou i aso uma lava, e o’o lava i le gataaga o le lalolagi.”*

I le papatisoga o Iesu, o iina na fa’amaonia ai le tu’uina mai o le galuega a le Atua ia Iesu ina ia fa’atinoina i le lalolagi uma. O toe va’aiga a Iesu i lenei lalolagi e pei ona fa’ailoa i le tusi faitau, ua ia tu’uina mai ai le poloa’iga i ona so’o latou te fa’aauaina lenei galuega. Ae ua tu’u faatasi mai ai foi ma le pule e fa’atino ai. O le pule lea ua tu’u e Iesu i lona ‘ausoo, o le pule lea na iloa i luga o Kolokota ma fa’amaonia i le tu’ugamau tu’ufua.

O le pule mo le tala’iga o le Tala Lelei, o le pule e i ai le malosi lea na fa’atino ai le toe soifua mai o le Alii mai le oti ma tu’ugamau. O le fa’atinoina la o lenei pule, o lea ua molimauina e so’o o le Alii e ala i le fa’atonuga e tala’i atu le Tala Lelei i le lalolagi uma. O lona uiga, e le o se fa’atinoga mo i latou lava. A o le fa’amalosi e fa’aauau a’oa’oga na saunia e Iesu.

E foliga o se mea lilo lenei ua poloa’iina e Iesu. Peita’i, o le fa’asalalauina o le Tala Lelei, ua molimauina ai fa’ailoga o lenei mea lilo. Ua fa’atino le galuega tala’i o le Tala Lelei, ma ua fa’amaonia ai le mea lilo sa natia, a ua fa’aalia!

Tatalo: Le Atua e, ia fa’amalosi i matou e ala i lou Agaga Paia matou te folafola atu lou Tala Lelei, ma fa’aali lou finagalo lilo i le lalolagi, **Amene.**

Aso Toonai – Ianuari 18: “Meaalofa a le Agaga Paia” (Gift of the Holy Spirit)

Tusi Faitau – Galuega 10:34-48

Matua – ff.44-46a: *“Ua tautala atu Peteru i nei upu, a e afio ifo le Agaga Paia ia te i latou uma lava o ē ua fa’alogo i le upu. Ona matuā ofo lea ē na peritomeina o ē fa’atuatua...ina ua liliigi ifo i nu’u ese le alofa o le Agaga Paia. Auā ua latou fa’alogo atu ia te i latou ua tautala mai i gagana eseese, ma vivii atu i le Atua...”*

O fuafuaga e fa’atatau i le olaga mamā ma le olaga palapalā, ua o’o ina a’afia ai aganu’u ma talitonuga fa’avae i le tele o atunu’u. Na ola a’e Iesu ma fa’afeagai ma talitonuga fa’avae fa’apea. O le afio ifo o le Agaga Paia, ua o fa’atasi ma le taofia o aiaiga masani e fa’atatau i le olaga mamā ma le palapalā. O le tala ia Peteru ma Konelio, e foliga ua suia ai aganu’u masani e le Agaga Paia e fa’atatau i fa’atinoga masani sa i ai e uiga i le olaga mamā ma le olaga palapalā i vaega e lua.

Muamua, ua fa’ailoa e le Agaga Paia, o le fa’aliliuina o ē matutua, fa’apei o Simona Peteru, e leai se tua’oi e fa’ailoga tagata ai le silafaga a le Atua, poo se tagata e maua luga sona tulaga, poo se tagata e leai sona tulaga. Ua tutusa tagata uma i le silafaga a le Atua. Lua, ua fa’amaonia e le Agaga Paia le fa’aliliuina o

tagata o Nu'u Ese, e fa'apei o Konelio---ua fa'aleaogaina le talitonuga sa masani ai---e aofia ai le papatisoga-- sa fai lea ma agavaa e talia ai se tasi ua fia ulufale i le Ekalesia. Ua o'o ina 'auai ma fa'atasi mai le Agaga Paia i se tulaga ofoofogia, ua fa'atumulia ai le aiga o le tagata o Nu'u Ese e le fa'atua'oia. Ua tatala le faitotoa mo so'o se tasi ma ua leai se fa'ailoga lanu. Ua o'o mai le Malo o le Atua ma ua fa'aatoatoaina e le Agaga Paia.

Tatalo: Le Alii e, se'i fa'atutumuina i matou e lou Agaga ina ia tatala ai o matou loto e aunoa ma se fa'ailoga lanu, e tutusa ai la matou va'ai i tagata uma, **Amene.**

EVAGELIA A MATAIO (1) **1 – O le Masima o le Lalolagi**

Aso Sa – Ianuari 19: “Amu'ia ē fa'atupuina le filemu”

Tusi Faitau – Mataio 5:1-12 *(Blessed are the peacemakers)*

Matua – f.9: *"Amu'ia i latou e fa'atupuina le filemu, auā e ta'ua i latou o fanau a le Atua."*

O Aperila 2010 na malii ai se teine itiiti e lima tausaga i le aai o Montego Bay, Jamaica, ina ua lavea i se fana a se tagata a o malaga i se taavale. Na lavea fa'atasi lenei teine itiiti ma lona tamā. O ui i le tuga o lenei fa'alavelave, ae o loo i ai nai fesoota'iga e pei e fa'asino lenei fa'alavelave i le lauga fa'a-Amu'ia a Iesu.

O le fesoota'iga muamua, o le igoa o le teine itiiti o 'Christina'. O lona uiga, 'o ē mulimuli ia Keriso.' O le isi fesoota'iga, o le igoa o le tamā, 'Christopher,' o lona uiga, 'o 'avefe'au o Keriso'. Ma le fesoota'iga mulimuli, o le igoa o le 'auala na tupu ai le fa'alavelave, o 'Felicity Road'. O le upu, 'Felicity', o lona uiga, 'Amu'ia.' O nai fesoota'iga ia ua tupu ai le manatu, o lenei fa'alavelave tūgā, e aga'i ma tusi lima i le galuega lavea'i na saunia e Iesu Keriso.

O lenei vaiaso o le a tatou mafaufau atili i le lauga a Iesu i luga o le mauga; o ana fetalaiga e fa'atatau i lo tatou olaga e mulimuli i ana a'oa'oga taūa. Poo le a 'ea le uiga o a'oa'oga taūa a Iesu ia te 'oe i lenei foi aso?

Talosaga: Tatou tatalo i le Alii, o Ia o le autū ma le pogai o le soifua e fa'avae i le “fa'atupuina o le filemu.” Ia foa'i mai pea le alofa tunoa o le Atua, **Amene.**

Martin Luther King Jr's Birthday (Amerika)

Aso Gafua – Ianuari 20: “So'otaga loto tetele” *(Courageous connections)*

Tusi Faitau – Mataio 5:13-16

Matua – ff.13a, 14a: *"O outou o le masina o le lalolagi outou; ... O outou o le malamalama o le lalolagi outou. ..."*

Ua fa'aaogāina e Iesu mea taūa i le soifuaga masani o aso ta'itasi---o le masina ma le malamalama. E ese mai i le fa'aaogāina o le masima i mea'ai. Ua fa'atusaina fa'apena le soifuaga o le tagata na te aloa'ia so'otaga, ma fa'aaauuina le ola mafuta i le va o le tasi i le isi. E fa'aaogāina le masima e faia ai fa'atauga, e mafai foi ona totogi ai tagata faigaluega i nisi taimi. O le a'oa'oa atu o Iesu i ona so'o ia avea ma “masima o le lalolagi,” o lona uiga, ua fa'atatau lea i le tele o mea

taūa e fa'aaogāina ai ona so'o i le lalolagi. Ua a'oa'o mai foi Iesu e uiga i le "malamalama," ua fa'atautu lea i le susulu atu i le mea pogisa.

E le faigofie ona fa'atino le soifuaga moni fa'a-Kerisiano e aunoa ma lo tatou ola so'o fa'atasi o le tasi i le isi. Se'i manatunatu ane ma mafaufau pea i ai---o le masima ma lona aogā e fa'amalieina ai lagona fa'aletonu o le tagata, e fa'apea foi ona mana'omia le malamalama e fa'asusulu atu i le ala tatou te savavali ai.

Ua vala'auina i tatou e Iesu ina ia mulimuli i ona ala---ola fesoota'i ma tagata. Na te le fa'ailogaina poo ai ua taūa a o ai foi ua maulalo. Na te mafuta ma ē ua manatu fa'atauvaai ai le to'atele, ma tagata ua lē amana'ia ma ua tu'ulafoa'iina.

Tatalo: Le Alii e, foa'i mai le loto tele matou te finau ai pea a e lē solomuli, e fa'apei o Iesu ina o fa'atino lou finagalo, **Amene.**

Aso Lua – Ianuari 21: “Agaga ma le mata'itusi” (*Spirit vs letter*)

Tusi Faitau – Mataio 5:17-20

Matua – f.17: “*Aua nei outou manatu ua ou sau e tatalaina le tulafono po o le 'au perofeta; ou te lei sau e tatalaina, a ia fa'ataunu'uina.*”

E lua ni fa'atinoga taūa i le soifuaga saogalemu o le tagata e ao ona manatua pea: Muamua, ia tausia le tulafono ua uma ona tusia; Lua, ia fa'aaogā le mafaufau i le taimi e tupu ai se fa'alavelave. O le fa'augaina loloto lea o le autu o lenei aso i le va o le mata'itusi o le tulafono ma le agaga o le tulafono.

O le ata lea o le a'oa'oga ua aumaia i le tusi faitau e fa'atatau ia Iesu ma le 'au faresaio, o tagata e fa'ataūa tele le tausiga o le tulafono fa'a-Iutaia---e a'afia ai upu tusia ma le masaniga o aso faiso'o. O le fa'amoemoe o le 'au Faresaio, ia mulimuli i mata'itusi o le “tulafono ua tusia.” Peitai, ua le maua tonu ai le agaga o le tulafono e pei ona taumafai ai Iesu i ana a'oa'oga.

Ua a'oa'o Iesu, e i ai le fa'asinoga pito sili ona taūa o loo taoto i talaatu o le tulafono. O le tulafono ua na o se ta'ita'itama, e ta'ita'iina ai le tagata ina ia maua le mafutaga vāvā lalata ma le Atua. O le agaga moni lea o le tulafono. Ae a fa'amamafa loa le mata'itusi o le tulafono sa tusia e le tagata, o iina e tutupu ai fa'aletonu. E lei afio mai Iesu e tete'e i le tulafono, ae ia fa'ataunu'uina – o le ta'ita'iina lea o tagata i le mafutaa ma le Atua.

Tatalo: Le Atua alofa e, fesoasoani mai ia ou iloa ona mulimuli tonu i lou finagalo, a e le o manatunatuga fa'ale-lalolagi, **Amene.**

Aso Lulu – Ianuari 22: “Pe ana mafai e foliga ona fasiotia” (*If looks could kill*)

Tusi Faitau – Mataio 5:21-26

Matua – ff.21-22a: “*Ua outou fa'alogu, na fai mai i e anamua, “Aua e te fasioti tagata;” ai se fasioti tagata, e nofo sala o ia i le tulafonoga. A o a'u, ou te fai atu ia te outou, ai se ita i lona uso, e nofo sala o ia i le fa'amasinoga; ...*”

Pe avea 'ea se mea fa'atauvaai e fa'atusatusa i se mea telē? O le fasioti tagata e le o se mea e tupu so'o, ae a latalata mai le loto ita, ona i ai lea o le avanoa e mafai ona tupu ai. Sa tausisi le 'au faresaio i le tulafono a Mose. Ua manatu foi i latou, poo fea lava e o'o i ai le loto ita a le tagata, e lē afaina lea pe afai e le tula'i mai ai le fasioti tagata. A o le a'oa'oga ua saunia e Iesu, ua fa'a'ailoa mai ai, o le

fasioti tagata, o se fa'atinoga e mamao lava ma e le tupu so'o. A o le loto ita, e tupu so'o, ma o iina e amata mai ai le gaoiga seia o'o lava i le fasioti tagata. E faigata ona tatou mafaufau i le fasioti tagata auā e faigata ona tupu i le tagata malamalama. Peitai, o le a'oa'oga ua aumaia e Iesu, ia sili ona manatunatu i mea pito latalata mai; o le loto o le pogai o mea uma e a'afia ai le tagata ola. Ma, o le finagalo foi lea o le Alii mo tagata uma, ia maua le fesoota'iga lelei ma le filemu i le va o le tasi i le isi, e ala i le teuteuina o le loto.

Tatalo: Le Atua o le filemu, fesoasoani mai ia ou ola fa'atasi ma lou finagalo alofa. Ia puipuia i matou mai le loto ita ma le fa'ailoga tagata, **Amene.**

Aso Tofi – Ianuari 23: “Mata e feoa'i solo” (*The wandering eye*)

Tusi Faitau – Matthew 5:27–30

Matua – ff.27-28: *“Ua outou fa'alogu, na fai mai i e anamua, 'Aua e te mulilua'. A ou te fai atu a'u ia te outou, 'Ai se va'ai i le fafine ina ia mana'o i ai, ua uma ona mulilua ma ia i lona loto.’”*

E matuā mamafa le fa'asalaga a le tagata e mulilua; e fa'apei ona tusia i le Levitiko 20:10 – o le oti. Ae pe sili foi ona fa'ataua le faia o se tulafono e mafai ai ona taofia mafauauga o le loto e mafua ai ona mulilua.

Ua tatou faitau i le fa'afeagai o Iesu ma le fafine mulilua (Ioane 8:1-11). Ua iloa e lenei fafine le fa'asalaga o le a o'o ia te ia, o le oti, pe a fa'amaonia. E fa'asala lē ua fa'atinoina le agasala ona ua i ai le tulafono ua solia; ae mana'omia se fuafuaga e taofia ai mana'oga o le loto, e mafua ai ona fa'atino lea agasala.

O le fa'amoemoe autu o le a'oa'oga a Iesu, ua fa'ataua lea i se fa'atinoga e pogai mai le loto, e fa'apei o le mulilua – o mana'oga e fafau mai i le loto. O le agasala o le mulilua, e pogai mai i manatunatuga ma mana'oga leaga o i le loto o le tagata. O lona uiga, o le loto lava e amata mai ai.

Tatalo: Le Alii alofa e, o lou mana e mafai ai ona liua o matou loto faigata, ina ia avea ma loto e tupu mai ai mea lelei e te fia silasila mai i ai, **Amene.**

Aso Faraille – Ianuari 24: “Fa'aipoipoga: poo le oti ta te tete'a ai?”

Tusi Faitau – Mataio 5:31-32 (*Marriage: till death us do part?*)

Matua – f.31-32: *“Sa fai mai foi, 'Ai se fa'ate'a i lana avā, ia avatu ia te ia le tusi alei.' A ou te fai atu ia te outou, ai se fa'ate'a i lana avā a e le'i mulilua ia, ua ia fa'amulilua ia te ia; ai se fai mana avā le ua fa'ate'aina, ua mulilua foi o ia.”*

I le fa'aliliuga a Iesu, o le ulugalii ua tete'a, o le fa'afitauli moni lea---e pei ona iloa i nei ona aso. I na ona po, e lua taofi na mulimuli ai le talitonuga e uiga i ulugalii. Muamua, e i ai le 'auala e mafai ona tete'a ai; a o le isi, e le mafai lava ona tete'a se ulugalii. O le tusi faitau o lenei aso, e foliga e sapaia e Iesu le taofiga mulimuli, ua na fa'ataoto le mafua'aga e tete'a ai se ulugalii, se'i vagana ua molia i le mulilua. O le mea lea, o le fa'atinoga o ulugalii tete'a i nei ona po i le tele o atunu'u, ua faia lea fa'aiuga e lē ona e fa'apitoa mo le puipuga o le fafine (avā). Pe afai o lea, o le a sa tatou upu e fa'ataua i lenei a'oa'oga a Iesu?

Afai o le a tatou taumafai e fa'atusatusa a'oa'oga a Iesu i o tatou vaitaimi, e sili pe a fa'amamafa o tatou manatu i 'auala e fa'amausali ai le mafutaga nonofo

fa'atasi o ē ua osi feagaiga, ina ia tumau le mafutaga fealofani, a e lē o le manatu mamafa i le fa'atinoga o tulafono e taofia ai ulugalii tete'a.

Tatalo: Le Alii alofa e, fesoasoani i lo matou vaivai e tausi i a matou feagaiga osia fa'ale-ulugalii. Ia matou iloa ona nonofo fa'atasi i le fealofani moni, **Amene.**

Aso Toonai – Ianuari 25: “Tautoga o le loto” (*Cross my heart*)

Tusi Faitau – Mataio 5:33-37

Matua – ff.33-34a: *“Ua fa’alogo foi outou, na fai mai i ē anamua, ‘Aua e te tauto pepelo; a ia e avatu i le Alii o mea e te tauto ai.’ A ou te fai atu a’u ia te outou, ‘aua lava ne’i tauto; ...”*

O le tautoga, o upu ta'utino ia e folafola ai se fa'atinoga o le a faia. I ona po anamua i le fa'atinoina o tautoga, na fetalai Iesu ma fa'apea atu, “Aua lava ne’i e tauto, poo le lagi i le nofoalii o le Atua, po o le laueleele auā e solia i ona aao, poo Ierusalemā foi auā o le aai o le Tupu Silisili’ese.” ‘Aua nei e tauto i lou ulu, auā e le mafai ona e pulea le sinasina poo le uliuli (ff.34-36) o ou lauulu.

Ua fetalai Iesu e fa'afeagai ma le manatu o le 'au faresaio, ina ua latou faia tulafono ae fa'amoemoe e fa'afofoga mai ai le Atua. Pe afai ua fa'aaogā le suafa o le Atua e fai ma fa'amaoniga o lau tautoga, e tatau lava ona e tausisi i ai ma le fa'amaoni. Peita'i, afai e tauto se tasi ma le fa'amoemoe e fa'amaonia e le lagi po o le lalolagi, poo Ierusalemā, poo le ulu foi; o le upu moni, e le mafai e lea tagata ona fa'amaonia lana tautoga. E mafai foi ona filifilia upu ma le potō e le tagata tauto, ina ia mafai ai ona sao i ana togafitiga leaga...o le sola'ese mai le upu moni!

O a'oa'oga a Iesu e fa'ataui i le fa'atinoina o le tautoga, e lē afaina po o le fa'aaogā o le suafa paia o le Atua, pe leai foi. A o mea uma lava i le lagi ma le lalolagi, o ā le Alii ia.

Tatalo: Le Alii o le amiotonu, na e faia le tagata i lau amiotonu, ia matou auauna ma tautua e fa'atino lau amiotonu lea i le lalolagi, **Amene.**

EVAGELIA A MATAIO (1)

2 – Tatalo ma Anapogi

Aso Sa o Tupulaga

Aso Sa – Ianuari 26: “Liliu le isi alafau” (*Turning the other cheek*)

Tusi Faitau: Mataio 5:38-42

Matua – ff.39b, 41-42: *“... Ai se na te po mai i lou alafau taumatau, ia e liliu atu ia te ia le isi. ... Ai se na te tauānau mai lua te o ma ia i le maila e tasi, inā o ia oulua ma ia i maila e lua. Ia e avatu i lē ua ole mai ia te ‘oe; ‘aua foi e te liliu ese i lē ua fia nonō tupe ia te oe.”*

Ua fa'aailoa mai ia te i tatou e ala i le tusi faitau: o le fa'atuatua e o fa'atasi ma galuega fa'atino. Pe afai ae po mai 'oe e se tasi, e taūa lou iloa poo le a le mafua'aga ua faia ai, ma ia taumafai e 'aua ne'i e totogi atu ona o lē ua ita mai. O le tau ma sui, ua le o se fa'aailoga o le loto tele, onosa'i, poo le fa'apalepale. O le tu'u atu o le isi itu o lou alafau, o se 'auala lea e mafai ona a'oa'oina ai lē ua ita

mai i le mafua'aga o le loto ita. Ae le gata i lea, ua tatou iloa foi le faigata ona savali i se isi maila fa'aopoopo, poo le toe foa'i atu o se isi mea nai lo le tamāo-aiga ua uma ona foa'i atu, e pei o le malosi poo tupe. Ae afai o le a e mafai ona fa'atino ia mea, o le a mafai ona o le musumusuga a le Agaga Paia, ae lē ona o le fia Kerisiano poo le fia lelei.

Tatalo: Le Atua paia e, fesoasoani mai ia mafai ona matou tete'e atu i mea ua matou popole ma atuatuvaile ai, ma maua ai le agaga e fa'atino ai le alofa, **Amene.**

Australia Day (Ausetalia)

Aso Gafua – Ianuari 27: “O ai lo'u fili?” (*Who is my enemy?*)

Tusi Faitau – Mataio 5:43-48.

Matua – ff.44-45: *“... Ia outou alolofa atu i ē ua ita mai ia te outou...ia outou tatalo foi mo ē ua fa'asauā mai ia te outou; ina ia faia outou ma atalii o lo outou Tamā o i le lagi, o lē na te fa'aoso i lona La i e ua amio leaga atoa ma e ua amio lelei; ua ia fa'atotoifo foi le ua i ē ua amiotonu, atoa ma e ua amioleaga.”*

Ua tele tausaga, i lea augātupulaga ma lea augātupulaga, talu ona avea Iesu ma Alii o le Filemu. Peita'i, e tumau pea le fetaua'i ma le feitaga'i o tagata. Ua fa'aopoopo pea le numera o tagata sosola ese mai o latou atunu'u moni na fananau ai, ona o sauāga ma le fa'aailoga tagata, aemaise le pule sauā o ta'ita'i.

E manatua pea, o Iesu sa malaga i Aikupito ina ua sosola 'ese mai lona nu'u moni. Ae le gata foi i lea, o loo manatua pea i talosaga i latou o loo fa'atinoina sauāga, e le o tu'u'eseina lava i latou. E tatau foi ona tatou manatua pea, na poloa'i le Alii e ala i Tulafono: 'Afai e nonofo fa'atasi ma le tagata 'ese i lou lau'elele, 'aua ne'i e fa'asauā i tagata ese.'

O le tagata 'ese o loo mau ma 'oe, ia fa'apei o le tagatanu'u moni fa'atasi ma 'oe; e tatau ona alofa ma agalelei i ai e pei o 'oe lava ia te 'oe. O le ta'iala lenei e tatau foi ona tatou mulimuli ai: Ia tatala faitoto'a e ulufale mai ai i latou ua sosola 'ese, ua avea ma tagata 'ese ona o le fia ola.

Tatalo: Le Alii e, o 'oe lava o la matou Uo sili. Foai mai i o matou loto le agaga e fa'atupuina ai pea le agalelei ma le alofa i e ua fiaola, **Amene.**

Aso Lua – Ianuari 28: “Amio lelei e le va'aia” (*The invisible piety*)

Tusi Faitau – Mataio 6:1-6

Matua – ff.1a, 4a, 6b: *“Ia outou, nei fa'alialia la outou amiotonu i luma o tagata ... ina ia lilo au mea alofa; ...ina ulu atu ia i lou afeafe, ma pupuni lona puipui, i le e tatalo ai i lou Tamā o i le mea lilo; o lou Tamā foi o le silasila i le mea lilo, na te avatu se tau i te 'oe.”*

O le fa'atinoga o mea lelei i luma o le maimoaga a tagata, e tupu ai le fiafia i le loto ma lagona ai le mimita. Ua le o se lagona leaga lea. Peita'i, o lea itu'aiga mitamitaga, e o'o ina fa'atupu tele ai le manatu fa'apito ia tele se viiga o le tagata e maua ai. E fa'amaonia lenei itu'aiga lagona i taimi o fa'aaliga ma fa'afiafiaga. Afai o le a mae'a ona fa'atino se fa'aaliga e maofa ai le maimoaga a tagata, ona malosi lea o le loto ma tupu tele le lagona o le fa'agaetia ina ua pati ma alalaga le aofia ua potopoto. Ae mafai foi ona lagona le fa'anoanoa ma vaivai le loto, pe afai

e leai se manatu mai ma fa'afetai mai o tagata ona o se mea lelei na faia. E lē tau fa'aילוaina mea lelei e faia e le tagata. E le o mea uma foi e tatau ona pati ma alalaga ai. O le upu moni, o mea lelei uma e faia e tagata---e i ai fa'atinoga e lilo i le va'ai, e mamao le nofoaga e fa'atino ai--e le o mafai ona va'ava'ai ma fa'alogo i ai le lalolagi lautele. A e ui lava i lea, o ia mea lilo uma, e mai e le Atua le tau, auā o ia o le puna o fa'amanuiga uma.

Talosaga: Le Atua e, foi mai le loto maulalo ma le agamalu e fa'atino ai mea lelei mo le manuia lautele, ma ia fa'amanuina ai lau Afio e fa'avavau! **Amene.**

Aso Lulu – Ianuari 29: “Mea'ai ma le faamagaloga i aso fai so'o”

Tusi Faitau – Mataio 6:7-18 (Daily bread and daily pardon)

Matua – ff.8b-12: “...Auā ua silafia e lo outou Tamā mea ua outou matitiva ai, a o le'i ole atu outou ia te ia. O lenei, ia fa'apea outou ona tatalo: Lo matou Tamā e, o i le lagi, Ia paia lou suafa. Ia o'o mai lou malo, Ia faia lou finagalo, i le lalolagi e pei ona faia i le lagi. Ia e foa'i mai ia te i matou i le aso nei a matou mea e 'ai e tatau ma le aso. Ia e fa'amagalo ia te i matou i a matou agasala, E pei o i matou foi ona matou fa'amagaloina atu i e ua agaleaga mai ia te i matou...”

I nisi taimi, tatou te maua mea 'ai mo lenei lava aso, ae tatau ona saili pea mo aso ta'itasi. O le to'atele ua nonofo i atunu'u e tele le tamāoiga tupe e maua ai, ua le taūa tele lenei fuaiupu o le Tatalo a le Alii, “foa'i mai ia te i matou a matou mea e 'ai e tatau mo le aso.” Ae mo atunu'u e itiiti le fa'asoa ma o loo matelaina ai tagata, o se luitau tele lenei fuaiupu mo i latou. E fa'apena foi le fa'aupuga, “fa'amagalo mai, ina ua matou fa'amagaloina atu.” ‘Ailoga ua tatou fa'amagalo atu. Ua na o na tatou fa'aputupu le tele o le lapisi ma le anoano o mea le aogā, ma tatou fa'apea ane: ‘Le Alii e, fa'amagalo mai a matou agasala ua tele lava.’

O le Tatalo a le Alii, “Ia e foi mai a matou mea 'ai e tatau ma le aso”, o se fa'atinoga e le tu'ueseina lava, ma e fa'apea foi i le, “Ia e fa'amagalo atu i e ua agaleaga mai.” O la tatou tatalo faifai pea lea mo aso uma, auā o le fa'amanatu mai foi lea o le i ai o le Atua ia i tatou. O IA na te foa'i mai mea e tatau ma lelei mo le soifuaga manuia o le tagata talitonu ma fa'atuatua. Ma, o le a'oa'oga taūa foi lea mo le tagata, ina ia alofa ma fa'amagalo atu i ē ua agaleaga mai.

Tatalo: Le Alii e, ia foa'i mai ia te i matou lou tamāoiga i ala eseese; foi mai le agaga matou te fa'alagolago ai pea i lou alofa i le asō ma aso uma lava, **Amene.**

Aso Tofi – Ianuari 30: “O fea a'u 'oa?” (Where is my treasure?)

Tusi Faitau – Mataio 6:19-24

Matua – ff.19-20a, 21, 24b: “Aua tou te toloa'i i 'oa mo outou i le lalolagi, o i ai le mogamoga ma le 'ele e fa'aumatia ai; o i ai foi tagata gaioi e 'eli atu, ma gaioi ai. A ia outou toloa'i mo outou 'oa i le lagi...Auā o le mea ua i ai lo outou 'oa, e i ai foi ma o outou loto...Tou te le mafaia ona auauna i le Atua atoa ma le 'oa.”

O le mana'o tele, o se uiga ta'atele lea i le lalolagi. O nisi taimi e tupu lenei mana'o i mea totino a le tagata, i lona tupu'aga, i lona tamāoiga, i taimi e la'asia ai le tumutumu o taumafaiga fa'ale-tagata, ma isi lava tulaga fa'apena. O ia itu-aiga mana'oga e lotolotoi i totonu o fa'afinauga tau fefa'ataua'iga. E avea fefa'a-

taua'iga ma tupua na te fa'aoso le naunau ia fa'aopoopo mai pea ma tu'inanau ai lava. Afai o le a leai se fa'autauta e fuafua lelei ai, e o'o ina tupu ai se ma'i.

O tagatānu'u moni o le lau'eleele, ua latou manatu o le tamāoaiga ua maua mai i fua o le lau'eleele, o fa'amanuiaga lava mai lo latou tofi. O le mea lea, afai ua tau a'aoina se fa'amanuiaga mai le lau'eleele, e avatu i lē ua fai ma ta'ita'i o le nu'u, ina ia fa'aaogā mo le lelei o tagata uma. O fa'amanuiaga ua maua fua e 'auala mai i le lau'eleele, e tataua ona fa'aaogā lelei mo le manuia lautele.

A o'o ina tupu le agalelei ma le alofa atu i isi e pei o i tatou lava; a o'o ina maua le lagona e fa'asoa atu a tatou 'oa i ē mafatia ma puapuagaina; a tatou maua foi le fiāfia ma le olioli ona o le fa'aolataga ua saunia e le Alii mo i tatou, ona tatou iloa ai lea, ua teuina i le lagi o tatou 'oa.

Talosaga: O le Atua e, ia fa'atamaoigaina i matou i fua o le Agaga, ma ia iloa ona matou agalelei ma alolofa atu i e ua mana'omia se fesoasoani, **Amene.**

Aso Faraile – Ianuari 31: “Tauivi mo le Malo o le Atua”

Tusi Faitau – Mataio 6:25-34 (*Striving for the Kingdom of God*)

Matua – ff.25a, 32b-33: *"O le mea lea ou te fai atu ai ia te outou, 'aua nei outou popole i o outou ola, i mea tou te aai ai, ma mea tou te inu ai, ...Auā ua silafia e lo outou Tamā o i le lagi e aogā ia mea uma ia te outou. A ia outou mua'i saili lona mālō ma lana amiotonu; ona fa'aopoopoina atu lea o ia mea uma ia te outou."*

Ua tatou tatalo i le Tatalo a le Alii, e fa'apea: *"Ia o'o mai lou mālō. Ia faia lou finagalo i le lalolagi e pei ona faia i le lagi."* A tatou mafaufau loloto i a'oa'oga uma ua mavae i le Tusi Paia, ona iloa lea ua manino ma malamalama le a'oa'oga a Iesu e fa'atatau i le fa'atinoina o le olaga nei, ae le na o le lagi.

O ia mea uma ua foa'iina atu mo outou, ua fa'atatau lea i so'o se mea, ae maise o fa'amanuiaga ua tatou maua i lenei olaga. O le mua'i saili o le Malo o le Atua, o lona uiga, ia tatou matua galulue ma le fa'amalosi e fa'atino le finagalo o le Alii o Iesu, e ui ina taugata ma faigata mo i tatou.

Afai e o fa'atasi le tagata ma le Atua, ona tatou maua lea o se lalolagi fa'amoemoeina. Pe afai tatou te ta'utino lo tatou matuā galulue fa'amalolosi mo le Mālō o le Atua i le taimi nei, ona tatou le tau fa'atalitali ai lea i se isi fa'asologa e ta'u mai, tatou te mulimuli ai se ia o'o i le i'uga o mea uma.

Talosaga: Le Tupu e o le lagi, ia e fesoasoani mai e fa'aolaola lou malo i o matou olaga i aso uma, **Amene.**

Aso Toonai – Fepuari 1: “O le tusitusi o le lima” (*The pointing of the finger*)

Tusi Faitau – Mataio 7:1-6

Matua – ff.1-3: *"Aua tou te fa'amasino atu, ina ne'i fa'amasinoina outou. Auā o le fa'amasinoga tout e fa'amasinoina atu ai, e fa'amasinoina ai outou; o le fua foi tou fuaina atu ai, e toe fuaina mai ai ia te outou. Se a le mea e te vaai atu ai i si fasi laau i le mata o lou uso, ae te le iloa e oe le utupoto i lou lava mata?"*

O le fua o le sa'o o le tagata e fa'alagolago i le siosiomaga ma le lotoifale o loo tupu ma soifua ane ai. O ona uiga ma ana fa'aiuga e fa'avae i ia aseta, poo mea e taūa, ia te ia. O lana fa'auiaina foi la, o mea i lona siosiomaga e fa'alago-

lago i mea ua ta'ua, aemaise lona soifua a'oa'oina. O le maualuga po o le maualalo o le a'oa'oaina e a'afia ai le fa'aiuga fai.

E naunau Iesu ia ola manuia tagata uma, ae 'aua le va'ai masei ma ola tau-lamalama. O faiga ia a le tiapolo. E taumafai e fafaga tagata e fa'amasino ma tusitusi lima. O le vaivai na leiloa, ae fa'aosofia le fia fa'atonutonu tagata ona o le le lava o le ola a'oa'oina, ma le masani na ola a'e ma le tagata mai lona aiga. Ae le tu'ua ai le upu a matua, a sesē lava e tatau ona fa'asa'o. O le fautuaga a Iesu, ia muamua lava ona teuteu o tatou lumā fale ona tatou va'ai lea i le tua'oi.

Tatalo: Le Alii e, fa'amanatu mai pea ia tei matou e ao ona matou sailiili lava muamua ia matou lava e le'i tusi o matou lima, **Amene.**

FEAGAI MA FA'AMOEMOEGA LĒ TAUNU'U

(Dealing with Disappointment)

Aso Sa – Fepuari 2: “Mafaufau i Afioga a le Atua” *(Meditate on God's word)*

Tusi Faitau – Iosua 1:1-11

Matua – f.8: *“E le te'a i lou gutu le tusi o lenei tulafono, a ia mafaufau i ai i le ao atoa ma le po, ina ia e anaana e fai e tusa ma mea uma ua tusia i ai; ona manuia ai lea ia te oe o lou ala, ona e manuia ai lea.”*

Soo se faiva e tapua'ia, o faiva na e manuia. O se galuega a se nu'u poo se 'aulotu, o ni ta'aloga poo fa'agatama i le tai, e manuia pe a tapua'ia. O le a le ta'ua o lea tapuaiga? O le tatalo ma le tu'itu'i atu a le nu'u poo le ekalesia ia manuia le fa'amoemoe. O le tatalo a matua a o galulue fanau mo lo latou lumana'i. E teu loto apoapoa'iga ma fa'amanatu mai i matua ma le 'au matutua, o matai ma faifeau ma a latou upu mavae, 'Ia manuia ou ala,' ia ma isi.

Ae silisili ai upu a le Atua i lana auauana o Iosua. *E le te'a i lou gutu le tusi o lenei tulafono, a ia mafaufau i ai i le ao atoa ma le po, ina ia e anaana e fai e tusa ma mea uma ua tusia i ai; ona manuia ai lea ia te oe o lou ala, ona e manuia ai lea.”* O upu a le matua e moni lona alofa, e naunau ia taunu'u manuia le ta'ita'iga a lana auauana. O le Atua na fa'atapena ma fa'asaunia, ua a'e manuia ai faiva o lana auauana. Mafaufau i Afioga a le Atua, e manuia ai faiva uma e feagai ai.

Tatalo: Le Atua e, fa'atumu i matou i lau upu ina ia mafai ona matou maua le malosi fa'aleagaga e auauana atu ai lau afio, **Amene.**

Aso Gafua – Fepuari 3: “Finafinau i le tatalo” *(Persistence in Prayer)*

Tusi Faitau – 1 Samuelu 1:1-20

Matua – ff.16b-17, 18b: *“...Auā o le tele o lo'u mafaufau ma lo'u tiga ua ou tautala ai ua o'o i lenei itu aso.” Ona tali mai ai lea o Eli, ua fa'apea mai, 'Alu ia oe ma le manuia; ia foai mai foi e le Atua o Isaraelu le mea na e fa'atoga atu ai ia te ia. ... Ona alu ai lea o o le safine, ua 'ai o ia ua le toe mata fa'anoanoa.”*

O le natura ma le masani a tagata, o le fiugofie ma le fa'apalapala. A taia loa i mea faigata ma tofotofoga, ona tia'i lea o le faamoemoe o loo feagai ai. Ae sa le fa'apea Hana. Sa finau ma tauivi pea. Sa leo tele ma tu'itu'i pea ma taumafai pea.

Sa saili fesoasoani ia Eli le ositaulaga. E le'i mapu le sailiili ma tulei pea i le Atua e ala i le fa'atoga ma le tatalo. Na feagai Hana ma mafatiaga o le agaga ma le mafaufau, ae lei mapu ai lona naunau ina ia fa'afofoga le Atua i lona mana'oga. O le tatalo e le mapu ma le tatalo fa'anaunau a Hana, ua tali mai ai le Atua. E tali fa'apena foi la tatou tatalo, ona tali mai lea o le Alii i lona lava taimi.

Tatalo: Le Atua e, aumai e lau afio le malosi ina ia avea ai matou ma fitafita tatalo mo lau afio, **Amene.**

Aso Lua – Fepuari 4: “I taimi o le lē mautonu” (*In time of despair*)

Tusi Faitau – Neemia 1:1-11

Matua – f.11: “*Le Alii e, ou te aioi atu ia te oe, ia e fa’afofoga mai mai i le tatalo a a’u lau auauna, ma tatalo a au auauna, o e fia matatau i lou suafa; ma ia e fa’amanuia lava i lau auauna i le aso nei, ma ia e tu’u mai i ate au, ia alofaina i luma o lenei tagata. Auā sa fai a’u ma tautu uaina i le tupu.*”

Soo se mala fa'alenua poo se fa'alavelave ogaoga e afaina ai se atunu'u, e afaina ai foi lagona o tagata o loo aafia. Ua afaina Ieruselema ma ua leai se fa'amoemoe. Ua ta'ape'ape le nu'u ina ua manatu ua leai se alofa i le Atua mo i latou. O Neemia o le tagata loto nu'u e alofa i lona nu'u ma e naunau e toe fau le pa ma atiina a'e le malumalu. Ae paga lea, o loo i le tafeaga.

O lana tatalo lea ma lana augani i le Atua, mo se avanoa e foi atu ai e fai sona sao i le toe fa'aleleia o Ieruselema. E le faigofie, ua tau au ina fano lona fa'amoemoe ona o Peresia o le nu'u ese ma e malosi ana tulafono, ae o ia ua na o se tautu uaina. E liliu e le Atua mea faigata e avea ma mea faigofie. O le fa'amoemoe foi a fano, e liliu e le Atua e fai ma fa'amoemoe ola. E liliu e le Atua o tatou loimata o le fa'anoanoa e avea ma manumalo.

Tatalo: Le Alii o le manumalo, totō i o matou loto lau afio ma le aoao o lau pule, ma ia suia taunu'uga o mea uma lava i lau pule amiotonu, **Amene.**

Aso Lulu – Fepuari 5: “Ola i le fa’amoemoe” (*Living in hope*)

Tusi Faitau – Isaia 40:27-31

Matua – f.31: “*...A o ē fa’atalitali i le ALII, e toe fa’afouina lo latou malosi; latou te si’i a’e apaau e pei o aeto; latou te femoei, a e le vaivai; latou te savavali, a e le tigaina.*”

O le soifua onosa'i, o se meaalofa taūa mai le Atua. O le soifua lea e a'oa'oina ai le tagata mai lona ititi, e o'o lava ina matua. A o'o ina fa'au'u le tagata ma le fa'aailoga o le onosa'i, o le tagata iloga lea. O le tagata na te lavatia mea tiga ma faigata. O le fa'amalosi foi lea a Isaia i lona nu'u i totonu o le tafeaga. Onsoa'i ma lototele! Fa'atalitali i le Alii e fa'afouina ai lo latou malosi. E savavali ae le tigaina. E femo'ei ae le vaivai. Latou te si'i ae apaau pei o aeto. Ia mumū pea le faamoemoe. O loo lotolotoi le Atua i mea uma, e o'o lava i o tatou puapuaga ma mafatiaga, o loo fa'atasi mai le agaga fa'amalosi o le Atua.

Tatalo: Le Atua e, fa'atumauiina le fa'amoemoe ola i o matou tagata e te fa'afofoga ma tali mai i o matou tiga. **Amene.**

Waitangi Day (Niu Sila)

Aso Tofi – Fepuari 6: “Fa’atoilaloina le masalosalo” (*Overcoming doubt*)

Tusi Faitau – Ioane 20:24-29

Matua – ff.27, 29: “Ona fetalai atu lea o ia ia Toma, “Au mai ia lou tamatamai lima.... ma tu’u mai i lo’u itu; ‘aua foi e te masalo vale, a ia e fa’atuatua’.....Ua fetalai atu Iesu ia te ia, “Toma e, ua e fa’atuatua, auā ua e vaai mai ia te au. Amuia o e lē vaai mai, a e fa’atuatua mai pea.”

E fa’alagolago le talitonuga o le tagata i fa’amaumuga tusitusia ua uma ona fa’amaonia, aemaise le va’ai o mata ma le fa’alogo o taliga. Ae o le molimau a Eperu, “O le fa’atuatua o le fa’alagolago lea i mea ua fa’amoemoe i ai; o le mautinoa lea o mea ua le vaai.” E faigatā i le tagata ona talitonu i le toetu o Iesu auā ua masani tagata i le potu a’oa’oina, faimai e le mafai ona toe ola mai se tagata ua oti. E tali fa’apena Toma, e fa’avae ana fa’aiuga i talitonuga ia masani a’i. Ua galo iā Toma le taūa o lona fa’atuatua. A’oa’o lona matai i le la’a i luma mā le mautinoa e mafaia mea uma i le fa’atuatua. E lagona le vaivai ona ua tatou masani i le fua fa’aletagata pei na afaina ai Toma, ae ua tatou iloa e silisiliese le Atua lea tatou te auauna iai. O le fa’atoilaloina la o le masalosalo ae fa’aeaina le lagona o le mautinoa, e mafai mea uma i le fa’atuatua i le Atua, pe ititi pe tele, e mafai e lē Alii ona fa’atumu avanoa. Amuia e e le vaai mai ae talitonu mai pea.

Tatalo: Le Atua e, totō i lou loto le fa’atuatua e mafai ona mafuli ai mauga, ina ia mafai e tagata uma ua le va’ai i lau afio ona faatuatua pea, **Amene.**

Aso Faraile – Fepuari 7: “Tatala atu i suiga” (*Open to change*)

Tusi Faitau – Luka 18:18-27

Matua – ff.26-27: “Afai o lea, o ai se tasi e mafai ona fa’aolaina?” Ua fetalai atu ia, “O mea e lē mafaia e tagata, e mafaia e le Atua.”

E fa’amuamua e le faipisinisi lana pisinisi mo lona lumanai. E le mafai ona tu’ua le pisinisi ona o lona fatu atoa lea ma lona ola. O le tupe poo le ‘oa o le suauu lea o loo taavale ai le lalolagi. O le vili tiga la o le mau’oa ona o le aveese o le mamalu. E Sili lava le malupuipua i le ‘oa e tele.

O le taūa o le fa’a muamua o le Atua tatou te lagona ai le pologā o tagata uma. Tatou te vaai ai ma molimau i le pagatia o tagata i aso fai soo. O lagona ia e punitiva ai le fia foi o le mau’oa. E musu e mamulu atu sina mea nei tei ane manuia se tasi. E iai foi lagona fa’a lē mauoa, o lou lava afu. E ai lava e le tagata lona lava afu. Ae finagalo le Alii, o mea ia e pala ae ave fa’amuamua i le Atua. Auā o mea e lē mafai e lē tagata e mafaia e le Atua. E mafai e lē ka mela ona ulu i le pu o le au ona leai se mea e mamafa i lona mafaufau ae fa’anoanoa ile mauoa ona ole mamafa o Lana fa’aputuga oa e tausoa. Ae ā ave le fa’amuamua i le Atua, e fa’aopoopo mea e tele, toe mautinoa le sa’o i le lagi.

Tatalo: Le Alii e, fa’amanino mai e lau afio le ala tonu e tatau ona muamua i lo’u ola, ia avea ai a’u ma au mea faigaluega, **Amene.**

Aso Toonai - Fepuari 8: “Olioli mai i puapuaga” (*Joy out of suffering*)

Tusi Faitau – Ioane 16:16-24

Matua – ff.22, 24: “*O lenei foi, ua maua nei outou e le fa’anoanoa; a e tatou te toe feiloai ma a’u, ona olioli ai lea o outou loto, e le aveeseina foi e se tasi lo outou olioli. Ua o’o mai nei lava tou te lei ole atu i se mea i lo’u igoa; ina ole atu ia, ona outou maua ai lea, ina ia atoatoa ai lo outou olioli.*”

O le ata masani, e taumafai e ola i tiga ma faigata o le soifuaga. Ae o loo fa’amanatu mai le Alii, ‘aua nei foi ai, ae a mafai ona tatou savalia puapuaga na o le olaga, e o’o atu ai i le manuia. E tigaina le tina pe’a fanau sana tama, ae a fa’alogoina le leo o le pepe, ona galo uma lea o tiga. O le fa’amanatu a Iesu i ona soo, e i ai taimi o le a uia ai ala o puapuaga, o le a fa’asatauroina ma tigaina o ia, e tanumia ma toe tu mai, mulimuli ane, o le a afio ifo le Agaga Paia.

I tua atu o ia mea tiga, o le a fa’atumauiina i latou i le olioli. O le fa’amalosi atu lea a Iesu. Soo se taimi tou te valaa atu ai i le Atua, e tali mai lava o Ia. E le mafai foi e se tasi ona aveese le olioli o le Alii mai iā te i latou. O le olioli e pupula mai i totònu o puapuaga ma ua manumalo i tiga ma faigata pei ona manumalo a’ia’i le matai o le galuega.

Tatalo: Le fa’afofoga tatalo e, fa’amautu ma fa’amanino mai i lo’u loto, o tiga mā faigata o le olaga, o le ala lea i le olioli, **Amene.**

PESE A SOLOMONA

Aso Sa - Fepuari 9: “Sogi mai ia te a’u i le sogi a ou fofoga”

Tusi Faitau – Pese a Solomona 1 (*Kiss me with the kiss of your lips*)

Matua – ff.2b-3a: “*...auā e sili ona lelei o lou alofa i le uaina. O le nanamu o ou u’u lelei ua avea ai lou suafa e pei o le u’u ua liliigiina;*”

E faigata ona talitonu e maua i le Tusi Paia se tusi o loo fa’amaumau ai ni pese/solo, o loo fa’amatala ai le ‘au alofa atu o se tamaita’i i lana manamea. E ese foi le faitau atu i le amataga o lenei tusi, ona e le o maua ai ni upu e masani ona amata ai le tele o isi tusi o le Tusi Paia. A o le tulaga tonu lea o loo i ai le tusi, “Pese a Solomona.” Ma, e tomua lava le tusi i le solo o loo fa’aleo ai mo’omo’oga a se tamaita’i e fia feiloa’i i lana manamea e ala i le sogi atu i ona fofoga!

Masalo o le mata’utia o le gagana o loo fa’aaogāina ua ala ai ona alofia lenei tusi ma seāseā fa’alogo o lauga ai nisi. Ae mo le silafia, o lenei tusi, o loo tusia mai i se va’aiga e le o toe maua i nei ona aso i le lalolagi lea tatou te ola ai: o se va’aiga i le olaga e aunoa ma ni mea leaga e tutupu ai, ae na o le fealolofa’i o le tasi i le isi. E le o iloa poo le a tonu se vaitaimi o le tala faasolopito sa atagia ai lenei va’aiga i le gasologa o le olaga. Ae manatu le tusitala, pau le taimi sa mafai ona maua ai le va’aiga lea, o le fa’atoaga i Etena, a o lei pa’ū le uluai tagata i le agasala. O Etena sa maua ai le ituaiga alofa e mamā ma lē ilā, i le va o le tasi i le isi, aemaise i le va o le tane ma le fafine. Ae ua leiloa atu le alofa lea ina ua pa’ū le ulua’i tagata i le agasala. O le ituaiga alofa lea ua toe lagalaga mai e le tusitala o le Pese a Solomona se’i fa’atepa ai lona nu’u o Isaraelu, auā o le alofa tonu lea e tatau ona fa’atino e Isaraelu, i lana feagaiga ma le Atua.

Ua tuana’i atu le tafeaga i Papelonia, ma ua nofo malamalama nei Isaraelu, ua mafua le tafeaga, ona o le to’asa lea a le Atua i le lē fa’amaoni o Isaraelu i le tausiga o le feagaiga na latou osia. E a le Atua sa fa’amaoni i lana pito laau i taimi

uma, ae sa le fa'apeaina Isaraelu i lona tali atu. O le mea lea na ala ai ona toilalo ma fa'atafea ai le nu'u i Papeleonia.

Ae ina ua a'e le tafeaga ma foi i Ieruselema, na amata ai loa ona tu'u fesili le nu'u: "*Afai na mafua le tafeaga ona o le lē tausia o le feagaiga, o le a se mea e mafai ona tatou faia, ina ia 'aua ai ne'i toe pa'u mai le to'asa o le Atua?*" O le tali a le tusitala a le Pese a Solomona – e tatau ia Isaraelu ona alofa fa'amaoni i le Atua. E pei ona fa'amaoni le alofa o le Atua ia Isaraelu i taimi uma, e tatau foi ona fa'amaoni le alofa o Isaraelu i le Atua. Ae le o le alofa foi lea sa masani ai Isaraelu i le tuana'i – e alofa nei, ae toe fultitua taeao, e leai.

A o le ituaiga alofa lea e mana'omia e Isaraelu ona fa'atino i lana feagaiga ma le Atua: o le alofa e mamā ma lē ilā. O le alofa e lē pisia. O le mea lea ua ala ai ona fa'apea le gagana o le tusi, ma fa'aaogā mai ai ata e masani ai le va fa'aulugalii ma va faigāuo. Auā e pau lea o le gagana, fa'atasi ai ma ata, e malamalama ai le ituaiga alofa lea e tatau ia Isaraelu ona fa'atino i lana feagaiga ma le Atua – o le alofa e pa'ia, o le alofa e naunauta'i, e feuluuluta'i, e pei o le alofa i le va o le ulugalii, poo le alofa fa'ale-uo, i le va o se tamaita'i ma lana manamea.

I lenei vaiaso, o le a fa'ateia lau faitau i le gagana ma ata o le a aumai e lenei tusi. Ae 'aua ne'i galo ai le feau ta'ua o loo taoto i tua atu o ia ata ma lea ituaiga gagana: o le tali atu lea o Isaraelu i le Atua i le fa'atinoga o lana pito laau tauave o le feagaiga – o le alofa atu i le Atua i le alofa e mamā ma lē ilā.

Tatalo: Le Atua e, a'oa'o mai ina iā matou iloa le alofa moni o lau afio i ou tagata ma lau foafoaga atoa, **Amene.**

Aso Gafua – Fepuari 10: “E rosa i so'o se ta'u” (*A rose by any name*)

Tusi Faitau – Pese a Solomona 2

Matua – f.7: “... *tou te le tātātuli i la'u pele, seia faitalia o ia.*”

Ua fa'aioa mai e le tamaita'i, o ia ua na o se fugalaau mai i le tele o fugalaau i le vao. A o le taga'i mai o lana manamea, e leai, o le tama' o le fugalaau e tu ese mai lava i isi. Poo le a lava le ta'u e ta'u ai, o le rosa lava ia o le rosa. A o le maimoaina o le lalelei o se mea, e i le va'ai a le tagata o loo maimoa.

A tupu le alofa i se faigāuo, e lagona i tino lona pa'i mai. E pei e lele i luga o le 'ea le lagona e o'o mai. Ua valea le tamaita'i i lona alofa i lana manamea. O le valea e faigata ona fofoina pe togafitia. Pau le mea, afai ua o'o i taimi o le alofa, tu'u le avanoa i le alofa e fuga mai ai. Ae afai e lē o le taimi lea o le alofa, e pei o upu a le matua, ...“*tou te le tātātuli i la'u pele, seia faitalia o ia.*” Faitalia le alofa; e fuga mai i lona lava taimi. Ae 'aua le faamallosia pe fa'anatinatia.

Afai o e fa'atalitali, fa'aaogā le taimi e fofu ai nisi fa'aletonu e ono fa'alavelave i le taimi e fuga mai ai le alofa; pei o ni fa'afitauli i totonu o le mafutaga. Auā a le fofoina i le taimi nei, e mafai ona toe tigaina ai le mafutaga i se taimi o i luma. Ina ia tupu olaola se mafutaga e fuga mai ai le alofa, e tatau i itu uma e lua ona galulue fa'atasi e atia'e le mafutaga. Auā a lelei ona atia'e, ona fuga mai lea o le alofa i lona taimi e tatau ai.

Tatalo: Le Alii e, foai mo i matou le onosai e mafai ona matou talitalia ai le taimi sa'o ma le taimi tatau, e pei ona e finagalo ai, **Amene.**

Aso Lua – Fepuari 11: “Mafauauga o le po” (*Night fantasy*)

Tusi Faitau – Pese a Solomona 3

Matua: f.2: “... ou te sailiili ai i lē ua manao i ai lo’u loto;”

E le o mautinoa i fuaitau ia poo miti le tamaita’i, poo fa’asolosolo ni ona mafauauga i le po. I lona naunau e fia fusifusi ma lana manamea, ua fai le miti a le tamaita’i ua ia saili atu i lana manamea i le ‘auala pogisa, a o tele mailei e ono lamatia ai lona ola. Ae ina ua maua lana manamea, ua fusi mau ia te ia ma ua musu e toe fa’amumūlu atu. O faiga masani ia o le alofa fa’a-faigāuo. Tatou te le popole i ni mea e ono lamatia ai i tatou, ae naunau lava e saili lē ua alofa i ai.

O le vaega mulimuli o le mataupu o loo fa’amatalaina ai le fa’aipoipoga a le tupu o Solomona. O se faaipoipoga mamalu ma taualoaina; sa maimoa ai foi le lalolagi atoa. O mafauauga a le tamaita’i, ia pei lana fa’aipoipoga ma lana manamea o le fa’aipoipoga a Solomona, e molimau mai ai le lalolagi atoa i le ta’utinoga o le alofa o le a faia.

Tatalo: Le Alii e, leoleo o matou loto ina ia mafaia ona matou faia fa’aiuga e viia ai lau afio, **Amene.**

Aso Lulu – Fepuari 12: “O le tino o le Alofa” (*Anatomy of Love*)

Tusi Faitau – Pese a Solomona 4

Matua – f.12: “O lo’u tuafafine, o la’u avā, o le fa’atoaga ua puipuia o ia; o le vaipuna ua puipuia; o le punāvai ua fa’amaufa’ailogaina.”

I se mafutaga fa’alēuo, e masani ona fa’atalasua le tasi i le isi. Ae masani foi ona fa’aviivii le isi i le isi. O faiga ia e masani ai le alofa. O le ata lea o le fuaiupu muamua e o’o atu i le 7 – o le faaviivii o le manamea i le tama’itai, faimai “...ua sao lou lalelei, e leai lava se pona ia te oe.” Ua vala’au le manamea i le tamaita’i e sau i lalo mai lona nofoaga maualuga (f.8). O le lalelei o le tamaita’i, ua vave ai le tātā o lona fatu.

O le auivi o le alofa pei ona ta’ua e lē pese, o se fa’ataotoga ese foi. Ua fa’atusa le tamaita’i i se fa’atoaga ua malu puipuia ma leoleo lelei. E leoleo aisea? Ona o le penina tautele; o le vaipuna ua uma ona fa’amau failogaina. E alu uma i ai lona malosi e galuea’ina lea fa’atoaga ma teuteu lelei, e fatalitāli mo lona fua mai. O le onosa’i le mea taūa, ina ia fua mai le alofa.

Tatalo: Tama e, fa’amautuina pea le alofa i totonu o mafutaga o loo matou auai ai, ma ia e fesoasoani i a matou fa’aiuga fai, **Amene.**

Aso Tofi – Fepuari 13: “To’esea ma le ‘au fa’atasi” (*Absence and presence*)

Tusi Faitau – Pese a Solomona 5

Matua – f.16b: “Tama fafine a Ierusalem e, o lo’u manamea lava lea, o la’u uo foi lea.”

I le faamatalaga lona lua o lana miti, ua tautala le tamaita’i i le mea e sili ona popole ai lona loto: ne’i leiloa atu lana manamea. O le manatu lea o loo fa’amatala i le mataupu e 5 sa faitauina. E alafa’i mai le tamaita’i e tali lana manamea o loo tuitui i le faitoto’a, ae tatata atu, ua leai se isi. Ua alu le po atoa o saili, ae le maua. Ua maua e leoleo o le ‘aai le tamaita’i, ma fasi ia te ia. Ua

faatagisia le fesoasoani mai o tama fafine a Ierusalemā i le sailiga. Ina ua fesili tama fafine pe aisea e tataua ona latou fesoasoani ai, ua tali le tamaita'i i upu e fa'avii ai lana manamea (ff10-16), "*O la'u manamea e 'aulelei ma malosī, e silisili ese o ia i le to'atele...*"

I so'o se mafutaga, e i ai taimi e feeseesea'i ai. O taimi ua sauni le taule'ale'a, ae ua le sauni le tamaita'i. O taimi ua sauni le tamaita'i, ae saili ane le taule'alea, ua leai. O tulaga masani ia o soo se mafutaga – o taimi ua 'au faatasi, o taimi ua to'esea. A o le to'esea, e mafai ona gaua'i ai le loto ona o le alofa.

Tatalo: Le Atua e, alofagia mafutaga eseese, i ni mea o loo le maua ai se 'au tasi, ae ia avea ia fa'afitauli e fa'amalosia ai le mautu o mafutaga, **Amene.**

Aso Faraile – Fepuari 14: “Gaioga fa'a-Solo” (*Poetry in motion*)

Tusi Faitau – Pese a Solomona 6:1-7:7

Matua – Pese Solomona 7:10: "*Ua fai a'u mo lo'u manamea, ua ua'i mai foi lona mana o ia te a'u.*"

I le mataupu e 6, ua fa'aogāina e le manamea le gagana fa'afitafita e fa'amatala ai le tamaita'i. E le o se faiga fou lea i atunu'u i Sasa'e Tutotonu, auā o atua faapaupau e feagai ma faigataua i ia atunu'u, o fafine. E le gata la ua fa'aogaina le gagana lea e fa'amatala ai le tamaita'i ma lona malosī, ae faapea lona lalelei – e maofa ma ofoofogia i le va'ai. E fa'auau pea le fa'amatalaina o le lalelei o le tamaita'i i le mataupu e 7. E amata i ona vae ma seevae. Ua le iloa e le manamea ona gagana i le lalelei o le tamaita'i i le seeina o ona seevae. Faai'u le faamatalaga i le ao o le tamaita'i ma le sasa'o o lona lauulu. Faimai o le lauulu ua tosina ai tupu o isi atunu'u i lona lalelei ma lona matagofie. E le o se mea leaga le fa'avii i le lalelei. I le silafaga a le Atua, o le lalelei o se mea e lelei tele. Ae ua leaga le lalelei ona o le tagata; ua nofo ma fa'a-tapu.

Tatalo: Le Alii e, fa'atumu i matou i lou agaga ina ia matou tauivi ai pea ma galulue pea e fa'atino lou finagalo, **Amene.**

Aso Toonai – Fepuari 15: “Malosi e pei o le oti” (*Strong as death*)

Tusi Faitau – Pese a Solomona 8

Matua – f.6: "*Ia tu'uina a'u i lou loto e fa'apei o se fa'amaufa'ailoga...auā ua malosī le alofa pei o le oti; ua fa'auluulumamau le tu'inau fa'apei o le tu'ugamau; o lona mumū, o le mumū lea o le afi mu saesae.*"

O le mataupu mulimuli o le tusi e maua ai fa'aupuga e fa'atatau i le alofa e sili ona mamalu. E tele nisi ua lauga i fa'aipoipoga e fa'aogāina ia le fuiupu 6 ma le 7 e fai ma matua. Ua naunau le tamaita'i e fa'amau-faailoga o ia i le fatu o lana manamea e fai ma fa'ailoga o le la mafutaga e le uma. E pei o le oti – le malosī e le mafai ona tete'eina – e fa'apena le alofa... "*ua fa'auluulumamau le tu'inau faapei o le tu'ugamau.*" E mumū ma tau fa'aleaga le alofa pe a le lelei ona pulea. O le alofa e pei o le afi e mūsaesae, e le mafai e vai e tele ona tineia.

I le mataupu e 8, o loo leoleo le 'au uso i le tamaita'i, ma ua la puipui ia te ia e pei ona puipui le tuagane i lona tuafafine. A o le augani a le tamaita'i, e pule

lava ia poo ai na te alofa i ai. O lona tino, na o ia lava e pule ai. E pule foi le tamaita'i poo ai e foa'i ai. O le alofa moni, e iloa onosa'i ma fa'atalitali.

Tatalo: Le Atua e, fesoasoani mai ia matou iloa ma malamalama i le alofa, ina ia matou alolofa moni ai i e ua manaomia le fesoasoani, **Amene.**

1 & 2 PETERU

1 – O Tagata Ese i le Lalolagi

Aso Sa – Fepuari 16: “A fultua le lalolagi ia te oe”

Tusi Faitau – 1 Peteru 1:1-16 (*When the world turns against you*)

Matua – ff.6-7: “O lea ua outou olioli ai, e ui lava ona fa'anoanoa o outou i nai aso nei, i tofotofoga eseese. O le tofotofoga foi o lo outou fa'atuatua, e silsili ona aoga i le auro e fa'aumatia, e ui lava ina tofotofoina i le afi, e avea ma mea e iu ai i le viiga, ma le mamalu, ma le manuia pe a fa'aalia mai Iesu Keriso.”

I taimi o mafatiaga, e masani ona fa'alogoia upu fa'alaei'au e fa'apea: “Malo le onosai ma le loto tele. Ae silasila oe, e tutupu mea uma i fuafuaga a le Atua.” E taofi eseese lagona o tagata pe a fa'alogoia upu fa'apea. O isi tagata, aemaise ē ua matua'i tau i ivi le tiga o mafatiaga o loo feagai ai, na te le taliaina ni fa'aupuga fa'apea, ona e peiseai o ni upu e le o manatu mamafa i tiga o loo feagai ai, aemaise lava, e peiseai ua tu'ua'i le Atua, o ia o le pogai. A o isi tagata, e talia lelei ma ua lagona foi le mafanafana o ia upu, auā o loo aumaia ai le manatu, e pule aoao le Atua i mea uma, ma o mea faigata uma e i'u i le lelei.

O le tusi muamua a Peteru sa tusi aga'i Ekalesia eseese i Asia Itiiti sa latou iloa tino le uiga o le mafatia, a o faatalitali le taimi e sauaina ai tagata Kerisiano i lenei 'aai. O loo apoapoa'i le tusi ina ia latou talia tiga o le a o'o mai, auā e aogā e tofotofoga, fa'aילו, ma fa'amalosia ai lo latou faatuatua ia Iesu Keriso.

Tatalo: Le Alii e, fa'atumu i matou i lou agaga ina ia mafai ona matou tauivi e fa'atino lou finagalo i lenei lalolagi faigata e tete e lau afio, **Amene.**

President's Day (Amerika)

Aso Gafua – Fepuari 17: “Tagata o le Atua i fafo atu” (*Gods people abroad*)

Tusi Faitau – 1 Peteru 1:22-2:10

Matua – ff.9-10a: “A o outou o le tupulaga ua filifilia outou, o tupu ma ositaulaga, o le nu'u paia, ma le nu'u na fa'atauina mai e le Atua ina ia outou ta'uta'u atu ana galuega lelei – o le na valaau ia te outou nai le pouliuli e o'o i lona lava malamalama e matuā ofo ai; o e na le fai ma nu'u anamua, a o ona po nei, ua fai ai ma nu'u o le Atua.”

So'o se tagata Samoa e aumau i Amerika, e i ai lava taimi e momoo ai e toe fia foi i Samoa. A leai, ua valaau i ona aiga i Samoa e faae'e mai ni fa'amomoli: poo se umu, poo ni apa pisupo, wahoo, poo ni 'ie lavalava foi. O le naunau o le Samoa i ia mea, e le ona ua misia le atunu'u, ae ona o lona ta'u (*identity*) – o ia o le Samoa, ma e fia maua ni mea e patino ia Samoa ina ia manatua ai, a o aumau ma nofo ai i le atunu'u ese.

Ae le na o tagata Samoa e tupu ai lenei lagona. O le naunau masani lava lea i soo tagata ua siitia mai i le atunu'u sa ola mai ai, ae nofo i se isi atunu'u ese. E naunau lava ina ia maua ni mea e manatua ai le atunu'u sa ola mai ai – e fia manatua lona ta'u – i totonu o le atunu'u fou lea o le fa'atagata 'esea ai nei. E fa'apea foi lagona o tagata ua sauāina, ina ua avea lo latou sauāina ma mea ua manatu ai, o i latou o tagata ese, e i fafo atu ma le li'o o tagata lautele.

O le amataga o le tusi muamua a Peteru o loo ta'ua ai, o le tusi lenei o loo tusia aga'i i le 'au Kerisiano *"ta'apeapeina."* E le o le ta'apeape e pei ua salalau solo ma ua leai ni mea e nonofo ai. A o le ta'apeape i la le fa'atuatua ia Iesu. O lona uiga, ua tagata 'esea i latou, ona o lo latou fa'atuatua ia Iesu, ma o le mea lea, ua ala ai ona sauaina i latou.

Tatalo: Le Alii e, fesoasoani mai ina iā 'aua nei o matou fa'ailoga tagata la matou fa'asoa I lau fa'aolataga, **Amene.**

Aso Lua – Fepuari 18: “Tulafono o le lauelele, ma tulafono a le Atua”

Tusi Faitau – 1 Peteru 2:13–3:7 (*The law of the land, the law of God*)

Matua – ff.15-17: *“Auā ua finagalo le Atua ina ia outou amio lelei, ia iu ai ina fa'alologo le valea o tagata pouliuli; pei o e sa'oloto, a e 'aua nei fai le saolotoga ma ufiufi o le loto leaga, a ia fa'apei o auaua a le Atua. Ia outou ava i tagata uma; ia alolofa atu i le au uso; ia matatau i le Atua; ia ava i le tupu.”*

Soo se atunu'u lava, e i ai ona tulafono ma aiaiga ua uma ona fa'ataoto e tatau ona soifua ai ona tagata-nu'u, mo le manuia ma le ola filemu o le lautele o le atunu'u. Mo tagata 'ese e fai mai, e tatau foi ona latou talia ia tulafono ma aiaiga ua uma ona fa'ataoto, ina ia mafai ona latou nonofo ai ma aumau ai i totonu o le atunu'u. Ae le gata i lea, o tagata 'ese foi e fai mai, o le a latou omai ma ni va'aiga e 'ese mai i le va'aiga masani o tagata o le atunu'u, e lelei lea e fa'alauatele ma fa'atamāoaiga atili ai le atunu'u lea o le a latou aumau ai.

E fa'apea le 'au Kerisiano o loo tusi atu ai le tusi muamua a Peteru. O tagata ua *“fa'ataapeapeina;”* ua nonofo fa'a-tagata 'esea i le lalolagi, auā o lo latou nu'u moni, o le lagi lea. O lo latou va'aiga fa'ale-lagi, poo le va'aiga fa'ale-fa'atuatua, o le a fa'alauatele ma fa'atamāoaigaina ai le lalolagi lea ua latou aumau ai nei.

Peita'i, afai o i latou o tagata 'ese e fai mai i le lalolagi, o ai le tulafono e ao ona latou mulimuli ai? O tulafono o le lalolagi lea ua latou aumau ai nei? Poo tulafono a le Atua, e ou le lagi – lo nu'u moni o le tagata Kerisiano? E le faigofie. E i ai taimi o le a avea ai lo tatou usita'ia o tulafono fa'ale-lalolagi, e fai ma mea tatou te solia ai tulafono fa'ale-lagi. O sa'o lea mea?

Tatalo: Tatalo mo i latou ua avea ma ta'ita'i, o le au fai tulafono, o i latou o loo ta'ua o pule i totonu o soo se vaega, ia e fesoasoani ia i latou, **Amene.**

Aso Lulu – Fepuari 19: “(E le) lafoina i leona: ta'iala e ola ai” [(Not) getting...

Tusi Faitau – 1 Peteru 3:8-22*thrown to the lions: a survival guide]*

Matua – ff.15-16a: *“A ia paia le Alii le Atua i o outou loto. Ia saunia pea lava outou e tali atu ma le agamalu ma le ava ia i latou uma o e fesili mai ia te outou i le uiga o le fa'amoemoe o loo ia te outou.”*

A o’o ina feteena’i le olaga fa’a-Kerisiano ma tulafono o le atunu’u o loo aumau ai le tagata Kerisiano, e mafua aisea? Fa’amata o le talitonuga fa’a-Kerisiano, poo amioga fa’a-Kerisiano e fa’avae mai i ia talitonuga? O le a tonu le mea e ta’u o le faatuatuaga moni fa’a-Kerisiano? E le faigofie lenei mataupu. Ae e i ai nai manatu mai i le tusi muamua a Peteru e maua ai se fesoasoani.

O le apoapoa’iga a le Aposetolo i le ‘au Kerisiano sauaina i Asia Itiiti, e sili ona fulitua mai i amioga e ono fa’asalaina ai i latou e tusa ai ma tulafono o le atunu’u o loo latou aumau ai. Ae afai e sauaina pea, ia sauaina ona o le mea tonu ma le mea sa’o, e pei foi ona sauaina ai Iesu. Aisea o le a sauaina ai fua se tasi ona o lona fa’atuatua e tupu mai ai le amio lelei, ae le o le amio leaga? O fea se atunu’u na te fa’asalaina se tagata ona o le amio lelei?

O le valaau ina ia fai le amiolelei, e le faapea o se taumafaiga e alo ese ai mai le faia o le mea sa’o, e leai. A o le mea e sili ona ta’ua, ia fa’aali atu lou amiolelei e maimoa mai ai isi tagata, latou te tosina ai ma fa’apea mai: “E faapefea ona amiolelei pea lenei tagata, e ui ona agaleagaina?” Ioe, o le ‘auala lea e lelei mai ai tagata i le Tala Lelei, ona o le fa’aali atu o le amio lelei o le Kerisiano, e ui o loo sauaina ma agaleaga mai e tagata.

Tatalo: Le Alii e, fafagu mai i matou ma fa’amalosi mai lo matou ola fa’aleagaga, ina ia mafai ona matou amiolelei pea i ui i le agaleaga mai o isi, **Amene.**

Aso Tofi – Fepuari 20: “Ufiufi agasala e tele” (*Covering the multitude of sins*)

Tusi Faitau – 1 Peteru 4:1-11

Matua – f.11: *“Afai e tautala se tasi, ia tusa ma afioga a le Atua; afai e auauna se tasi, ia tusa ma le malosi ua foaiina mai e le Atua, ina ia viia le Atua i mea uma lava, ona o Iesu Keriso; ia ia te ia le viiga ma le mana e fa’avavau lava. Amene.”*

O le a le agasala? O a amio e iloa ai ua agasala le tagata? O le fa’amatalaina o le uiga o le agasala ma amioga a le tagata e iloa ai ua agasala, o se fa’afitauli lea ua leva ona feagai ma le Ekalesia mai lava i le amataga. Sa tu’u fesililili foi le ‘au Kerisiano sa tusi atu ai le Aposetolo o Peteru i lea lava mataupu. Talu ai o tagata e fou i le fa’a-Kerisiano, e le taumate sa latou fia iloa foi poo a tonu amio e tala feagai ma le fa’a-Kerisiano, a’o a foi amio e agasala, e tatau ona latou ‘alo ese ai.

O se fa’aoosoga tele le taumafai e faia se lisi e fa’aailoa ai amio e “lelei,” ma le amio e “leaga.” Ae peita’i, o se lisi e fa’apea e mana’omia i nei ona aso, ina ia matua manino ma malamalama lelei le Kerisiano i le amio e tatau ona faia, ma le amio e tatau ona le faia. E le o manino foi le tusi faitau i lea tulaga, ae na o fautuaga faalaua’itele o loo aumai ai – *“ia fa’autauta...ma ia mataala outou i le tatalo (f.7), ia maua e outou le alofa nautau o le tasi i le tasi (f.8)...ia auauna le tasi i le tasi...e pei o auauna pule lelei a le alofa tunoa uiga eseese o le Atua (f.10).*

E ui na leai se lisi, a o se mea lelei foi lea pe a va’aiva’ai mai ai i se isi itu. Auā o le tulaga ua mafai ona tatou iloa e ala mai i le tusi faitau, e le fa’amasinoina i tatou e le Atua i luga o se lisi o amio e lelei ma amio e leaga, e leai. Ae ua vala’auina i tatou e le Atua ina ia tatou tali atu i lona alofa ua fa’aalia mai, e ala i le alofa atu i isi tagata. E moni ai le autu o lenei aso: *“auā o le alofa e ufiufi ai agasala e tele” (f.8).*

Tatalo: Le Atua e, a'oa'o mai ina ia mafai ona matou ofoina atoatoa o matou tagata e auauna atu ma folafola lau Upu, e ala i le alofa atu i isi, **Amene.**

Aso Faraile - Fepuari 21: “A valaau mai tiute, poo lamatiaga...”

Tusi Faitau – 1 Peteru 4:12-19 (*When duty calls, or danger ...*)

Matua – ff.12-13: “*Le au pele e, ‘aua tou te ofo i le tofotofoga pei o le afi, ua o’o ia te outou e fai ma tofotofoga ia te outou, peiseai o se mea fou ua o’o ia te outou; ae fa’apei ona tofusia o outou fa’atasi i tiga o Keriso, ia outou olioli ai, ina ia fiafia outou ma le olioli tele pe a fa’aalia mai lona mamalu.*”

O puapuaga ma faigata na o’o i ai le ‘au paia i le tala’iina o le Tala Lelei i Asia Ititi, sa le faigofie. E le o se mea fou foi lea pe a tatou taga’i i le tala fa’asolopito a le Ekalesia. E to’atele le ‘au Kerisiano sa avea lo latou fa’atuatua ia Iesu, ma lo latou ofoina atu ia te ia i le faia o le amiotonu ma le fa’aali atu o le alofa – sa avea ia mea ma ala na sauaina ai. O le tetee atu i le pule sau o isi, ma le tautala atu i le lautele o tagata i mea ua fa’aletonu ai faigamalo ma le ‘au fai pisinisi, e mafai ona avea ma mea e lamatia ai lou soifua. E i ai taimi e inosia ai i tatou. E i ai foi taimi e mafai ona fale puipui ai.

Peita’i, i totonu o leni *tofotofoga pei o le afi*, o loo tu ai Keriso, o lē na silafia le taugata o le tau o le a totagi e le tagata e fia avea ma ona so’o. A o lona alofa mo i tatou na ia lavatia ai le satauro, ma avatu ai i tatou ma e uma ua sauaina ona o lona suafa, i ‘aao agalelei o le Atua.

Tatalo: Le Alii e, aumai le malosi e auauna ai i lau afio e aunoa ma le naunau i se tau, **Amene.**

Aso Toonai – Fepuari 22: “Avea ma totino o le Mafutaga a le ‘Au Paia”

Tusi Faitau – 1 Peteru 5:1-13 (*Belonging to the Communion of Saints*)

Matua – ff.9, 12: “*[Ia] mausali outou i le fa’atuatua, ina ua outou iloa o loo oono lo outou au uso o i le lalolagi i ia lava mea tiga. O Suliano, o lo’u taofi o le uso fa’amaoni o ia, ua ou tusi ai nai upu itiiti ia te outou, e apoapoai atu ma ta’utino atu ai, o le alofa tunoa moni leni o le Atua....”*”

Sa amata leni tusi i le fa’ailoa atu o e sa tusia ai le tusi: o le ‘au Kerisiano “fa’ataapepeina.” A o lea ua faai’u i le tusi, ua fa’amamafa le tutu fa’atasi ma le nonofo fa’atasi o le ‘au Kerisiano, e o’o lava i ai latou e le masani. E le gata o i latou uma ua ‘auai fa’atasi ma Keriso e ala i le fa’atuatua, ae ua latou ‘auai fa’atasi foi i puapuaga, ona o lo latou fa’atuatua.

Ua tautala le tusitala i “toeaiina” o le Ekalesia, ma ua fa’ailoa atu foi o ia o le isi toeaina. Fa’aiu ana upu i alofaaga mo le ‘au uso, aemaise o Mareko ma Suliano, ua ta’ua o le “uso fa’amaoni.” O nei mea uma e atagia ai se lagona loloto o le ola mafuta ma le fesootaiga i le va o le tasi i le isi. I le tauviga ma le olioli tatou te maua e ala i lo tatou fa’atuatua ia Keriso – o tatou uso ma tuafafine ia Keriso, poo fea lava latou te i ai – atonu o le meaalofa silisili lea a le Atua ua foa’iina mai mo i tatou.

Talosaga: Tatalo mo le Ekalesia i le lalolagi, ma fa’afetaia le Atua ona o le tama-oaiga o talatu’u, o aganu’u, ma gagana eseese o loo tala’i ai le Tala Lelei.

1 & 2 PETERU
2 – Tausiga a le Atua

Aso Sa – Fepuari 23: “Manatuaga ola mo le fa’atuatua ola”

Tusi Faitau – 2 Peteru 1 (*Living memory for a living faith*)

Matua – ff.13-14a, 15: “*O lo’u manatu foi, e tatau ina ia ou fa’amalosi atu ia te outou i lo’u fa’amanatu atu i aso uma ou te i ai i lenei fale apitaga; ina ia ou iloa e vave ona tu’ueseina o lo’u nei fale apitaga, fa’apei ona fa’ailoa mai ia te au... Ou te matua taumafai foi ina ia mafaia e outou ona manatu soo i ia mea, pe a mavae lo’u alu ese i le olaga nei.*”

E ese le taūa o le fa’amaumauina o tala o le tuana’i, aemaise lava tala o aiga. E aogā tele lea mo tupulaga o le taimi nei ina ia latou iloa tua’ā sa latou tupuga mai ai. A o le popolega tele, a le o fa’atasi tala fa’amaumauina ma se manatuaga ola o ia tua’ā, e faigata i tupulaga i nei ona aso ona savalia ala o aiga, e pei ona fa’ataoto mai anamua e tua’ā ua taoto mai i tia.

Fa’amamafa e le tusi faitau o lenei Aso Sa le taūa o le molimau va’aia ma le manatuaina o le augatupulaga o Kerisiano ua amata ona mavae atu i le taimi sa tusia ai le tusi lona lua lea a le Aposetolo. Apoapoa’i le tusi faitau i le ‘au Kerisiano ia tumau i le fa’atuatua. E le o se fa’atuatua na fafau mai i ni tala fatu poo ni tala fa’atupu. A o le fa’atuatua e fa’avae i luga o manatuaga sa fefaasoa’i, le poto masani sa olaina fa’atasi, ma tala sa tu’utu’u gutu ma tu’utu’u lima mai e augatupulaga o Kerisiano sa latou asaina le gasū o le taeao.

A leai se manatuaga ola o o tatou tua’ā, e faigata i tupulaga i nei ona aso ona iloa moni tala fa’amaumau o aiga. Ae ui i lea, e mafai ona tatou iloa moni Iesu, e ala i le manatuaga ola o loo molimau mai ai le Tusi Paia, aemaise lava le ‘au faievagelia o le Feagaiga Fou.

Tatalo: Sei e fesoasoani mai ina mafai ona matou fa’asoa atu upu lelei o le tuana’i, e fai ma upu lelei e ola ai tagata uma i le taimi nei, **Amene.**

Aso Gafua – Fepuari 24: “O se lapataiga mai le tuana’i”

Tusi Faitau – 2 Peteru 2 (*A warning from history*)

Matua – f.1: “*Sa i ai foi i le nu’u o perofeta pepelo, e pei ona i ai ia te outou, o a’oa’o pepelo, latou te fa’atupuina fa’alilolilo o vaevaega e fano ai, ma latou fa’afiti i le Alii na ia fa’atau mai ia te i latou o i latou lava e o’o mai ai ia i latou le malaia e vave mai lava.*”

O le muāgagana a se tasi tagata atamai e fa’apea, “O ē le manatua mea sa tutupu i le tuana’i, e i’u na toe faia lava e i latou.” E fa’apena se ata o loo afifi mai ai le feau a le tusi faitau o lenei aso. Tautala le tusitala i mea sa tutupu i le tuana’i, o lea foi ua tula’i mai i lo latou vaiitaimi. O lapataiga ma manumanuga o Peteru i le ‘au Kerisiano ona o perofeta ma a’oa’o pepelo ua aga’i mai. Faimai e fai i latou ma tagata tau fa’asesē e fano ai le toatele e mulimuli ia te i latou.

Ua toe fa’atepa ai le ‘au Kerisiano i le tala ia Noa ma Lota i le faigata o tagata ma le mulimuli tauaso i o latou tuinanauga. Na latou fa’aloga ma vaai i le leaga o perofeta pepelo ma a latou ‘auala e fa’atosina ma o’o atu ai tagata i le malaia, ae mulimuli lava i ai ona o le tuinanau ua suamalie fa’aniu aati. Ae o se mea sili ona

leaga o toe upu a Peteru i lenei mataupu, o le le amanaia o fa'aילו ma fautuaga i perofeta pepelo.

Tatalo: Le Atua e, fa'apupula o matou mata fa'ale agaga ina matou iloa ona fa'afetai'ai o matou fili ma manumalo ai, **Amene.**

Aso Lua - Fepuari 25: “Fa’amasinoga, fa’amasinoga tonu, alofa mutimutivale, alofa tunoa” (*Judgement, justice, mercy and grace*)

Tusi Faitau – 2 Peteru 3

Matua – ff.8b-9: “... o le afe foi o tausaga e tusa ma le aso e tasi. E le fa'atuai mai le Alii i le mea na folafolaina mai, fa'apei o le manatu a isi tagata i le fa'atuai; ae peitai ua onosai mai lava o ia ia te outou, ona ua le finagalo ia fano se tasi, a ia o'o uma lava i le salamo.”

O le fa'amasinoga ma le to'asa o le tagata, e fa'avae i fa'aiuga ua fa'anatinati ona fai ona o le naunau e fa'amalie lagona o tagata o loo mafatia. Ae e le fa'apea le Atua. E tutusa i le Atua le aso e tasi ma tausaga e afe poo le afe o tausaga ma le aso e tasi. O le onosa'i o le tagata e fa'avae i mau tauave ma mea e va'ai i gasologa o aso fai so'o. A o le Atua, e fua mea uma i le tunoa o lona alofa. E fa'atelegese ma tu'u avanoa i le tagata ina ia salamō ai. E i ai le aso ma le taimi o lana fa'amasinoga, ae tu'u avanoa lava mo le tagata ia maua lona avanoa i le ola e fa'avavau. E taumafai le fili ma le tiapolo e tau fa'asesē tagata, e lē o'o se malaia i le laolagi, ma e le toe tutū mai augā tamā ua maliliu, ae ua fa'amautu mai e le aporetolo o Peteru e i ai lava le taimi e taunu'u ai le to'asā o le Atua.

Tatalo: Le Alii e, totō i o matou tagata le malosi e tutumau ai i lau afio i taimi o faigata ma fa'afitauli seia o'o i le gata'aga, **Amene.**

O TIUTE TAUAVE TATOU TE FA'ASOA FA'ATASI AI

1 – Amataga Fou

Aso Lulu Lefulefu – Amata le vaitau o le Leni

Aso Lulu – Fepuari 26: “O le tosina a le pule” (*Power's allure*)

Tusi Faitau – Mataio 4:1-11

Matua – f.11: “Ona tu'ua ai lea e ia o le tiapolo, fa'auta foi, ua o mai agelu ma auauma mai ia te ia.”

I nei ona aso ma le gasologa ua i ai nei le soifuaga, e tosina gofie tagata i tofiga e maua ai le tamāoaiga, aemaise le pule. O le u'umia o le pule e ala i tofiga, e peisea'i ua fai ma vai suamalie e galala i ai le tagata; e fusi lima lua pe a o'o mai. A i ai ni fa'aletonu e ono afaina ai le pule a le tagata, na te naunau lava ia faia se mea e taofi mau ai, e tusa lava poo se mea e le talafeagai. O le pule o se mea lelei. E manaomia le pule e fa'atino ai galuega fai. Ae mafua ona leaga le pule, ona o le tagata; ua pule ma le le fa'autauta. Ua manatu na o ia lava ma le mea e manuia ai, ae fa'atuatuaana'i ai le to'atele o loo fa'alagolago ma fa'amoemoe a latou galuega o loo fia fa'ataunuaina, i lana pule.

O le lu'itau lea mo le tagata Kerisiano ua uumia tofiga e i ai le pule. Auā e i ai taimi o le a feteena'i ai le fa'atinoga o le pule, ma a'oa'oga fa'a-Kerisiano. A o le lu'i foi lea mo i tatou uma, poo fea o taoto ai lo tatou fa'amuumua: e muamua le tofi ma le pule e sau fa'atasi ai, pe muamua lou fa'atuatuaga Kerisiano ma le fa'atinoina o le amiotonu ma le mea sa'o? I lenei Aso Lulu o le Lefulefu, o se fesili manaia foi lea tatou te mafaufau i ai i le amataga o lenei vaitau o le Leni, e fa'amanatuina ai le aga'i atu o le Alii o Iesu i ona puapuaga.

Tatalo: Le Atua e, fesoasoani mai ina ia matou maua le mana e pulea ai omatou loto ma mafai ai ona matou taitaiina isi i lou finagalo, **Amene.**

Aso Tofi – Fepuari 27: “O le loto mama” (*A clean heart*)

Tusi Faitau – Salamo 51:1-12

Matua – f.10: *“Le Atua e, ia e faia se loto mama mo a'u; ma ia e fa'afouina se loto mau i totonu ia te au.”*

Masalo a fesiligia se foma'i fatu poo le a tonu le mea e ta'u o le “loto mama,” na tali mai e faapea: o le loto mama o le fatu lea ua tātā lelei; e leai ni ala toto o punitia, o loo lelei foi le ga'o o le tino. Ina ia tumau pea le mama o le loto, e tatau ona lelei mea 'ai e tausami ai, ia fai le fa'amalosi tino i aso uma, ma afai e i ai se taimi e lagona ai le tiga o le fatafata, ia fa'avave ona va'aia se foma'i i le falema'i.

A o le itu fa'aleagaga, e faigata ona iloa poo le a tonu le taimi e fa'aletonu ai le fatu, ma, e faatauvaa foi lo tatou iloa o ni 'auala e togafitia ai pe a faaletonu. E moni ai le pese a le faisalamo, a fa'aletonu le loto, pau le fofu e fai ai o le suia loa, ma valaau i le Atua e fesoasoani mai, e ala i lona alofa mutimutivale. A tatou iloa ua i ai le mea ua fa'aletonu i tatou loto ma tatou valaau i le Atua, o le laasaga muamua lava lea e amata ai ona fo'ia le fa'aletonu o loo i ai.

I lenei vaitau o le Leni, o se avanoa lelei lea tatou te va'ava'ai toto'a ai i o tatou loto. A tatou 'auai fa'atasi ma Iesu i ona puapuaga, e mana'omia ai le loto mama, ina ia tatou iloa le le faigofie o le fa'aolataga na asaina e Iesu mo i tatou.

Tatalo: Le Alii e, se'i e alofa ma lia'ina ese a'a tuai o matou tagata sesē, ae toe fa'atupu se moemoe fou e viia ai lau afio, **Amene.**

Aso Faraille - Fepuari 28: “Liliu i le Atua” (*Turn to the Lord*)

Tusi Faitau – Hosea 6:1-6

Matua – f.6: *“Auā o le alofa ou te loto i ai, ae le o le taulaga; ia iloa foi le Atua e sili lea i lo'u manatu i taulaga mu.”*

E faigofie i le fa'alogu – “liliu i le Atua, ona faamagalo lea ma saunia e le Atua mea uma.” E mautinoa lava e laveaiina e le Atua ona tagata. E fa'amamaina ma fa'afouina e le Atua ona tagata ma toe aumaia i le mafutaga ma Ia, e pei ona ataata mai i le fuaiupu 1-3 i le tusi faitau o lenei aso. Peita'i, e le o ta'ua mea sa tutupu i tua atu. E le o ta'ua atua mamate sa āvaga ai le nu'u. E le o ta'ua foi poo le a le mea sa tupu ua manatu ai le nu'u e liliu i le Atua.

A o le tali a le Atua i lona nu'u, e tali ma le fa'anoanoa. Silafia e le Atua o le liliu mai o lona nu'u, e pei o le sau o le vaveao – e liliu nei ae toe mou atu taeao. E le o finagalo le Atua i ni taulaga mo agasala ma ni fa'asalalauga le togotia – ae

ia liliu o latou loto. Ia liliu o latou mafaufau ma lagona, e suia ai o latou olaga i se tulaga e fiafia ma finagalo ai le Atua.

Tatalo: Tatou ole i le Atua mo i latou o loo saili e toe fa’afou la latou feagaiga ma le Atua, **Amene.**

Aso Toonai – Fepuari 29: “Filifili i le ola” (*Choose life*)

Tusi Faitau – Teuteronome 30:15-20

Matua – f.15: “*Fa’auta mai, ua ou tu’uina atu i ou luma i le aso nei o le ola ma le manuia, o le oti foi ma le malaia;*”

O le ‘aia tatau o le tagata, e ese lona taūa. O le sa’olotoga o le tagata e fa’aali ai ona lagona ma manatunatuga o lona loto, o se ‘aia e le au maua. Ae o loo i ai foi apoapo’iga e tatau ona usita’ia, e fai ma ta’iala o le tagata. O le tusi faitau o lenei aso, o lapataiga ma fautuaga fa’atamā a Mose i lona nu’u. Ua fautuaina e Mose le nu’u ina ia tu’uese le sesē ma le vaivai sa o latou faia, ae filifili i le ALII o loo i ai le ola. O le Atua e afua mai ai manuia; o lē sa fa’atasi ma i latou mai anamua se’i o’o mai i le asō. Ae paga lea, e filifili lava le tagata e mulimuli i le agasala ma le malaia. Ae o loo fa’amalosi mai lava Teuteronome, ia filifili i le ola o loo i ai manuia. O le ola ofoina atu foi lea mo le Atua, aemaise o tagata uma.

Tatalo: Le Alii e, ia puna pea i o matou loto le agaga e filifili ai i le ola, ma ofo atu o matou tagata i ē ua manaomia se fesoasoani, **Amene.**

O TIUTE TAUAVE TATOU TE FA’ASOA FA’ATASI AI 2 – Ia Ola le Lalolagi

Aso Sa – Mati 1: “Tepa a’e i le lagi!” (*Look at the heavens!*)

Tusi Faitau – Salamo 8:1-8

Matua – ff:4, 5: “*Se a ea le tagata e te manatu mai ai ia te ia, ma le atalii o le tagata e te asiiasi mai ai ia te ia. Auā ua e fa’amaulalo teisi ane o ia i agelu, ua e fa’apaleina foi o ia i le mamalu ma le matagofie.*”

Ua aumai e le fai-Salamo le tulaga taūa o le manatu ifo lava o le tagata ia iā te ia, ma lona va ma le Atua. O le va feso’otai lea e tatau ona lagona e le tagata, pe a maimoa i le taūa o galuega mamana a le Atua o loo fa’aalia mai ai foi ma lona mamalu. O nei galuega o loo aofia ai i totonu ma le tagata, ma o iina e tatau ona talitonu ai le tagata i le tulaga ese o le Atua.

Peita’i, ua fa’amanatu mai e le fai-Salamo, e ui ona fa’aletonu pea le tagata i ana mea e fai, ae le o mafai ona vavaeseina le tagata mai le Atua ma lona agalelei. Ua aumai e le Atua mo i tatou le iloa, tatou te iloa ai lona silisili ese e ala i ana galuega mamana, ma iloa ai foi e le tagata lona fa’atauvaa. O lo tatou iloa o i tatou lava ia, o le ata manino lea, o le sili atu ona tatou iloa le Atua i lo tatou va feagai ai. Ia manino la tatou va’ai i le Atua, ma ia sili ona tatou iloa o tatou tulaga, o loo tatou auuana ma tautua ai. O lo tatou ola fa’atuatua, tatou te manino ai i le tulaga silisili ese o le Atua mai o tatou tagata.

Tatalo: Le Atua Paia e, a'oa'o mai i matou ina ia matou iloa i matou lava, e mafai ai ona iloa lou mamalu silisiliese, ma lou mafutaina o i matou, **Amene.**

Aso Gafua – Mati 2: “Olioli i le lalolagi” (*Rejoicing in the world*)

Tusi Faitau – Fa'ataoto 8:22-31

Matua – ff.22-23: “*O le Alii e ona lava a'u, o le amataga o lona ala, e muamua i ana galuega anamua. Na fa'auuina a'u mai le vavau....a o leai se lalolagi.*”

E tulaga ese le potou ma lona aoga. E le mafai foi ona lilo le tulaga ese o ana fa'atino lelei ma le 'anoa. Ua fa'amanatu mai e le tusi faitau o lenei aso, o le potou o se tasi o vaega ta'ua sa i ai i le foafoaga ina ua fa'avaeina e le Atua le lalolagi. O le potou foi ma le alofa o le Atua, sa i ai totonu o le fausiaina o le lalolagi a o lei faia le tagata. O le potou lea ua mafai ona fa'aofuina ai le tagata, ma iloa ai e le tagata ona ola lelei, ma tausii mea uma na foafoaina e le Atua.

O lo tatou iloa o le potou fa'ale-Atua, o le mafai lea ona tatou ola lelei i totonu o le lalolagi, ma avatu ni feau ta'ua mo nisi tagata o loo ola fa'atalalē i totonu o le foafoaga ma le lalolagi mamana a le Atua. E fa'amanatu mai mo i tatou, le ta'ua o le potou e iloa ai le Atua, ma manino ai i le olioli i totonu o le lalolagi.

Tatalo: Le Alii e, le Atua foafoa, matou te vivii atu ia te oe ona o le matagofie o lou vala'auina o i matou e avea ma tagata galulue e tala'i lou finagalo, **Amene.**

Aso Lua – Mati 3: “O fea sa tatou i ai?” (*Where were we?*)

Tusi Faitau – Iopu 38:1-9

Matua – ff.1, 2: “*Ona tali mai ai lea o le Alii ia Iopu mai le āfā, ua fa'apea mai. 'O ai lenei ua na fa'apouliuligia la'u pule i upu e le o i ai le potou?’*”

Ina ua uma ona tautala Iopu ma fa'asoa i ana uo, sa umi lava se taimi na le toe fa'alogi ai se leo – ae fetalai mai loa ma le Atua! Amata mai i le mataupu e 3 seia o'o atu i le mataupu e 37 o le tusi, o fetufaa'i Iopu ma ana uo e tau fa'avasega ma fa'amatala le uiga o puapuaga ma faigata sa o'o ia te ia. Ae peita'i, sa i'uvale lava lenei fetufaa'iga.

O tusitusiga a le Poto – pei o le tala ia Iopu – o tusitusiga e amata i le Atua, e autu i le Atua, ma toe fa'aiu i le Atua. O tusitusiga o loo fa'atala'ula mai i le tagata faitau ina ia opogi galuega a le Atua i o tatou olaga, mai lava i le amataga seia o'o i le fa'aiuga. E i ai taimi o le a le fa'alogoina ai se leo poo se pisa. Ae ia mautinoa, o loo fa'atasi mai pea le Atua ma i tatou.

O le mataupu e 38 e pei ua sasa'a atoa mai le ma'ema'ea o le Atua ia Iopu ma ana uo, i le sesē o a latou fetufa'aiga o loo faia. I le amataga o le tusi sa finau ai Satani, pau le mafuaaga ua ala ai ona auuina tagata i le Atua ona o le fefe i lana to'asa, faatasi ai ma faaamanuiaga a le Atua e tau ai le tagata auuina. A o lea ua manino nei ia Iopu, e auuina tagata i le Atua, ona o ia lava o le Atua. E moni lava latou te lei va'aia le Atua ma ana galuega foafoa sa faia i le amataga; latou te le o malamalama foi pe aisea e tutupu ai mea e masani ona tutupu i le soifuaga. Ae e silafia e le Atua, ma e leai se mea e tupu e le silafia e Ia.

Tatalo: Le Alii e, i le pisa ma le vevesi o le lalolagi, ia e fesoasoani mai, ina ia ou fa'alogi ia te oe, **Amene.**

Aso Lulu – Mati 4: “O le Upu ma le lalolagi” (*The Word and the world*)

Tusi Faitau – Ioane 1:1-5

Matua – f.2: “*Sa i le mataga le Upu, sa i le Atua le Upu, o le Atua foi le Upu.*”

Ua tatou iloa i lenei fuaitau, le Atua ua lotolotoi i le lalolagi fa’atasi ma tagata. O lona mafuta mai, na mafai ai ona ia tu’u matāmagaina le lalolagi i lona tulaga mautu, ma lona fa’avae mausali. O lona mana foi, ua mafai ai ona gaiou mea uma, ma ua aveva lea ma Upu e fa’aolaina ai tagata uma. Ua fa’aali mai e le Atua mea ua tatou fiafia ai, e ala mai i lana Upu, ma ua tatou iloa ai ma le mautino, o le Atua o loo lotolotoi fa’atasi ma le tagata ma le lalolagi, auā na i ai i le amataga fa’atasi ma mea uma. O le liutino tagata o le Upu a le Atua, o le fa’ailoga o le Atua ua afio mai, ma mafuta mai i ai tatou, ina ia tatou maua le ola, ma tatou manaumalo e ala i le fa’atuatua fa’amaoni.

O le Upu i totonu o le lalolagi, na mafai ai ona fa’avasega lona amataga fa’atasi ai ma le foafoaga. O le upu na fa’atino ai le ola i totonu o le soona nunumi o mea o le lalolagi. Peitai, o le Atua ma lana Upu, e lei fa’atoilaloina i le uiga fa’aleagaga o ana mea na fai, auā o le ola mo le lalolagi nunumi. O le Upu i totonu o le lalolagi, o Iesu lava lea ua i ai tatou, o loo mafuta ma i tatou e le aunoa.

Tatalo: Le Atua le Tamā, fesoasoani mai ina ia ou iloa lou mafuta mai, ma ia ou talia lou Alo o Iesu Keriso, na ia aumai lona alofa mo tagata uma, **Amene.**

Aso Tofi – Mati 5: “Tausiga a le Atua i le lalolagi” (*God’s care for the world*)

Tusi Faitau – Luka 12:22-31

Matua – f.24a: “*Ia outou mafaufau i oreva, latou te le lulu saito, latou te le selesele foi, e leai lava so latou potu oloa, a e fagaina i latou e le Atua.*”

Ua fa’amatala mai i ai tatou e lenei aso, le Atua na te tausia o tatou tagata. O le fa’atusa faigofie ua aumaia e le tusi faitau i oreva, ma ata manino o le ola fa’alagolago o mea uma i le Atua. O le ola fa’alagolago lea o mea uma, tatou te iloa ai le uiga alofa o le Atua ma lona le tu’ulafoaina o i tatou. O le fa’alagolago mautinoa, ma le fa’amoemoe i le fa’atuatua mausali, o loo saunia e le Atua mea sili ma mea lelei mo le tagata. Peita’i, e le faapea o le a saunia e le Atua mea uma ona tatou nofonofo ai lea, e leai. O le tusi faitau o lenei aso, o loo aumai ai foi ma le lu’itau: e ao ona fa’aaogā o tatou mafaufau ola ua tu’uina mai e le Atua, e tatou te fausia ai se lalolagi e lelei atoatoa mo le Atua.

Tatalo: Le Atua e, fesoasoani mai ina ia matou iloa ona ola fa’alagolago atu ia te oe, ma matou iloa ai fausia o matou olaga i lenei lalolagi, **Amene.**

Aso Tatalo o le Lalolagi - Zimbabwe

Aso Faraile – Mati 6: “La tatou tausiga mo le lalolagi” (*Our care for the world*)

Tusi Faitau – Kenese 1:26 -31

Matua – f.26a: “*Inā tatou faia ia o le tagata i lo tatou fa’atusa, ia foliga i ai tatou.*”

E lei tu’uaunoaina e le Atua le lalolagi, ua na o manu ma la’au, le lagi ma le va nimonimo, ma le fogeleele matutu. O se foafoaga e le atoa lona fa’amoemoe, pe ana leai le tagata. Peita’i, ua finagalo le Atua e faia le tagata, ma tu’uina i le lalolagi, ina ia tausia, fa’aolaola, ma atiae ai mo lona lelei. O le fa’amoemoe la

o le Atua na faia ai le tagata, ia mautu ma lelei ana fesoootaiga ma le foafoaga, ma ia tausia le lalolagi i lona ola galue ma le fa'amoemoe mo le manuia. Ia mautinoa foi e le tagata, o le fa'atusa o le Atua na faia ai o ia, ia iloa ona ola i le ola mama, ma le olaga fiafia, ma ia viia le Atua i mea uma na te faia.

O le tagata la, e lei faia o ia e nofonofo ma maimoa i le foafoaaga pei o se turisi, e leai. Ae na faia ina ia galue, ma avea o ia ma ala o le fa'ataunu'uina o le tausiga a le Atua i le foafoaga, auā o ia o le tausi mea a le Atua. O le vaega mautinoa a le tagata, ia tausia le lalolagi ma vaia lelei e ala i lona ola galue ma talai atu le alofa le mavae o le Atua i tagata.

Tatalo: Le Atua foafoa, fesoasoani mai ina ia matou iloa la matou pito laau i totonu o lau foafoaga mamana. **Amene**

Aso Toonai – Mati 7: “Se lalolagi inā matagofie!” (*What a wonderful world!*)

Tusi Faitau – Salamo 104:1-13

Matua – ff.10, 11: “*Ua aumai atu e ia vaipuna i vanu, ua tafe ia i vā o mauga. E inu ai manu uma lava o le vao, e malilie uma ai foi asini o le vao.*”

O le tasi lenei o vaega matagofie o le fa'atulagaga a le Alii e uiga i le mataupu autu: o le maua lea o ni 'auala lelei e mafai ai ona tatou iloa le sa'olotga ma fa'amanuia a le Atua i mea uma. O le vaipuna, o le Atua lea, o loo fa'asoa mai le ola, e mafai ai ona maua ai e tagata uma le manuia. Pe punitia manuia e le tagata, o le a saunia e le Atua 'auala mautu e maua ai le saolotoga e ola ai uma tagata. O le loto maulalo e maua mai i le alofa tunoa, o le vai sili lea o le ola ua i totonu o le tagata. O le fa'amoemoe i le Atua, o lona saunia foi lea o 'auala e aumai ai vaipuna i totonu o le agaga tatou te ola ai. Ua fa'amanatu mai e le fai-Salamo, o le galuega sili o le alofa o le Atua, o lona taitaiina lea oi tatou i ona manuia. O le e manao e inu lona agaga i le vaipuna o le ola, e tatau ona alu atu i le Atua i le tatalo.

Tatalo: Le Atua e, o lau Afio e fa'amatalaina le amiotonu e pei o se vaitafe, e tafe mai ma feinu ai tagata ina maua le ola, **Amene**.

O TIUTE TAUAVE TATOU TE FA'ASOA FA'ATASI AI **3 – Ia Atia'e Nu'u**

Aso Sa – Mati 8: “Alofa i ou fili” (*Love your enemies*)

Tusi Faitau – Esoto 23:1-13

Matua – ff.10-11: “*E ono tausaga e te lulu ai saito i lou fanua, ma fa'aputu mea e tutupu ai, a o le tausaga e fitu e te tu'u ia ma ia tu'u ai pea lava, ina ia aai ai o ē matitiva i lou nu'u, o mea foi e totoe ia te i latou e 'aai ai o manu o le vao, ia fa'apea foi ona e fai i lou tōvine ma lou tōolive.*”

Ua fa'amanatu mai e le faitauga o lenei aso, 0 tagata eseese o loo i totonu o le li'o o le olaga o loo tatou ola ai. O i latou nei e tofu ma lagona ma mafatiaga e feagai pea ma i latou. Peita'i, o le ola fia aai ma le matitiva o tagata, o se fa'afitauli o loo tupu pea i le olaga mai lava i le amataga, e o'o mai foi i o tatou vaitaimi. E tatau ai pea ona tatou mafaufau i le ola fa'asoa atu, ma le soifua tufa atu mo isi, i totonu o fa'atinoga lelei tatou te faia.

E fa'apena se ata e tatou te iloa i lenei faitauga, o se fa'amanatu foi lea mo le nu'u o le Atua, auā sa pologa foi ma matitiva ma fia aai, ma e ao ai ona manatua i latou sa fa'alagolago i ai, i le taimi o lo latou fia aai ma le matitiva. Mo le tagata fa'atuatua, e fa'apefea ona fa'aali atu le agaalofa mo i latou o e matitiva, ma fa'amalosi lo latou ola e aunoa ma le mataoge e fa'asoa atu?

Tatalo: Le Alii alofa e, fesoasoani mai ina ia ou iloa ona alofa i e matitiva, fa'atasi ai ma i latou o ou fili, ina ia matou maua le loto filemu, **Amene.**

Aso Gafua – Mati 9: “Ia lima māfola ma agalelei atu”

Tusi Faitau – Teuteronome 15:1-11 (*Be open-handed and generous*)

Matua – ff.4, 11: “*Ina ia leai se tagata ia te oe e mativa, auā e matua fa'amanuia e le Alii le nu'u ua foaina mai e le Alii lou Atua ia te oe e fai ma ou tofi e te maua lava. Auā e le aunoa ona i ai le nu'u le tagata mativa.*”

O le folafolaga a le Atua o le nu'u folafolaina mo Isaraelu, e laugatasia ai tagata uma. E le o fa'apito i se tagata mauoa, poo se tagata mativa. Peita'i, o fa'amanuiaga mai le Atua, e moomia ai le tatau i tagata uma ona fa'asoa ma fa'amāfola atu i isi tagata, ina ia tineia ai le matape'ape'a, ma le mana'otele i mea ua maua mai le alofa o le Atua. O le fa'asoa agalelei a le Atua, e mo'omia ai lo tatou iloa ona fa'aoaga ma le fa'autauta ma le potu, ma ia gata ai le manao i mea ua tatou maua. E ui ina faigata tulaga e feagai ma le mativa, ae ua a'oa'o mai, ia gata le manao i mea ua maua, ae 'aua nei sili atu. E le finagalo le Atua i se olaga mana'olasi ma le matape'ape'a, auā e galo ai le alofa fa'asoa mai o le Atua.

A fa'amafola atu o tatou lima ma fa'aali atu le agalelei i tagata uma, ona tatou mautinoa lea o loo fa'amafola mai foi aao alofa o le Atua i ai tatou. O le lu'itau sili lea mo tagata talitonu ma fa'atuatua, ia fa'amafola atu ou lima alofa, ma agalelei atu i le o fia maua se fesoasoani.

Tatalo: Le Atua alofa, fesoasoani mai i o matou loto, ina ia matou iloa ona fa'asoa atu lou alofa i nsi tagata, e pei foi ona e fa'asoa mai moi matou, **Amene.**

Aso Lua – Mati 10: “Aua le fa'aaogaina isi tagata” (*Don't exploit others*)

Tusi Faitau – Teuteronome 24:10-18

Matua – f.15: “*Ia e avatu ia te ia lona totogi i lona lava aso, a o lei goto le La, auā ua mativa o ia ua naunau foi i ai lona loto, ne'i valaau o ia i le Alii ona o oe, ona fai lea ma agasala ia te oe.*”

O lenei tusi faitau e mafai ai ona tatou iloa le taūa o le fa'atinoina o tiute ma faiva o le olaga. Peitai, o faiva ma tiute tatou te galulue ai, e tatau ona maua le taui. E ao ona tatou mautinoa, tatou te maua le taui, ina ua tatou lagona lo tatou galulue ma fa'atino o tatou faiva i le moni ma le fa'amaoni. O le totogi o lo tatou fa'amaoni, ma le faia ma le filigā o faiva, o fa'amanuiaga ia a le Atua e le mavae ese ma le tagata. O loo aumai e Teuteronome se ata o le atoaga o manuia o le tagata e galue ma le fa'atuatua, ma galue fa'amaoni. E le lilo i le silafaga a le Atua lo tatou taumafai e auaina i le mea gata ai le mafai, mo lana galuega.

Tatalo: Le Atua e, fesoasoani mai ina ia matou iloa o au fa'amanuiaga i lo matou ola, matou te manino ai i lou alofa ma lou fa'amaoni. **Amene.**

Aso Lulu – Mati 11: “Aua le faia ni tulu’i i nonōgā tupe”

Tusi Faitau – Neemia 5:1-13 (*Don’t take interest on loan*)

Matua – ff.9a, 10b: “*E le tatau le mea ua outou faia...Sei o matou tu’u ia lena tau’i fa’asili.*”

E tele taimi tatou te taumafai ai e fai ni fetu’una’iga i faletupe i tulaga tau nonoga tupe. O nei fetu’una’iga, e afua mai i tului, poo tupe fa’asili. O le fa’amoemoe o fetu’una’iga, ina ia mafai ona toe totogi atu nei tupe fa’asili i se ‘auala e gafatia ma le malosi, ma gafatia mo le toe totogiina atu. O le toatele o tagata e fa’aumiumi fetu’una’iga, ina ia manino lelei, e mafai ona fa’aititia poo le matua aveese foi, o tupe fa’asili mai i luga o tupe moomia. Peita’i, o faiga fa’apisinisi, ua manino ai le tulaga o le fa’atauaina o tupe fa’asili mai tupe aitalafu, auā o aga ia e mafai ai ona alualu i luma se pisinisi ina ia ola lelei.

Ae ua fa’amanatu mai e le tusi faitau o lenei aso, le tulaga gafatia lelei o mea e mafai ona tatou totogiina, e aunoa ai ma le avea o i tatou ma tagata saisaitia, ona ua le mafai ona totogi. O le olaga fa’akerisiano, o le mea sili ona taūa o le faia ma fa’ataunu’u mea uma i le mea lelei e o’o i ai le mafai. O mea sili ia mo le olaga auauna ma le tautua i le Atua e malie ai le loto i mea sili e ofoina atu mo le Atua ma lona finagalo.

Tatalo: Le Atua alofa, ia e fesoasani mai ina ia aua nei fa’afeaina i matou i le totogiina o mea fa’asili, ae ia aoao mai ia faia ma le loto malie e lelei, **Amene.**

Aso Tofi – Mati 12: “O upu lapatai” (*A word of warning*)

Tusi Faitau – Amosa 8:1-9

Matua – ff.3-4: “*I lea aso o loo fetalai mai ai le Alii le Atua, e i ai i mea uma tino tagata oti e tele, e lafoaina ma le feganavai. Ia outou fa’alogologo i lenei mea, o outou o e fa’asaua i mea matitiva, ina ia fa’aumatia lava le au matitiva o le nu’u.*”

O upu ua fai ma matua o lenei aso, o le lapata’iga a le perofeta o Amosa mo lona nu’u o Isaraelu. A o upu e liliuina ai uiga ma lagona toilalo o tagata, mai le pulea fa’amalosi o le ola o tagata matitiva. Sa tautala foi Amosa, ma ia fa’ale-aogaina le tulaga manuia o tagata maumea, auā o i latou ia ua latou fa’ati’eti’e le pologa i luga o tagata lima vaivai ma matitiva. O uiga ia ma fa’atinoga, ua se’e ese ai tagata mai le faia o auaunaga fa’amaoni i le Atua. O ana upu lapata’i, ia toe fa’afoi ai tagata i le Atua ma ia alo ese mai tu ma aga fa’apaupau ae foi i le Atua.

E lapata’ia i tatou i upu e tauala mai i nisi tagata ina ia tatou alo ese mai uiga soona fai ma faiga lē amiotonu, e ono aafia ai isi tagata. Peita’i, o le fa’amoemoe o lapataiga, ia liliu ese ai mai uiga soona fai, ae ia iloa moni le taūa o le ofoina atu o le alofa i ē mo’omia le fesoasoani. Ia tatou iloa foi ia lapataiga e mafai ai ona ofo atu ai le fesoasoani mo ē matitiva o loo fia maua le ola.

Tatalo: Le Atua e, aumai le potō i ai matou, ina ia matou iloa ai ona fesoasoani atu i ē o loo fia maua se fesoasoani, **Amene.**

Aso Faraile – Mati 13: “Ia sa’o le amio” (*Act justly*)

Tusi Faitau – Mika 6:6-8

Matua – f.8: “Sole, ua fa’aali atu e ia ia te oe le mea lelei, se a foi se mea e finagalo ai le Alii ia te oe pe a le o ia mea, ia fai le amiotonu, ia naunau i le alofa, ma ia feoi ma lou Atua ma le loto fa’amaulalo.”

O le feau a le Atua mo le perofeta o Mika o loo logoina ai augā tupulaga, o i latou e fa’amoemoe i le Atua, ina ia mafai ona galulue e mafuta i le Atua i le fa’amoemoe ma le fa’amasinoga tonu. O le avefa ma so’o, e le nao i tatou e mafai ona faia lea tulaga. Auā o le alofa tunoa ma le fa’amasinoga tonu e mafai ai ona tatou iloa le Atua. Ma, o le amiotonu ma le alofa e galulue fa’atasi mo le lelei o tagata. O tagata latou te maua le alofa tunoa, e tatau ona alofa mutimutivale ma savavali ma le lotomaulalo ma le Atua. O le loto maualalo lea e mafai ai ona fetu’una’i o tatou ala. O le loto maualalo tatou te iloa ai, e le mafai ona tatou savavali na o i tatou, ae mafai ai ona tatou faia le mea ua finagalo ai le Atua.

O le fa’aali mai o le Atua ia i tatou, e mafai ai ona fa’atino mea lelei, e maua ai le alofa ma le fealofani e pei ona a’oa’o mai ai le Atua. O le fa’atinoga o lou mafuta ma le Atua, o lou tatalo lea i le Atua ina ia tatou iloa le taūa o lana amiotonu, e iloa ai le alofa, ma mafuta ai ma le Atua i le loto maualalo.

Tatalo: Le Alii e, fesoasoani mai ina ia matou malamalama i lou finagalo fa’aali mai, e mafai ai ona matou faia loa nei le amio lelei. **Amene.**

Aso Toonai – Mati 14: “Talepe filifili o mea amiolētonu”

Tusi Faitau – Isaia 58:6-11 (*Breaking chains of injustices*)

Matua – f.6: “E le o lenei ea le anapogi ou te loto i ai? Ina ia tatalaina fusi na faia i le amioleaga, e tatala fusi o le amo, e tu’uina atu ia sa’oloto ē ua fa’a-sauāina, ma ia outou gausia amo uma lava.”

Ua fa’amatalaina e Isaia le uiga o le tagata e fa’atagā ‘ana’ana i le Atua. Le tagata e na o na foliga mai e fai le anapogi ma taumafai e alu atu i luma o le Atua ma le loto fa’amaulalo, peita’i, e le o sa’o lona loto. Ua fa’amanatu mai e Isaia le taūa o mea e faia ma le loto atoa, ma ia iloa le fa’amaoni i le va ma le Atua, ina ia tatou iloa ai le moni atoatoa o a tatou auaunaga ma fa’atinoga e faia mai le loto, ina ia fa’amanuia mai i ai le Atua. O le taumafai e tineia mea sesē, o le alu atu lea i luma o le Atua ma le loto atoa, ma le loto fa’amaoni i mea ua tatou iloa e moomia lona aveesea mai o tatou olaga.

O le uiga moni o le alu i luma o le Atua i le anapogi, o le fa’aailoa lea i le Atua o mea sesē ua tatou faia, ina ia alofa ma fa’afou mai ai lo tatou olaga tuai, ma ia tatou iloa ona fa’amaulalo o tatou tagata e mafai ai ona tineia mea sesē mai o tatou olaga. Ia a’oa’o ina i tatou ia tatou iloa o tatou lava sesē, ona fa’amagalalo ai lea o le Atua ia i tatou.

Tatalo: Le Atua e, fesoasoani mai ina ia ou iloa ona faia le anapogi i le loto maualalo, ina ia ou iloa ai mana’oga o tagata o loo siomia a’u, **Amene.**

O TIUTE TAUAVE TATOU TE FA’ASOA FA’ATASI AI 4 – Soifuaga i Totonu o le Nu’u

Aso Sa – Mati 15: “’Aua le faitogafiti” (*Do not cheat*)

Tusi Faitau – Mareko 10:17-27

Matua – f.22b: “*Ua alu ese foi ma le tiga, auā ua tele ana oloa.*”

O le tala i le tagata mau’oa ma le la talanoaga ma Iesu. Na manatu le tagata mauoa o le tele o ana oa, e mafai ai ona faigofie ona ia maua le ola e fa’avavau. Peita’i, ua fa’amanino e Iesu le taūa o le loto faitogafiti o le alii mau’oa. Sa manatu o le a tali Iesu ina ia o gatusa ma le mea o i lona loto, e faigofie lona ala i le ola e fa’avavau auā e tele ana oa. Peita’i, ua fa’amanino e Iesu, o le ata manino o le tagata e fia maua le ola e fa’avavau, o le alofa atu ma fa’asoa atu. Ua ioe le alii mau’oa i vaega uma o le tulafono na saunoa ai Iesu. Peita’i, fai mai Iesu e tasi le mea e le o ia te ia: e leai se alofa e mafai ai ona fa’asoa atu mo lē ua mativa.

E le leaga le tele o le ‘oa ma le tamāoaiga, auā e tua i ai le aiga. Peita’i, o se a’oa’oga taūa ua aumai e Iesu, ia fa’asili le alofa, i lo le tele o le ‘oa. Fa’atino le alofa e ala i le tufa atu mo ē o loo fia maua le fesoasoani. Ua aumai e Iesu se ata manino o le ola e fa’amuamua ai le alofa, o le fa’amuamua lava lea o le Atua.

Tatalo: Le Alii e, fesoasoani mai ina ia ou aveese mea mamafa e fa’alavelaveina ai le mafuta atu i lau afio, **Amene.**

Aso Gafua – Mati 16: “Tasi i le mafaufau ma le loto” (*One in mind and heart*)

Tusi Faitau – Galuega 4:32-37

Matua – f.32: “*Ua tasi lava le loto ma le manatu o ē fa’atuatua uma lava, ua le fai mai foi e se tasi i se isi ana mea, o lana lea, a ua tu’u tele a latou mea uma.*”

I le faitauga o lenei aso, o loo aumai ai se ata fa’atatau i tagata Kerisiano, o loo mafuta fa’atasi ma ola manuia. O le galuega a le Agaga Paia, ua mafai ai ona fusia i latou i le loto e tasi ma le mafaufau e tasi. O lo latou loto gatasi i le fa’amoemoe, ua fa’aalia ai lo latou naunau e fa’asoa mea lelei uma latou te maua. O lea fa’anaunautā’iga o le au Kerisiano fa’atuatua, o loo taula’i atu lea i le maliu ma le toe tu o Iesu Keriso. Peita’i, o le maua o le loto e tasi ma le mafaufau e tasi, o le mafai lea ona foa’i atu mea lelei ua latou maua, mo le Atua ma lona finagalo.

O le tasi i le loto ma le mafaufau, o se molimau mamana i le toe tu o Keriso. Ia auauna i le Atua e aunoa ma le faifai upu, ma ia iloa o le ola auauna atu, o le fa’aalia lava lea o le Atua ua i ai tatou, tatou te le fefefe ai. O tagata fa’atuatua ua auauna atu i isi, latou te maua le malosī ma le loto tele e mafai ai ona latou fa’atinoina mea lelei ma le taūa mo le ola o isi.

Tatalo: Le Alii e, fesoasani mai ina ia matou iloa lou mafuta mai e ala i lou agaga e tumau ai i lau afio, **Amene.**

Aso Lua – Mati 17: “Tali malo – ua talia oe” (*Hospitality – you are welcome*)

Tusi Faitau – Galuega 6:1-6

Matua – f.3a: “*O lenei, le ‘au uso e, ina filifilia ia ni outou se toafitu e tauleleia, e tutumu i le Agaga Paia ma le poto...*”

O loo tatou ola i se lalolagi o tagata eseese, ma o le to’atele foi o nei tagata, e ola tau fa’avalea; o isi latou te le talia ma ola tete’e atu i isi. I le avea ai o i tatou ma tagata Kerisiano, o loo mafai ai ona tatou talia tagata ese e fai ma luitau taūa

mo le fa'atinoga o le ola fa'a-Kerisiano. Ua valaauina i tatou e fa'ata'ita'i ia Iesu e ala lea i le fa'amanatuina o le agalelei o le Atua i le lalolagi. Ua fa'amanatu mai e le faitauga o lenei aso, o le filifilia o ta'ita'i o le Ekalesia e ala i galuega lelei ma le fa'aalia o le talimalo lelei, o le vala sili lea ona ta'ua mo le Ekalesia i aso nei.

Ua aumaia mo i tatou se agaga tatou te iloa ai le uiga moni o le talimalo lelei, ma talia ni tagata ese, e le o se fa'aaliga fa'apitoa, ae o se 'auala e tatau i le tagata fa'atuatua ona ola ai. E le o se mea foi e fai ma fa'avelave i o tatou olaga, ae ia aveia o se masani ma se aganu'u tatou te fa'afaileleina ma fa'aailoa atu ai o i tatou o so'o moni o Iesu.

Tatalo: Le Atua e, fa'amalamalama mai i o matou loto le uiga moni o le tali malo, ma talia nisi tagata matou te le masani ai, **Amene.**

Aso Lulu – Mati 18: “Meaalofa o le agalelei” (*Gift of generosity*)

Tusi Faitau – Galuega 8:10–15

Matua – f.15: *“O le na i ai mea e tele, e leai sana mea ua toe, o le na i ai mea itiiti, e leai se mea ua mativa ai o ia.”*

O le Aso Gafua sa tatou faitau ai i le Galuega 4, e fa'atautu i le ekalesia i Ierusalemua ua tasi le loto ma le mafaufau, ma ua lima foa'i ma fa'asoa atu a latou mea uma na maua mo le atinaa'e o le galuega. I le faitauiga o lenei aso, o loo tusi atu Paulo e fa'amanatu le ata lava lea e tasi, o le lima foai i le ekalesia i Korinito. O loo fa'amalosi atu Paulo i le 'au Kerisiano ina ia maua le loto o le lima foai i mea ua latou maua. A o se fa'amanatu foi lea mo i tatou, i le alofa tunoa ua tu'uina e le Atua mo i tatou. E ui i lo tatou toilalo pea i le agasala, ae o le itu ta'ua, ua aveia i tatou ma soa e fa'asoa atu le alofa lea o le Atua.

O le valaauina o i tatou ia lima foai, e le o se taumafai e fa'atau ma olegia le finagalo malie o le Atua, pe totogi foi le Atua, e leai. A o lo tatou fa'asoa atu o mea ua tatou maua mai i Lona alofa, o se fa'ata'ita'iga lelei lea o Iesu na foai mai. Ua a'oa'o mai Paulo, e ui lava i eseese fa'aletapuaiga, peita'i, ua vala'auina i tatou ia fa'aali atu le meaalofa o le agalelei e pei o le Atua e agalelei.

Tatalo: Le Atua mamana e, fa'aali mai lou Agaga ia i matou, matou te iloa ai ona lima foai e le gata mo lau afio, a o i latou o loo fia maua lau fesoasoani, **Amene.**

Aso Tofi – Mati 19: “Le alofa tatou te sa'oloto ai” (*Love that sets us free*)

Tusi Faitau – 1 Korinito 8

Matua – f.9: *“A ia outou fa'aeteete, nei aveia la outou nei faitalia ma mea e tausuai ai e ua vaivai.”*

Ua tatou maua i le faitau o lenei aso, le fa'atonuga a Paulo e uiga i le 'ai o a'ano o manu fasi. Peita'i, e matua mamao lava ma ni fesili tatou te fesiligia ai i lo tatou ola fa'a-Kerisiano le sa'o o lenei va'aiga. Ua ta'u atu e Paulo i le ekalesia i Korinito, e talia a'ano o manu e ofoina atu i tupua auā e le moni ia tupua. Ae afai e afaina ai le mafutaga ma isi, ona taofi lea.

O le alofa o Keriso ua fa'asaolotoina ai i tatou. Ae o lona sa'olotoga, e tatau ona malamalama i ai i le tulaga o le fa'atinoga o tiute tauave, aemaise lava le fa'atinoga o le alofa. Po o le a lava le amio po o le gaoiga e fai, e naunau Paulo

ina ia tatou fesili, “Fa’amata e ono afaina la’u mafuataga ma ē o loo matou galulue fa’atasi i la’u gaioiga o le a fai?” E fa’amuamua le mafutaga ma isi, ona o le alofa. A o le alofa foi, tatou te sa’oloto ai mai so’o se faigata lava e tula’i mai e oia ai la tatou mafutaga ma isi.

Tatalo: Le Atua alofa, o lou alofa e fa’asaoloto ai i matou, ina ia mafai ai ona matou filifili e faia soo se mea e ala i lou alofa mai. **Amene.**

Aso Faraile – Mati 20: “Fa’atino so’otaga” (*Making the link*)

Tusi Faitau – Iakopo 2:1-9

Matua – f.5: “O’u uso pele e fa’alogologo mai ia, e le ua filifilia ea e le Atua o e matitiva i lenei lalolagi, ia tamāoaiga i le fa’atuatua, ua tofia foi i latou i le malo, ua ia folafolaina mai i e alolofa ia te ia.”

Mo Iakopo, e i ai le so’otaga i le va o le fa’atuatua tatou te ta’utinoina, ma le olaga tatou te ola ai i aso faiso’o. Afai o le a avea le fa’atuatua e fai ma autu o suiga lelei e faia i lo tatou ola, o lona uiga, e i ai so’otaga i le va o le fa’atuatua ma le olaga i aso faiso’o e tatau ona fa’atino.

Ua fa’amanatu mai e le tusi o Iakopo, e le tatau ona ola se tagata fa’atuatua i se olaga fa’aologa tagata. Auā o le olaga lea, ua le mafai ai ona moni ni so’otaga fa’aletagata tatou te faia, ina ia moni ai lo tatou ola fealofani, ma ia tutusa ai tagata uma i la tatou vaai e fa’apei o le Atua o loo silasila tagata uma.

Tatalo: Le Atua e, aumai mo i matou lou Agaga ina ia maua ai so’otaga lelei ma nisi o matou uso a tagata, **Amene.**

Aso Toonai – Mati 21: “Tupe, tupe, tupe” (*Money, money, money*)

Tusi Faitau – Iakopo 5:1-6

Matua – ff.2-3a: “Ua pala la ‘outou oloa, ua ati’atia o outou ‘ofu i mogamoga. Ua elea outou auro ma ario, e fai foi ma molimau iā te outou.”

O loo tatou ola i se lalolagi ua matuā fa’ateteleina le fevaevaea’i o le tamāoaiga maua e tagata. O atunuu ma faigamalo, e fua lo latou tamāoaiga i luga o tupe e maua mai i fefaatua’iga ma isi atunuu ma faigamalo. Ae mo tagata matitiva, e fua lo latou tamāoaiga i luga o le mea ‘ai e maua e tausi ai o latou aiga ma nai o latou fanau. O le a se tala a Iakopo e uiga i le tamāoaiga?

E tolu ni mea taua o loo aumaia e Iakopo. Muamua, o le tamāoaiga e maileia ai i tatou. I le olaga lea tatou te ola ai, ua fai si tele o le fa’amamafa ua tatou avea i le tamāoaiga ma le tulaga e maua ai, ae ua itiiti le fa’amamafa ua ave i le Atua, o le puna o le tamāoaiga. Lua, ua fa’aseseina i tatou e le tamāoaiga. I nei ona aso, ua fua le manuia o le olaga o le tagata, i le tele o le tamāoaiga ua na maua. Peita’i, e le o le tamāoaiga e iloa ai le manuia o le tagata, a o le ola mafuta i le Atua. Tolu, o le tamāoaiga e tau fa’asese i isi. E to’aga lava le ‘au mau mea e saili ma fa’aputu i le tamāoaiga. Ae fa’alōlō ai nai tagata matitiva, ina ua fa’aseseina i latou i nai mea iti ua latou maua.

Tatalo: Le Atua alofa e, fesoasoani ia te a’u ina ia ou fa’afetai mo ‘oa o loo e fa’atumulia ai lou olaga, ma ia manatua o mea uma e mai i lau afio, **Amene.**

O TIUTE TAUAVE TATOU TE FA'ASOA FA'ATASI AI
5 – O Avega e Tauaveina

Aso Sa – Mati 22: “Agalelei atamai” (*Wise generosity*)

Tusi Faitau – Salamo 112

Matua – f.5: *“E manuia le tagata ua alofa fua ma tu'uina atu ana mea i ē nonō mai na te tausia ana mea ma le fa'autauta tonu.*

O le Salamo 112 o se pese o loo fa'aalia ai se ata o se olaga e amiotonu, ma foliga o se tagata e mata'u i le Atua, e ala i le fa'aalia o 'auala e mafai ona fefa'asoai ai ma agalelei atu i le tufatufa o mea ma ē matitiva. Ua a'oa'o mai foi le Fai Salamo mo i tatou, e 'aua ne'i liliu ese o tatou mata mai i ē matitiva. O le foa'i atu o meaalofa ma le atamai, o le ofoina atu lea o lou loto atoa e fesoasoani ai i lē ua tagi mai i le fia 'ai ma fia inu.

O le potō ma le atamai ua tu'uina e le Atua i tagata uma e iloa ai ona fa'atau-nu'u le ola foai, tatou te le fesiligia ai pe ave pe tu'u. Ae tatou te foa'i atu ina ua musuia i tatou e le Agaga o le Atua. O lo tatou foa'i atu, tatou te mau ai manuia o le Atua ua uma ona folafolaina mo i tatou. O lē e foai atu ma le loto malie ma le loto atoa, na te maua manuia foa'i mai o le Atua i 'auala tataua ia silafia.

Tatalo: Le Atua e fa'amanuia ia i latou o loo latou foai mai moi matou, ma matou maua ai ou manuia, **Amene.**

Aso Gafua - Mati 23: “Matafaioi tutusa” (*Equal responsibility*)

Tusi Faitau – Esoto 30:11-16

Matua – f.15: *“Aua le fa'atele a le tagata mau'oa, aua foi le fa'aitia e le tagata mativa, na o le vaelauaga o le sekeli lava, pe a latou avatu le taulaga i le Alii e fai mo outou” Togiola.”*

O le feau a le Atua ia Mose, o loo fa'amatala ai le uiga o le tutusa o fa'atinoga a tagata uma, ma le tutusa o matafaioi e fa'atino ai le faiga taulaga. O le “tutusa” o loo talanoa ai le tusi faitau, o le ola taumafai e fa'atino le mea lelei – ia le va'ai i le mativa e avea ma 'auala o le fa'avaivaia ai o le ola faitaulaga, poo le tele o tamāoaiga e fa'aoso manatu ai e fai le taulaga. A o le fa'amanatu mo Isaraelu, ia iloa e le tagata lana matafaioi e ao ona fa'atau'u, ma ia faia tutusa uma mo le Atua ma lona finagalo. O le Atua na te silafia mea uma, ma o Ia foi e fesoasoani ia i tatou e fa'amalosia o tatou loto e fa'atino ai le auaunaga ia te Ia. Pe mativa pe mau mea, e tutusa uma i atou i le Atua. O le finagalo foi o le Atua na te tausia ai ma leoleoina i tatou, pe afai tatou te talitōnu ma fa'atuatua ia te ia.

Tatalo: Le Alii alofa e, silasila mai i a matou auaunaga ma fa'atinoga, ina ia matou iloa ona fa'atino a matou matafaioi mo lau Afio ma lou finagalo, **Amene.**

Aso Lua – Mati 24: “Saofaga a le nu'u” (*Community contribution*)

Tusi Faitau – Numera 18:21-32

Matua – f.21: *“Fa'auta fo'i, ua ou foa'iina atu i le fanauga a Levī o lona sefulu o mea uma o i Isaraelu e fai ma tofi ona o la latou galuega latou te auauna ai, o le galuega lea o le fale fetāfa'i o le fa'apotopotoga.”*

O le vaega lenei o le tusi a Numera, o loo fa’ailoa mai ai tiute o faitaulaga ma sa Levī, i le vaega lautele i le fuaina ai o le tamāoaiga ma fanua. O le ‘au sa Levī, o ē na fesoasoani i ositaulaga i le faia o sauniga ma ‘auala na latou fai ai le taulaga e ala i sefulua’i mo a latou taulaga. O le faia o fa’atinoga lelei, ma le tutusa o ‘auala e faia ai taulaga ma fa’atino ai auunaga, o le alofa lea e foaiina ai ma fa’atino ai, ina ia manuia ai tagata uma.

O le tu’uina atu o le sao o le au sa Levī, o le tu’uina atu lea o fa’atinoga lelei, e mafai ai ona iloa lo latou lelei, ma le atoatoa i le faia o galuega lelei e tutusa ai uma tagata. O le taūa o galuega lelei e faia mo tagata lautele, e iloa ai le silisili ese o le Atua o loo tatou maua ai le ola.

Tatalo: Le Atua e, ia fesoasoani mai ia maua avanoa e fa’atino ai tiute ma faiva ina ia maua ai le faia o mea sili mo lau Afio, **Amene.**

Aso Lulu – Mati 25: “Aua le fa’aaogāina sese” (*Don’t exploit*)

Tusi Faitau – 2 Tupu 23:31-35

Matua – f.35: “*Ona avatu ai lea e Ioakima le ario ma le auro iā Farao, a ua na togitū taulaga a le nu’u e avatu ai le ario, pei o le poloa’iga a Farao, ia taitasi le tagata e tusa ma lana togiga, na ia fa’atauānau lava o ario ma auro a’i tagata o le nu’u e avatu ai iā Farao Neko.*”

O Ioakima le tupu mulimuli o sã Iutā a o lei fa’atoilaloina e Nepukanesa ma fa’atafea le nu’u o le Atua i Papelonia. I le molimau a le tusi o 2 Tupu, o Ioakima o se tupu e sili ona leaga, ona o lona fa’aaogāina sese o tagata e ala i le togiina o lafoga aga’i ia Aikupito. Ua leva ona saisaitia ma olopalaina ai tagata o le nuu o le Atua, ona o lenei faiga lē alofa o le tupu o Ioakima.

O le togiina o lafoga, o loo faia foi e le tele o faigamalo ma atunuu i nei ona aso. E fa’amoemoe i ai galuega fai a faigamalo ma pisinisi, i lafoga o loo totogi e tagata faigaluega. O se mea lelei le togiina o lafoga, pe afai o loo atiina’e ai le atunuu ma manuia ma penefiti ai tagata lautele. Ae e leaga le faia o lafoga, ae manuia ai na o le to’aitiiti, e pei ona faia e Ioakima. Ua fa’aaogā sese ai le to’atele o tagata o loo utiuti le fa’asoa, ae le o le finagalo lea o le Atua.

Tatalo: Le Tama e, fesoasoani mai ina ia ‘aua ne’i o matou fa’aogaina ‘auala sesē e tausia ai aiga, ae aumai ‘auala manuia matou te iloa ai lou mafuta mai, **Amene.**

Aso Tofi – Mati 26: “Sailiga tupe mo le malumalu”

Tusi Faitau – 2 Nofoaiga a Tupu 24:4-14 (*Fundraising for the temple*)

Matua – f.13: “*Ua galulue le ‘au ositaulaga, ua uma ona fai e i latou le galuega, ua latou toe faia le fale o le Atua e pei o tuga tuai ma ua latou fa’amalosia*”

O le tusi faitau o lenei aso, o le tala i le nofoaiga a Ioasa ma le ‘auala na fesoasoani ai le ositaulaga o Ioiata ia te ia i le toe fa’aleleia o le malumalu i Ieruselema. O le taumafaiga a le tupu e toe fuataiina atoa le tapuaiga i le Atua i Ieruselema, ae amata i le fa’aleleia o le malumalu ua leva ona tu’ulafoaiina e tagata o le nuu ina ua avaga atu i atua fa’apaupau. O le malumalu lea e tu’u ai le atolaau a le Atua, auā o le mea sili lea i tagata o le Feagaiga Tuai i ia ona po. O le sailiga o tupe mo le malumalu sa fa’ataunu’uina e ala i lafoga.

Sa tatou va'ava'ai i le aso ananafi i le faia o lafoga, ae manuia ai na o le to'a itiiti. A o le lafoga lea ua faia e Iosia, o se 'auala sa tinou ai tagata e fa'aputuputu ina ia mafai ona toe fai le fale o le Atua. I nei ona aso, tatou te naunau e fai malumu ma maota o faifeau, e ui ina tatou lima vaivai. Peita'i, ua tatou fa'atuatua ma le loto tetele i le Atua na te aumaia le malosi, e fa'ataunu'u ai ana galuega.

Tatalo: Le Atua mamana e, fesoasoani mai ina ia matou iloa ona saili ma le mautinoa mea e faia ai lau galuega, **Amene.**

Aso Faraile – Mati 27: “Totogi lau lafoga” (*Pay your tax*)

Tusi Faitau – Mareko 12:13-17

Matua – f.17: *“Ona tali atu lea o Iesu ia te i latou, ‘Ina avatu ia o mea Kaisara ia Kaisara, ia avatu foi mea a le Atua i le Atua.’ Ona latou ofo ai lea.”*

O tulafono a le malo e tausisia e tagatanuu uma. Ua tatou manino foi i le uiga ma faiga masani o mea ua fa'atulafonoina. E pei o lafoga, o se tasi lea o vaega ta'ua o atina'e ai atunu'u ma malo, e mafai ai ona fa'ataunu'uina ai atinae manuia mo tagata uma. O le tagata faigaluega, ua manino lelei i le tulafono, e totogi lana lafoga aga'i i le faigamalo. O lona uiga, o tupe ia a le malo.

O le vaega ta'ua lea sa fa'amamafa e le malo o Roma i le taimi o Iesu – o le tagata e galue, e tatau ona totogi lana lafoga. E le o 'au ese foi Iesu i lea taofi, e pei ona fa'aali mai e le tusi faitau o lenei aso. Peita'i, afai la e totogi le lafoga ia Kaisara, o a mea e tatau ona totogi i le Atua, e pei ona fetalai ai Iesu? E tatau ona ave lou tagata atoa i le Alii; ave lou tagata, o le mea totino a le Atua. O lau lafoga totogi i le Atua o le loto auauna ma le fa'amaoni. O lou soifua tautua ma le onosai, o le lafoga lena a le tagata e fa'afoi i le Atua, auā o mea patino na e tau i le Atua.

Tatalo: Le Atua e, fesoasoani mai ina ia matou iloa, o i matou o tagata na e faia i lou fa'atusa, o lau mea totino, **Amene.**

Aso Toonai – Mati 28: “Usita'i ma totogi” (*Obey and pay*)

Tusi Faitau – Roma 13:1-7

Matua – f.2: *“O lenei, o lē na te tete'e i le pule, ua tete'e o ia i le sauniga a le Atua, a o ē tete'e foi e sala lava i latou.”*

O upu ia ua fai ma matua, o se fuitau ua iloga lona fa'aogāina e faigamalo i le tuana'i e taotaomia ma saisaitia ai tagatanuu i pule sauā o ta'ita'i. O le faigata o lenei fuitau, e le o le vaaiga fa'apea o le pule, o le meaalofa mai le Atua. A o le fa'afitauli i le fa'auigaina o lenei fuitau e pei ona faia i le tuana'i, ua fa'apea ai, o faigamalo uma ma ona ta'ita'i e tatau ona usita'ia lo latou pule. O le faaletonu e le o talanoa lenei fuitau i ni faiga fa'aupufai poo se pule fa'a-faigamalo.

O le lu'itau mo le Ekalesia, o le taumafai e tu'u fa'afeagai le fuitau lea ma le isi fuitau o le Tusi Paia e maua i le Galuega 5:29, *“E tusa ona sili o lo matou anaana i le Atua i lo matou anaana i tagata.”* O le pule a le Atua poo le pule fa'aletagata o loo ta'ita'ia atunu'u ma faigamalo? E le o se mea faigofie.

Tatalo: Le Atua o le sa'olotoga, aumai ia i matou le poto e lagolago ai i latou o loo manaomia le lagolago, ma matou faia ai fa'atinoga lelei mo isi, **Amene.**

O PUAPUAGA I LE VA'AI A MATAIO 1 – O Tala ma Fesili

Aso Sa – Mati 29: “Amataga fou: Avea e pei o tamaiti”

Tusi Faitau – Mataio 18:1-10 (*A New Beginning: become like children*)

Matua – ff.2-4: “*Ona valaau atu ai lea o Iesu i le tamaitiiti, ua fa’atū ia te ia i o latou luma, ua fa’apea atu, ‘E moni, ou te fai atu ia te outou, a le liua outou ma aveia ia pei o tamaiti, tou te le sao lava i le mālō o le lagi. O lenei o sē fa’amaulalo o ia iā te ia e pei o le tamaititi nei, e sili lea i le mālō le lagi’.*”

O Mataio o se faiaoga Kerisiano, ma se tusitala o le Tala Lelei. Ua tusia e Mataio se tala e tau fa’amatala ai se amataga fou o le ola e mulimuli ma lafo i le Atua lona fa’amoemoe. Ua aumai e Mataio i le faitauga o lenei aso, se va’aiga fou i mata o le ‘ausoo: o le fa’atūina o le tamaititi – o le fa’atusa o se amataga fou mo le Tala Lelei – e fa’atusaina i ai tagata ua vala’auina e mulimuli ia Iesu e aveia ma tagata fou. O le fa’atūina o le tamaititi i luma o le ‘ausoo, o le ata manino lea o se amataga fou e atagia ai le ola fa’alagolago ma le fa’amoemoe o le so’o i le Atua, na te faia se amataga fou e lu’itauina ai le ola ua ofoina atu mo le Atua.

O suiga o le olaga, o le amataga foi lea o le mo’omia ai le ola fa’amatu’u atu i le Atua. E le gata i lea, o le fa’alagolago ma le loto atoa i le Atua, e maua ai le loto tele e fa’atino ai tiute ma tofi ua filifilia ai i tatou e galulue.

Tatalo: Le Atua e, fesoasoani mai ina ia matou iloa o lau Afio o le amataga fou i o matou olaga, pe afai e fa’amoemoe ma fa’alagolago i lau Afio, **Amene.**

Aso Gafua – Mati 30: “Fulifaō talitonuga fa’avae: Olaga e feteena’i”

Tusi Faitau – Mataio 18:12-14 (*Values overturned: a contrary economy*)

Matua – ff.13-14: “*Āfai fō’i na te maua, e moni, ou te fai atu iā te outou, e tele lona olioli i lea, ae ititi i le ivasefulu ma le iva o mamoe e lei leiloa. E fa’apea lo outou Tama oi le lagi, e lē finagalo o ia ina ia fano se tasi o i latou nei e fa’avavau.*”

O le fa’ataotoi le mamoe na sē, e le gata o loo va’ava’ai ai le tulaga o le fa’atino lelei o tiute masani o le olaga, a o le fa’atinoga foi e sili atu nai lo le mea e masani ai. E pei o fa’atinoga a le leoleo mamoe ina ua sē lana mamoe. Ua tu’ua e le leoleo mamoe le tele o mamoe o le lafua, ae alu e saili le mamoe sē lea ua leiloa. E le talafeagai i le mafaufau le tu’ua o le to’atele, ae saili na o le tasi. Ae ua fa’ataunu’u e le leoleo mamoe le galuega e sili atu ona taūa – le sailia o le mamoe ua leiloa. O tiute fa’ataunu’u o mea masani o le olaga, ae a tulai mai se mea e ese mai i tiute masani, e tatau ona fa’ataua lena i lo tiute masani. O le Atua o loo ia alofa ma leoleo ai i tatou, peitai o le tagata e toatasi e agasala, o le galuega a le Atua o le avatu o le tagata agasala e toatasi ua sesē ese i le fa’aolataga. E taūa lo tatou faia o tiute lelei ma atoatoa, ina ia manuia ai nisi tagata.

Tatalo: Le Atua fesoasoani mai ina ia matou iloa ona fa’ataūa o matou tiute ma tofi auā le manuia o lau galuega, **Amene.**

Aso Lua – Mati 31: “Va’aiga feteena’i: Ola fefa’amagaloa’i o tagata”

Tusi Faitau – Mataio 18:15-20

Matua – ff.19-20: “*Ou te fai atu fo’i ia te outou. Āfai e lotogatasi se to’alua o outou o i le lalolagi, i se mea la te ole atu ai, e faia lea mo i lā’ua e lou Tama oi le lagi. Aua o le mea ua fa’apopototo ai se to’alua poo se to’atolu i lo’u igoa, ou te i ai fa’atasi ma i latou.*”

Ua ofoina atu e Iesu le ta’iala e ola ai i totonu o se fa’alapopototoga. O le ola lē mautonu o tagata, o loo fai ma ala o le fa’amalosiā o le ola ua fa’amalie gofie i mea ua va’aia. Peita’i, ua aumai e Iesu se ata manino ma le taūa mo le tagata e ola fegalegalea’i ma isi, ina ia mafai ai ona maua le ola fa’asoa ma iloa le ola vala’auina. O le lotogatasi ma le fa’atuatua e valaau i le Atua, e tali mai ai le Atua i le olega e tu’uina atu atoa i ai ma le loto. Ua ao’a’o ai Iesu i lenei fa’ataoto, ia ‘aua ne’i tu’ulafoa’i le tagata e lē fa’alogo, ae ia maua pea fesootaiga ina ia lagona ai le ola fa’amagalo. Ua le gata ina talanoa mai Iesu i le tatau ona ola fefa’amagaloa’i i totonu o va’aiga masani o le olaga, ae ia mautinoa, so’o se mea tatou te faia i lalo nei, o loo silasila mai le Atua. O lona uiga, o le autū o lagona o lenei vaega o le tusi a Mataio, ia tatou iloa ona faia mea uma i le fa’aeteete, ma ia faia i le amio sa’o, auā e leai se mea e lilo i le silafaga a le Atua.

Tatalo: Lo matou Tama e, ia e aumai mo i matou le loto fa’amagalo i totonu o va’aiga masani o le olaga e tele ina matou manatu māmā i ai, **Amene.**

Aso Lulu – Aperila 1: “Olaga o le Tala Lelei: Fa’asiliga o le Fa’aolataga Tusi Faitau – Mataio 18:21-35

Matua: ff.32-33: “*Ona vala’au atu ai lea o lona ali’i ia te ia, ua fa’apea atu ia te ia, Le auauna leaga e, na a’u fa’amagaloina atu a’u mea uma ua ia te oe, ina ua e ‘ai’oi mai ia te a’u; e le tatau ea ona e alofa atu i lou uso a auauna, e pei o a’u fo’i na ou alofa atu ia te oe?*”

O le tusi faitau o lenei aso o loo atagia ai le va i le mamafatu o a tatou agasala, ma le Tala Lelei o le fa’aolataga ua lava ma totoe e fa’amagaloina ai agasala. Na fesili Peteru ia Iesu pe fa’afitu ea ona fa’amagalo le tagata i lona uso ua agasala. Ae fetalai Iesu, “Ia fa’afitugafulu ma le fitu.”

O le aitalafu a lenei auauna lē fa’amaoni, ua matuā tele lava. O le taūa o le faitauina o taleni ma auro (f.24) i le tala, o loo atagia ai le tulaga o le tele o le ‘aitalafu e le mafai ona mafaitaulia. Peita’i, o le finagalo ma le manatu o loo taumafai le Ali’i o Iesu e fa’ailoa, ina ia mafai ona tu’u fa’atasi le agasala ma le loto fa’amagalo i se mafutaga e tasi. Auā o le mamafatu o a tatou agasala, ua sili atu ona lē mafaitaulia ona o le meaalofa ua foa’i fua mai e ala i le fa’amagaloga. Iesu sa faia le fa’amagaloga mo mataupu e uiga i tagata, auā o le fa’amagaloga, o le malosia lea e su’esu’eina o tatou tagata ma lo tatou fa’asinomaga; e na te fa’afou ma toe fa’af’o’isia i tatou i le mafutaga ma Ia.

Tatalo: Le Alii e, ia matou iloa ona fa’amagalo e pei ona e fa’amagalo ia i matou. Ia matou alofa e pei ona e alofa mai mo i matou, **Amene.**

Aso Tofi – Aperila 2: “Olaga o le Tala Lelei: Itiiti ifo lona tau i mea uma” Tusi Faitau – Mataio 19:16-30

Matua – ff.21-22: “*Afai e te mana’o ina ia atoatoa ona lelei o lau amio, ia e alu ma fa’atau atu au mea, i le avatu ai i ē matitiva; ona ia te oe lea o le faula’iga ‘oa i le lagi, i le e sau ma mulimuli mai ia te a’u.’ Ua fa’alogo le taule’ele’a i lea upu, ona alu ese ai lea o ia ma le tigā, auā e tele lava ana mea.*”

O le masani o le aganu’u, e fua le fa’ataūa ma le fa’aaloalo i luga o tofiga, le tomai, ma le tamāoaiga maua. E ave le fa’ataūa i le tagata e maualuga lona tofi. E sili foi ona amana’ia le tagata a tele ana mea. O fiafiaga foi o lenei olaga o loo tatou ola ai, e fua i le tele o mea e maua. O le tele o mea e fa’aosofia ai foi lagona o le ola fia tuto’atasi, e le toe fa’amoemoe ai i se isi.

Ina ua iloa e le taule’ale’a o le ala i le ola fa’avavau e amata i le tufatufaina o ana mea ma fa’asoa atu i e matitiva, na matuā taugata lea tau mo ia, ona *alu ese ai lea o ia ma le tiga.* O le fetufaaiga a Iesu ma le taule’ale’a, o loo faamamafa ai le lagona o le ifo ‘au – o le tu’u ese o mea uma e pele i le loto, ae ifo ‘au atu i le Atua ma lona finagalo. O le uiga lea o le olaga e sili ona lelei – ola fa’avavau – o le ifo ‘au ma ‘aufa’atasi ia Iesu Keriso, nai lo se isi lava mea o lenei olaga.

Tatalo: Iesu Keriso le Ali’i o le ola, ia fa’atumauiua lo’u loto i le naunau atu i lau afio. E maua ai le atoaga e ofoina atoa atu ai le ola, **Amene.**

Aso Faraile – Aperila 3: “O talitonuga tau lagalaga a le Malo”

Tusi Faitau – Mataio 20:1-16

Matua – ff.14b-16: “*O la’u pule lea e avatu lava i lenei na mulimuli e pei o a oe lava. E le faitalia ea a’u ona pule i a’u lava mea? E te fa’auu mai ea ina ua ou agalelei? E fa’apei ona muamua o ē na mulimuli, e mulimuli fo’i ē na muamua.*”

I a’oa’oga a Iesu, na fa’aaogā ai fa’ataoto e fa’aioa atu ai le va’aiga i talitonuga tau lagalaga a le Malo o le Atua. O talitonuga tau lagalaga, o talitonuga na te lu’itauina ma fesiligia le sa’o o talitonuga sa masani ma ola ai tagata. O fa’ataoto, o tala i ata masani o le olaga i aso faiso’o, ae ua liliu e Iesu ma fulifaō le uiga masani, ina ia avatu ai se ata fou e lagalaga ma feteena’i i talitonuga masani. O ata o le olaga faiso’o sa masani ai, ae ua tu’u ai e Iesu le uiga fou, ina ia toe taga’i ai tagata i le sa’o o talitonuga ma le va’aiga o loo ola ma soifua ai.

I le tusi faitau o lenei aso, o le Malo o le Atua ma le pule a Keriso, e fa’avae i luga o le alofa tunoa ma le agalelei o le Atua, ae le o ni galuega lelei poo se mea lelei e faia e le tagata. O le fa’amamafa a le Malo, e lē fuaina i luga o le tele o itula faigaluega o le tagata. Ae fua i luga o le alofa foa’i fua ma le agalelei faitalia o le Atua – e pule lava le Atua poo ai e fa’asoa atu ai.

Tatalo: Ia tatala o matou loto le Atua i lou agalelei fa’asoa mai, ina ia liligi mai ou fa’amanuiaga mo i matou, **Amene.**

Aso Toonai – Aperila 4: “Fa’atalauula i le ola”

Tusi Faitau – Mataio 20:17-23

Matua – f.23: “*Ona fetalai atu ai lea o ia ia te i laua, “Lu ate feinu lava i la’u ipu; a o le nofo i lo’u itu taumatau ma lo’u itu tauagavale, e le o ia te a’u lea ona avatu, a e tau lava o e ua saunia mo i latou lea mea e lo’u Tamā.*”

Ua aga'i atu Iesu i lona fa'alataina, fa'asalaina, ma lona fasiotiga i Ierusalem. O tusi faitau uma o lenei vaiaso, o loo fa'aataata ai le silafia e Iesu o mea ia o le a tutupu i lona aga'i atu i Ierusalem. E fa'atolu na valoia e Iesu ia mea (Mat.16:21; 17: 22-23; 20:17-19). Ae ua fa'ate'ia le Alii ina ua talosaga le tinā o Iakopo ma Ioane, mo le mamalu sili o le malo, mo lana fanau. O lene talosaga, ua tete'e i mea uma sa taumafai Iesu e a'oa'o ai ona soo. O le pule a Keriso i le malo e fa'ataua ai le ola e aofia fa'atasi ai tagata uma – e leai se tasi tu'ulafaoiina pe tu'uese – i le alofa tunoa ma le alofa mutimutivale o le Atua. E leai ni nofoaga i totonu o le malo e iloa ai poo ai e sili poo ai foi e mamalu. E tutusa tagata uma.

O lona vaiaso sa tatou mulimulita'i i a'oa'oga a Iesu e fa'atatau i le ola i le malo i le taimi nei. O se fa'atalauulu i le ola e tumu i folafolaga o le agalelei o le Atua ua sasaa mai mo i tatou – ua foa'i fua mai e 'aunoa ma se ta galuega na faia ai. O le tali atu o le fa'atalauala mai o le Alii, o le ifo 'au ma ofo atu atoa o tatou loto ia te ia ma lana galuega.

Tatalo: Fa'asa'oloto mai e lau Afio lo'u ola fa'amauualuga. Tatala la'u va'ai i lau galuega fa'aola ma ave'a'u ma au mea faigaluega mo lou alofa lavea'i, **Amene.**

O PUAPUAGA I LE VA'AI A MATAIO 2 – O le 'A'ai Paia

Aso Sa Laupama

Aso Sa – Aperila 5: “Se'i toe fesili ane: ‘O ae ea lenei?’”

Tusi Faitau – Mataio 21: 1-11 (*Asking afresh, 'Who is this?'*)

Matua – ff.9-10: “O le motu o tagata ua muamua, ma e ua mulimuli, ua alalaga i latou, ua fa'apea mai, “Osana i le alo o Tavita; ia manuia le afio mai i le suafa o le Ali'i. Osana i mea e aupito i luga.” Ua o'o ia i Ierusalem, ona vevesi ai lea o le a'ai uma, ua fa'apea ane, “O ai ea lenei?”

E siliga ma le afa o le tusi a Mataio o loo fa'amatala ai mea sa tutupu i le Vaiaso Paia, ma, o le tele o ia tala, ua masani ai la tatou fa'alogo. I le taumafaiga mo se isi va'aiga fou, o lenei vaiaso o le a se'i tatou va'ava'ai i le 'au lagolago i totonu o le tala. O Iesu lava ia o le autu o le tala. Ae to'atele le 'au lagolago, e i ai foi lo latou sao i le tala.

O le Aso Sa lenei o le Laupama, ua tuanu'u le galuega tala'i a Iesu i lona taualuga ina ua tuvae i le laumua i Ierusalem. Ua vevesi le 'aai ona ua salalau solo tala i le ofoofogia o ana fa'amalologa ma le mata'utia o ana a'oa'oga. Ua le mautonu foi tagata ina ua taunu'u atu Iesu o ti'eti'e i le asini – le fa'ailoga o le tupu ua afio mai i lona nofoalii. O isi tagata ua sauni e talia Iesu e fai ma tupu, a o isi, o loo le mautonu pea. E tele ta'u ma fa'amoemoega eseese ua fa'ae nei ia Iesu. O isi ta'u ma fa'amoemoega o le a taunuu i le gasologa o lenei vaiaso. A o isi, e leai. A o tatou i ai i le Vaiaso paia, o le a se fa'amoemoe ma ni mo'omo'oga o ia te i tatou? A o ai Iesu ia te i tatou? O le a se mea o le a ia faia mo i tatou?

Tatalo: Le Atua fa'avavau e, a'oa'o mai ina ia matou malamalama i lou alofa, ao matou malaga fa'atasi ma le Ali'i o Iesu i lenei vaiaso, **Amene.**

Aso Gafua – Aperila 6: “E mai i gutu o tama meamea”

Tusi Faitau – Mataio 21:12-17 (*Out of the mouth of the babes*)

Matua – ff.14-15: “*Ona o mai ai lea ia te ia i le malumalu o e tauaso ma e pipili, ua na fa’amalolo ia te i latou. Ua iloa atu e le au ositaulaga sili ma le au tusiupu o vavega ua faia e ia, o tama fo’i ua alalaga i le malumalu, ua fa’apea ane, ‘Osana i le alo o Tavita;’ ona matuā tigā ai lea o i latou.*”

E tele matua ua latou silafia le masani a le fanau iti, e vave ona latou pu’ea upu e fa’alogo i ai ma toe fa’aleo atu i le fa’afofoga mai o tagata. O se maasiasi tele i matua pe afai o se upu e le talafeagai i le fa’afofoga. I le tusi faitau o lenei aso, tatou te iloa ai o le masani lea a le fanau iti, e le o se mea fou. E i ai nisi o le fanau iti o loo manumanuo i le alalaga a le motu o tagata, a o aga’i atu Iesu i le a’ai o Ieruselema. Fa’amata o malamalama le fanau iti i le uiga o a latou upu o loo fai? O upu ma aga fa’aalia e ‘auala ese’ese mai, ae pipi’i lava i le manatu e tasi e uiga i le fa’asinomaga o Iesu ma lona malo. O loo si’osi’omia fo’i i tatou i mea e fa’asino ai i tatou i le Ali’i o Iesu, nisi e fai ma le loto i ai; a o isi, e fai ma le le iloa. O tatou iloa lena mea? O tatou silasila toto’a i le tulaga?

Tatalo: Le Atua alofa e. ia tatala la matou fa’alogo ma la matou va’ai, ina ia matou matinoa ma molimau ai i lou fa’amaoni ma lou mamalu, **Amene.**

Aso Lua – Aperila 7: “E leotele galuega nai lo upu”

Tusi Faitau – Mataio 26:1-16 (*Action speak louder than words*)

Matua – ff.6-7: “*Sa i Petania Iesu i le fale o Simona le lepela, ona sau lea ia te ia o le fafine ma le fagu alapasa ua i ai le suāu’u manogi tau tele, ona liligi ai lea e ia i lona ao a o ta’oto o ia e taumafa.*”

I tele mea sa tutupu i le tuana’i sa o tatou molimaaina, a e le manatua upu sa faia ma felafoa’i. E fa’apena le tala o loo aumai i lenei aso. E le o fa’amatala e Mataio ni upu sa felafoa’i ai Iesu ma lana ‘ausoo i le fafine na sau ma le fagu alapasa. Ae pau le fetalaiga a Iesu i le fafine, ‘*o le a manatua ai pea o ia.*’

E le o manino le tala pe aisea ua faia ai e le fafine lenei mea. Ae tolu ni manatu e fesootai ai lenei gaoiiga ma Iesu. Muamua, o le fa’atinoga o le faafetai a le fafine, i le toe fa’atuina e Iesu o Lasalo mai le oti. Lua, o le fa’auuga, ua fai ma fa’ailoga o le Tupu, e fa’amaonia ai e malamalama lenei fafine i le tagata o Iesu; ma le lona Tolu, o le fa’ataimuaga o le tanuga o Iesu. O lona uiga, o lenei fa’atinoga o se perofetaga. Sa le manatu lenei fafine o lana gaoiiga o se fa’atinoga fa’a-perofeta. Ae pei o le fanau iti i le malumalu, e tele lona sao i le tala atoa.

Talosaga: Tatou tatalo e fa’aailoa atu le agalelei o Iesu, ma ia tatou mautinoa o ia o lo tatou Tupu. Ia saunia i tatou i mea e lolofi mai i lenei vaiaso paia, **Amene.**

Aso Lulu – Aperila 8: “Mautinoa atonu” (*Definitely maybe*)

Tusi Faitau – Mataio 26:17-30

Matua – ff.20-22: “*Ua o’o i le afiafi, ona ta’oto ai lea o ia e taumafa fa’atasi ma le to’asefulu ma le to’alua. O loo latou a’ai, ona fetalai atu ai lea o ia, ‘E moni, ou te fai atu ia te outou, e fa’alataina a’u e so outou.’ Ona latou matuā tiga ai lea, ua latou ta’itasi ma fai mai ia te ia, ‘Le Ali’i e, o a’u ea?’”*

Sa fiafia ma tausami fa'atasi Iesu ma ona soo i le fa'amanatuina o le Paseka. Ae sa liua le fiafia i le pogisa ina ua valoia e Iesu le fa'alataina o Ia e se tasi o i latou. Sa taumafai lava i latou e tete'e atu i lea manatu, ae ona o le le mautonu o latou lagona na iloa ai e Iesu, e tusa lava po o le a le latou fa'amoemoe.

A o totonu o lea va'aiga, ua mafai ai ona tatou maua se lesona tãua mai le auso'o. E ui i o latou lagona ina ua fa'aailoa atu e Iesu le fa'alatina o Ia e se isi o i latou, na vave lava ona toe tu'u fesili i latou, ia i latou lava. Ua taumafai ina ia fa'amamã o latou igoa. To'atele le auso'o sa o latou fa'aigoa Iesu o le 'Atua', a ua vala'au Iuta ia Iesu, 'Rapi e'. E foliga e le o tele se afaina o lea manatu mo i tatou. Peita'i, ua mafai ona aumai ai le tulaga o Iuta o le tagata tonu lava lea o le fa'alataina Iesu. E le o fa'aata'ata e Iesu lea tulaga e fa'aailoa atu ai o Iuta, ae o lana tali fa'anefu na iloa ai o Iuta lava o le a fa'alataina o Ia.

Tatalo: Matou saili i le filemu ma le mamalu o le Atua i a'afiaga o le ola, ma ia atagia lou fa'amaoni ina ia aua ne'i tu'uaia i matou i mea o le olaga, **Amene.**

Aso Tofi Poloa'i (Maundy Thursday)

Aso Tofi – Aperila 9: “O mea lelei uma lava e muta?”

Tusi Faitau – Mataio 26:36-56 *(All good things come to an end?)*

Matua – ff.48-50a: *“Na tu'uina atu fo'i e lē na fa'alataina o ia le fa'aailoga ia te i latou, ua fa'apea atu, 'O lē ou te sogi atu i ai, o ia lea; ia outou pu'e ia te ia.' Ona sau loa lea o ia ia Iesu, ua fa'apea mai, 'Rapi e, si o'u alofa.' Ona sogi ai lea o ia i a te ia. Ona fetalai atu ai lea o Iesu ia te ia, “Sole, se a le mea ua e sau ai?”*

Ua toe lava na o Iesu, ma ona so'o mata momoe, e ui e lei leva atu ona a'oa'o Iesu i le ola sauni ma le mataala. Pau le tautalaga i totonu o le tala, e sau mai ia Iesu ina ua fetalai ia Iuta i le fa'alataina o ia. O le fetalaiga na amata mea ai le aga'i atu o Iesu i le satauro ma toe tu manumalo. A o le fetalaiga foi e pei o se mavaega, e fa'ailogaina ai le fa'amutaina o le mafutaga a Iesu ma Iuta.

O mea e tutupu i le taimi e fa'amutaina ai se mafutaga, pe lelei pe leaga, e iloa ai pe tatou te mafaufau pea i le mafutaga, pe tatou te aga'i pea i luma ma le filemu e pei e leai se mea o tupu. O taeao e maliu ai Iesu, ae mulimuli atu ai ma Iuta ina ua pule i lona ola. Ae ui i lea, o loo fa'atumulia pea Iesu i le alofa, aemaise mo e sa latou tu'ulafoaiina o ia, faatasi ai ma latou sa fa'alataina ma pu'eina o ia. O nei i le afiafi, ua toilalo le 'ausoo e mataala fa'atasi ma le Alii. A o taeao, o le a mataala fitafita i lona fa'asatauroina.

Tatalo: Ia tatou saili matagi i le Atua pe a o'o ina afea i tatou i faigata ma fa'afitauli tugã o le ola, **Amene.**

Aso Faraile Lelei (Good Friday)

Aso Faraile – Aperila 10: “La'au ma ma'a” *(Sticks and stones)*

Tusi Faitau – Mataio 27:32-50

Matua – ff.39-40: *“Ua faifai ia te ia o ē na ui ane, ma lialia'i o latou ulu, ua fa'apea mai, 'O oe na, o lē lepeti i le malumalu ma toe faia i aso e tolu, inã fa'aola ia oe ia te oe. Afai o oe le Alo o le Atua, inã alu ifo ia i le satauro.’”*

I le fa'asatauroina o Iesu, e masani ona taula'i lo tatou va'ai i le itu fa'aletino o le sauāga sa mafatia ai le Alii, e pei o le pale tuitui i lona ao, o le sasa ma le ta, o le tao i lona itu, ma isi mea sa matuā mafatia ai lona tino. A o le tusi faitau o lenei aso, o loo fa'amanatu mai ai foi le isi itu o le sauāga sa mafatia ai le Alii – o sauāga i upu faifai o tagata. E tele upu le manuia sa lalafo e tagata ia Iesu. O upu sa fetalai ai Iesu ma a'oa'o atu ai i tagata, a o lea ua toe lafo mai ma faifai mai ai tagata ia te ia. Fa'i le tigaina o lona tino i le sasa ma le ta ma le mamafatu o le satauro, ae tigaina ai foi ma lona loto ma lona mafaufau, ona o upu faifai o tagata. O le ata lea o loo aumaia e le 'au faievagelia e fa'aailoa mai ai, o le fa'asatauroina o Iesu, na matuā mafatia ai lona tagata atoa – i le tino, fa'apea le loto ma le mafaufau.

Masalo e faigata mo i tatou i nei ona aso ona feso'ota'i atu i le itu fa'aletino o sauāga sa feagai ma le Alii i le satauro, auā e le o se mea e tupu soo i o tatou vaitaimi. A o sauāga ona o upu faifai o tagata, e faigofie mo i tatou ona fesoota'i ai, auā o le mea o loo tupu foi i nei aso. O le fa'aupuga e masani ai le fanau, "E mafai e la'au ma ma'a ona gauia o'u ivi, ae e le mafai e upu ona fa'atigā a'u" – ua le toe talafeagai ma nei ona aso, aemaise i lenei vaitau ua faigofie ai le fesootaiga ma isi tagata i luga o le *social media*. O upu faifai ma upu tau fa'aleaga, e mafai ona matuā afaina ai le tagata, aemaise lava o tupulaga lalovaoa; e mafai ona i'u atu i ni taunu'uga mata'utia ma lē manuia.

O le itu lea o sauāga sa feagai ma le Alii i le taimi na fa'asatauroina ai, o loo fa'amanatu mai ai le tiga sa feagai ma le Alii ona o upu faifai ma upu fa'atigā. O lona maliu i luga o le satauro, o le fa'aailoga lea o lona itu fa'aletagata ma lona silafia lelei o le tulaga o le tagata, atoa ai ma ituaiga sauāga ese'ese o loo aofia ai.

Tatalo: Ia liliuina e lau afio ni upu ma tala ua fai ma sauāga i o matou olaga, ae maise o tigā o lo o totoe i o matou olaga, **Amene**.

Aso Toonai Paia (Holy Saturday)

Aso Toonai – Aperila 11: "Fua fa'ataau" (Calculated Risk)

Tusi Faitau – Mataio 27:57-66

Matua – ff.57-58: *"Ua o'o i le afiafi, ona sau ai lea o le tasi tagata mau'oa, o le Arimataia, e igoa ia Iosefa, o ia fo'i o le so'o o Iesu. Ua alu atu o ia i a Pilato, ua fa'anoi atu ai i le tino o Iesu. Ona fai atu ai lea o Pilato ia tu'u ane le tino."*

E pau lea o le vaega o le tala o ta'ua ai le tagata e igoa ia Iosefa le Arimataia. E 'au fa'atasi le molimau a le 'au faievagelia i le mea sa faia e Iosefa le Arimataia – i le ave ifo i lalo ma le satauro ma le tanuina o le tino maliu o Iesu. E i ai lava nai mea iti e eseese ai le molimau o le 'au faievagelia. A o ia mea iti, a tatou tu'u fa'atasia ona tatou maua lea o se ata atoatoa o le mea sa faia e Iosefa le Arimataia.

Fai mai le tala, o Iosefa le Arimataia o se tasi o so'o o Iesu, ae sa natia ma musu e fa'aailoa atu. O lana talosaga ia Pilato mo le tino maliu o Iesu, o se mea sa ono lamatia ai lona soifua pe ana iloa e tagata lautele. Peita'i, sa le mafai e Iosefa ona toe natia ona lagona mo Iesu. Molimau Luka, o Iosefa o se tasi o sui o le fono a le 'au Iutaia sa le 'au i le manatu e fa'asatauro ia Iesu (23:50-51). Sa ia fa'aalia ona lagona ma fa'aailoa lona manatu maumaututu e uiga ia Iesu i se 'auala lelei; sa leai foi ni ona uiga na iloa ai o ia o se tagata e tete'e pe fa'atuiese i le fono. O lona uiga, ua fa'alua ai i ona lamatia le soifua o Iosefa, ona o Iesu.

Peita'i, o gaioiga ia sa faia e Iosefa, o mea ua uma ona fuafua ma fa'atatau lelei. E le o se mea na fa'anatinati ona fai. Sa fua i luma, fua i tua. O nisi taimi tatou te lagona ai, e pau le filifiliga e ao ona tatou faia, o le puipuia o Iesu ma le malosi atoa, e tusa lava poo a ni mea e ono lamatia ai i tatou. Ae ua aumaia e Iosefa le Arimataia se fa'ata'ita'iga lelei, e ao ona tatou mafau fau pea i ai.

Mafau fauga: O a ni mea e ono lamatia ai lo tatou ola pe afai tatou te talanoa ia Iesu? Ia tatou fesili i le Atua mo le potu ma le lototele e fa'atino ai, **Amene.**

ESETA: FA'ATASI MA LE OSO A'E O LE LA **1 – Tafa Ata o le Aso Fou**

Aso Sa o le Eseta (Easter Sunday)

Aso Sa – Aperila 12: “Taeao o le ulua'i aso” (*Dawn of the first day*)

Tusi Faitau – Mataio 28:1-10

Matua – f.10b: “*Aua lua te matata'u; ina o atu ia, lua te ta'u atu i o'u uso, ina ia latou o atu i Kalilaia, latou te iloa ai a'u.*”

O le aso Sa o le Eseta tatou te fa'amanatuina ai le toe tu manumalo o Iesu mai le oti ma le tu'ugamau. O le taula'iga lea o le tala fa'a-Kerisiano. E faitau miliona tagata Kerisiano ua latou talitonuina lenei tala, ma ua latou fa'aaogāina e soifua ai i se olaga e fa'atumulia i le fa'atuatua, le fa'amoemoe, ma le agalelei atu i isi. To'atele ua suia ai o latou olaga – ua fa'amagaloina ai o latou agasala, fa'amalolo ai o latou mafatiaga, ma ua latou maua ai le to'afilemu e le mafai e upu o le gaganā ona fa'amatalalaina lona matagofie. O le toe tu o Iesu, o le amataga lea o le ola fou mo tagata uma. Ua tatafa ai ata o le foafoaga fou, ma ua avea le mana o le Atua sa fa'aalia i le toe tu e fai ma malamalama fou e susulu atu i tagata.

O le taeao na o atu ai fafine e asiā i le tu'ugamau, a ua latou fetaiā i ma le Alii toe tu i le f.10, lea na ia fetalai ai, “*O atu ia ma ta'u atu i o'u uso, ina ia latou o atu i Kalilaia, latou te iloa ai a'u.*” O le fa'aupuga, “*O atu ia...*” e fa'afia ona fa'aaogā i le tala atoa; e iloa ai, o le fa'atonuga foi lea mo i tatou. O le feau matagofie o loo tauiologolo mai e le tala i le toe tu o le Alii: “*Ua tatafa ata o le ola fou mo tagata uma ma le foafoaga atoa.*” E le o se tala la e nofonofo ma i tatou, ae tatau ona tatou “*O atu ia*” ma tauiologolo i tagata uma.

Tatalo: Le Atua e, ua avea le tala o le toe tu ma tala e fou ai mea uma. Ia matou iloa le mamana o le tala o le toe tu i o matou olaga i aso uma, **Amene.**

Easter Monday (Niu Sila ma Ausetalia)

Aso Gafua – Aperila 13: “Ala usu i le tu'ugamau” (*Coming to the tomb early*)

Tusi Faitau – Ioane 20:1-10

Matua – f.1: “*O le ulua'i aso o le vaisapati... ua alu ane ai Maria le Makatala i le tu'ugamau; ua va'ai atu i le ma'a ua ave'eseina mai le tu'ugamau.*”

Amata le tusi faitau o lenei aso i le ala usu o Maria le Makatala i le tu'ugamau o Iesu. E tatau ona tatou manatua, e le o aga'i atu Maria ma le fa'amoemoe na te maua atu Iesu ua toe soifua mai, e leai. A o Maria o loo aga'i atu ma le fa'anoa-

noa tele, e fia asiati atu i le tu'ugamau e fa'atino ai lona fa'anoanoaga. Ae na matuā fa'ate'ia lava ina ua taunu'u atu, a ua fulieseina le ma'a sa punitia ai le gutu o le tu'ugamau. Na ala usu lava Maria i le taeao, ae ua tuai atu, ona sa muamua i ai le Atua. Ua leva ona galue le Atua i le tu'ugamau a o lei taunu'u atu Maria.

Ioe, ua vave le galue o le Atua ae tuai le gaii o le tagata. E fa'apena le lagona lea e maua i le tala. Ua tamo'e Maria e ta'u le tala ia Peteru ma Ioane. Taufetuli Peteru ma Ioane e ta'u i le 'ausoo. O loo galue ma gaii le Atua i totonu o le tala, ae o loo taufetuli pea tagata e fa'afetaui. E faapena foi le olaga o le Kerisiano i le tele o taimi. O loo galue le Atua i luma atu o tatou, a o lea lava tatou te fa'atuai-tuai atu ma taufetuli solo i tua e fa'afetaui le Atua.

Tatalo: Le Atua, fa'afetai i le meaalofa ma le fa'amoemoe ua tu'uina mai mo i matou e ala i le toe tu. Ia matou mulimuli i lau ta'ita'iga i lenei aso, **Amene.**

Aso Lua – Aperila 14: “Fai fa’atoaga la’au fou” (A new gardener)

Tusi Faitau – Ioane 20:11-18

Matua – f.15b: *“A o le fafine, fa te ia o le leoleo ia o le fanua, ua fai mai ia te ia, Le ali'i e, afai ua e ave'ese ia te ia, ta'u mai ia ia te a'u poo fea le mea ua e tu'uina ai o ia; ona ou ave'eseina lea o ia.”*

Ua tutulu ma lē mautona Maria poo le a le mea ua tupu ina ua taunuu atu i le tu'ugamau. Ua fulieseina le ma'a ma ua avanoa le tu'ugamau, e foliga mai ua gaoia le tino o Iesu sa taoto ai. Ua matuā fa'aletonu lagona ma ua leai lava se mea ua toe lelei i le mafaufau o Maria. Peita'i, sa va'aia e Maria se tamaloa i le fanua. O le tala a le faievagelia o Ioane, sa masalomia e Maria o lenei tagata, o le fai fa'atoaga la'au o le fanua. E ui lava na toe iloa mulimuli ane e Maria o Iesu lea ua toe tu mai, peita'i, e i ai le uiga loloto o loo taoto i tua atu o le masalomia o lenei tagata o le fai fa'atoaga la'au o le fanua.

E amata tala o le Tusi Paia i le tala i le fa'atoaga la'au i Etena. O le fa'atoaga la'au lea o loo talatala mai ai le matagofie o le foafoaga sa i ai i le amataga, ma le mafutaga vāvā lalata o le Atua ma le tagata. Peita'i, o Etena foi tatou te maua ai tala o le tiga ma le mafatia na o'o ai le tagata, ona o le agasala. Ua ofi mai le agasala i le foafoaga ona o le le usita'i o Atamu ma Eva. Ua fa'aleagaina ai foi ma le matagofie o Etena sa i ai i le amataga.

O le Ioane e 20 sa tatou faitauina, o le tala foi i totonu o se fa'atoaga la'au, ma o Iesu o le fai fa'atoaga la'au fou. O Iesu na te amata mea i le foafoaga fou. O Iesu lea na soloiesea le loimata maligi o Maria, ma o Iesu fo'i na te ave'esea le loimata maligi mai o tatou fofoga. Tatou faitau ma ia iloa tala o tatou o fa'atoaga la'au ua aumai ma totō ai e le Atua le ola fou.

Tatalo: Fa'afetai Iesu ina ua ave'a lau afio ma fai fa'atoaga la'au lelei, sa totōina le fatu lelei i o matou ola. Matou fa'algolago i le ola fou mai lau afio, **Amene.**

Aso Lulu – Aperila 15: “Faiva o le vaveao” (Dawn catch)

Tusi Faitau – Ioane 21:1-8

Matua – ff.5-6: *“Ona fetalai atu lea o Iesu ia te i latou, ‘Le fanau e, pe i ai ea ni a outou mea e ‘ai?’ Ua latou tali mai ia te ia, ‘E leai’. Ua fetalai atu o ia ia te i*

latou, 'Inā lafo ia le upega i le itu taumatau o le va'a, ona outou maua ai lea.' Ona latou lafo lea; a ua le toe mafai e i latou ona toso a'e, ona ua tumu i i'a."

I le tusi faitau o lenei aso, ua a'oa'o e Iesu le fai faiva i le 'ausoo, a o le 'ausoo ua leva ona latou ola ma soifua i lea matātā o le fai faiva. E ui o se matātā ua leva ona latou silafia ma ola mai ai, ae e lei manatu mama le auso'o i le fa'atonuga a Iesu. Ua latou usita'ia ma fa'alogo i le fa'atonuga a Iesu e lafo le upuga i le itu taumatau o le va'a, ma o lea na latou tali manuia ai i le tele o le i'a.

O le tupu olaola o le misiona a le Ulu'a'i Ekalesia ma le 'au Kerisino, sa manuia ona o lo latou usita'i ma ma lo latou fa'alagolago i le Alii, e pei ona a'oa'o mai ai le tala. O le manuia foi lea o le galuega tala'i a le Ekalesia i nei ona aso. Ua fa'amanatu mai e lenei tala, e tatau ona sui a tatou fuafuaga pe a vala'au Iesu i se mea tatou te faia, e tusa lava pe tatou te manatu e sili atu lo tatou iloa.

Tatalo: Le Atua fesoasoani mai ina ia mafai ona ou talia lau vala'au i so'o se mea ua e finagalo ai ina ia ou faia, e tusa lava po le a lo'u iloa, **Amene.**

Aso Tofi – Aperila 16: “Tauiviga se'ia tatafa ata o le aso fou”

Tusi Faitau – Kenese 32:22-32 (*Wrestling until the break of day*)

Matua – f.28: “*E le toe ta'ua lo'u igoa o Iakopo, a o Isaraelu, auā e pei o se ali'i ua e finau i le Atua atoa ma tagata, ma ua e manumalo.*”

E taūa igoa i totonu o le Tusi Paia. E tofu foi i tatou ma igoa sa fa'aigoaina ai i tatou i le taimi na tatou fananau ai. O le totonuga o le avea ma tagata soifua, o le fa'anaunauga mo se igoa – e iloa ai le mafuaaga o le ola ma le fa'asinomaga moni o le tagata. I le tusi o Kenese, tatou te maua ai le tala ia Iakopo, sa taumafai malosī lava e faia sona igoa, ae tau lava o le Atua sa fa'alavelave i ona fuafuaga.

Na amata le olaga o Iakopo o tauivi. O ia o le masaga, ma o totonu lava o le manava a lona tinā na amata tauivi ai ma lona uso Esau. Na fanau mai Iakopo o u'u le mulivae a lona uso o Esau, lea e mafua ai lona igoa o 'Iakopo,' o lona uiga, “*o le u'u mulivae.*” I le Kenese 32, a o loma le taeao e feiloa'i ai ma lona uso o Esau ua leva ona valavala talu ona ave fa'atogafiti le tofi o le ulumatua, faimai e i ai le tagata na tauivi ma Iakopo i le po atoa seia o'o na tatafa ata o le aso fou. E le o manino i le tala poo ai tonu lenei tagata. Ae i le fa'aiuga o le tala, na valaau e Iakopo lenei tagata i le igoa e masani ona fa'aigoa ai le Atua (*elohim*). O lona uiga, e le gata sa tauivi Iakopo ma lona uso talu ona fanau mai, a o lea foi ua o'o i le Atua o tauivi ai. Tauluga le tala ina ua fa'aailoa lenei tagata, ua fa'amanuia ia Iakopo, ma avatu ai ia te ia lona suafa fou. O le Atua, e ala i lona alofa tunoa, na te aumaia le suafa fou e fa'aigoaina ai i tatou, e ala i le fa'atuatua ia Iesu Keriso. A o'o mai le i'uga, pau a lea o le suafa e sili ona taūa.

Tatalo: Le Atua e, i ou iloa na faia o a'u i lou lava fa'atua, o lo'u fa'asinomaga na maua mai i lau afio, ina ia ou maua ai lou alofa tunoa, **Amene.**

Aso o le Fu'a – Amerika Samoa

Aso Faraile – Aperila 17: “Laveaiina ina ua tatafa ata”

Tusi Faitau – Tanielu 6:16-24 (*Rescue at the break of day*)

Matua – ff.19-20: “*Ua tula’i le tupu i le vave ao, ua fa’atalise atu i le lua o leona. Ua o’o ia i le lua, ona alaga atu lea o ia ma leo fa’amamai ia Tanielu; ua fai atu le tupu, ua fa’apea atu ia Tanielu, ‘Tanielu e, le auaua a le Atua soifua, ua mafai ea e lou Atua, o lē ua e auaua i ai e le aumoa, ona lavea’i ia te oe ai leona?’”*

Tanielu i le lua o leona, o se tasi nei o tala o le Tusi Paia ua lauiloa e le to’a-tele. Ua loto leagaina Tanielu ma ua tu’uaiina e o’o le oti ia te ia. E o’o i le tupu sa fiafia tele ia Tanielu, ua na le mafai ona toe fa’afai mai lona malelega, ua fa’aliliu e tagata loto leaga e mailei ai Tanielu. Ona ave lea o Tanielu i le lua o leona e fa’asala ai i le oti, ma ua ava’e le ma’a tele e ufiufi ai le lua.

Ua o’o Tanielu i lea tulaga mata’utia ona o lana talitonuga i le Atua. Sa maua atu Tanielu o tatalo i le Atua, ae ua mae’a ona fa’asaina e le tulafono. E fa’apea foi le tulaga o loo tupu i le tele o Kerisiano i nei ona aso, ua saūaina ona o le fa’ailoa atu o lo latou talitonuga i le Atua. Tatou tatalo pea mo i latou, ina ia latou maua se laveaiina e pei ona maua e Tanielu, ina ua tatafa ata o le aso fou, ae sau le Atua e lavea’i i latou mai mea tiga uma.

Tatalo: Le Ali’i e Iesu, ia laveai mai i latou ua sauaina e pei ona faia ia Tanielu. Ina ia o latou iloa le fa’amoemomoe o le aso fou, **Amene.**

Aso Toonai – Aperila 18: “Ala mai, lo’u agaga” (*Awake, my soul*)

Tusi Faitau – Salamo 108:2-3

Matua – ff.2-3: “*Ala mai ia le napeli ma le kitara, ou te ala i le taeao lava. Le Ali’i e, ou te vivi’i ia te oe i luma o le nuu, ou te fai pesega fo’i ia te oe i luma o tagata.”*

E i ai tagata e maua i le gasegase lea o le “moe savali” (*sleepwalking*). E moe le mafaufau, ae gaioi le tino e ala i le savavali o vae. E iloa le tagata e maua i le gasegase lea, ina ua alafa’i ane ae ese le nofoaga o loo i ai. Sa moe i le potu i le po, ae ala ifo i le taeao ua i le umukuka. E ui o se gasegase, a o le upu moni lava, e to’atele tagata e “moe sasavali” i le olaga lea tatou te ola ai – ua na o le gaioi o le tino, ae moe le mafaufau.

E tele ni mafuaaga ua ala ai ona “moe savali” le tagata i le olaga i nei ona aso. O le tele o le pisi i galuega fai, o le taumafai e fa’amalie le va’a mai o isi tagata, poo le musu foi e talia le mea moni o le soifuaga o loo i ai nei. O le tusi faitau o lenei aso, o le vala’au ina ia tatou feala mai le “moe savali” lea tatou te faia i le olaga nei. “*Ala mai, lo’u agaga,*” o le vala’aulia mo i tatou e saili le ola e fesoota’i atu i le Atua, o lē na faia i tatou ma alofa mai mo i tatou.

Tatalo: Fafagu mai le Atua ia te a’u, ina ia ou ola i le olaga ua ofoina atu atoa i lau afio, **Amene.**

ESETA: FA’ATASI MA LE OSO A’E O LE LA

2 – Ala Usu

Aso Sa – Aperila 19: “Le faiai i le 3 i le vaveao” (*The brain at 3 a.m*)

Tusi Faitau – Kenese 19:15-28

Matua – f.15-16a: “*Ua malama a’e le taeao ona nanati lea o agelu ia Lota, o loo fa’apea atu, ‘Inā tula’i ia, ave lau avā ma ou afafine e to’alua o loo i’inei, ina ne’i*

malaia oe i le sala a le a'ai.' Ua fa'atua'itua'i o ia, ona fetagofi lea o ia tagata i lona lima....ina ua alofaina o ia e le ALII..."

Sa i ai se tasi o faifeau ua leva i le galuega, a sauni lana lauga, e ala i le 3 i le vaveao o le Aso Sa ma manatu fou e fafau ai lana lauga. O lana faiga masani lea ua ia talitonu ai, o le 3 i le vaveao, o le taimi lea o le Agaga Paia. A o le mea e ofo ai, ua i ai su'esu'ega fa'asaianisi ua fa'amaonia le talitonuga lea a le faifeau.

Faimai le saianisi, o le faiai e galue malosi i le taimi e moe ai le tagata. O le taimi e moe ai, e galue le faiai e fa'aliliu manatunatuga lata mai ma manatunatuga o mea ua leva ona tutupu, fa'atasi ai ma le fa'afoeina o galuega e toe fa'aleleia ai ma fa'afouina ai le malosi o le tino. O le mafaufau e fatufatua'i ai manatu, o le galuega lea a le faiai e malosi i le taimi tonu e ala mai ai le tagata. Ma, o le taimi lea e ala mai ai le tagata, e faigofie ai i le mafaufau ona fa'afesootai manatu ma lagona. O le mea lea, a tatou feala i le 3 i le vaveao, e faigofie ai ona tatou lagona le musumusuga mai o agelu, e tusa lava poo se musumusuga fa'a'ailo, poo se musumusuga tu'u sa'o mai i le Atua.

E tele fa'a'ailo o le a tatou faitau ai i tusi faitau o lenei vaiaso. O le a tatou fetaia'i ma Aperaaomo, Lota, Iopu, ma Iesu i le taimi o le vaveao. O nisi o latou o le a tatou maua atu i le vaveao, o loo matua mafatia lava. A o isi, o le a maua atu ua nofo sauniuni lelei mo feau ma galuega o le aso fou.

O le tusi faitau o lenei aso o le vala'au ia Lota na sau i le vaveao – o le fa'a'ailo o le alofa – ua laveaiina ai o ia mai le fa'asalaga na o'o ia Sotoma ma Kumoro. O a ni fa'a'ailo o le alofa e te silafia o loo sailia oe, i le 3 i le vaveao?

Tatalo: Le Leoleo lelei e, pese lau afio ae se'i ou moe, ma toe fafagu mai a'u ina ia ou mata'ala. Galue lau afio i ou mafaufauga loloto i le po, e tapena ai a'u feau ma galuega o lenei aso fou, **Amene.**

Aso Gafua – Aperila 20: “Le Atua o loo silasila” (*God who sees*)

Tusi Faitau – Kenese 21:8-20

Matua – ff.12a, 13b, 20a: *“A ua fetalai mai le Atua ia Aperaaomo, ‘Aua e te tiga ona o le tama, ou te fai o ia ma tupuaga o se nu'u, auā o lau fanau ia.’ Sa i ai le Atua i le tama; ua tupu fo'i o ia.”*

Masalo na fa'aali le Atua ia Aperaaomo i le 3 i le vaveao i le aso na ia tu'u-lafoai ai Akara ma Isamaeli. Auā e o'o atu i le taimi na tatafa ai ata o le aso fou, ua leva na nofo sauni Aperaaomo. O se galuega fa'atuatuaina.

E mafai ona nenefu le va'ai i mea e tutupu i le 3 i le vaveao. E galue malosi le faiai e tau fa'avasega le uiga o mea e tutupu. O isi taimi ua taumafai e fa'alau-leleia vanu ma fa'amafolafola mauga. A o isi taimi, ua taumafai le faiai e saili se fofō o se fa'afitauli, e ui o se fa'afitauli ua siliga i tali i seu le fa'amoemoe. Sa manatu Akara, ua na o le oti lava e mafai ona fofō ai lona fa'afitauli. E leai se matua e faitau atu i lenei tala e aunoa ma ni lagona fa'anoanoa ona o le lafoa'iina o Isamaeli e oti i le vao. Peita'i, e lei iloa e Akara le folafolaga a le Atua sa faia ia Aperaaomo, e pei ona aumaia e upu ia ua avea nei ma matua. Sa lelei lava le va o Akara ma le Atua. I le Kenese 16:13, ua na o Akara i le Tusi Paia atoa, sa vala'auina le Atua i le suafa, **EL-roi**, o lona uiga, *“o le Atua o loo silasila.”* Ma o lea, ua fa'asilasila ai Akara e le Atua, i le vaieli ina ia ola ai i la'ua ma Isamaeli.

E tele mea ogaoga e tutupu pea i le soifuaga. E tu'ulafoa'iina i tatou e tagata ona o mafuaaga tatou te le mailoa. Peita'i, e le tu'ulafoaiina i tatou e "le Atua o loo silasila." O le taimi o le po e pito sili ona pogisa ai, o le taimi lea i le vaveao a o lei tatafa ata. A o le mea e sili ona fa'afetai ai, e o'o mai lava le tatafa o ata. Tatou filifili e talitonu i le folafolaga: e i ai le Atua ma i tatou.

Tatalo: Le Atua e silafia mea uma, i taimi o le pogisa ma le le mautonu, liliu atu o matou mata ina ia matou iloa le vaieli e aumaia ai le vaiola, **Amene.**

Aso Lua – Aperila 21: “E te mana’o ou te faia le a?” (*You want me to do what?*)

Tusi Faitau – Kenese 22:1-14

Matua – ff.1a-2: *“Ua mavae ia mea, ona tofotofa lea o le Atua ia Apera’amo, ona fetalai mai lea o ia, ‘Ia e ave lou atali’i, o lou atali’i e to’atasi, o le ua pele ia te oe, o Isaako lava, ma e alu i le nu’u o Moria; ma avatu ia te ia e fai ma taulaga mu i lea mea i le tasi mauga ou te ta’uina atu ia te oe.”*

O le tala i le avega o Isaako e osi ai le taulaga, e le o se tala e fiafia ai le to’atele. Fetalai le Atua ia Aperaamo (masalo o le 3 i le vaveao), *“Ia e ave lou atalii...”*, ma na fa’apena lava ona faia e Aperaamo. Masalo e lei silafia e Sarai lenei mea ua faia e Aperaamo. Auā ana silafia, masalo e vavao e Sarai. A leai, po ua nofo Sarai ma fasioti ia Aperaamo, e puipui ai lana tama o Isaako.

Ae ui i lea, o nisi ia o mafuaaga e le fiafia ai le to’atele i le tala lea. Muamua, o loo aumaia ai se ata o le Atua e tofotofa i tagata. Peita’i, o le olaga e tofotofaina i tatou, ae le o le Atua. Lua, o loo aumaia ai le ata o le Atua ma Aperaamo, e fa’asaua i tamaiti. Tolu, o loo fa’amautuina ai le vala’au fa’a-militeri, e ofoina atu le soifua o tupulaga talavou e puipui ai atunuu ma faigamalo.

Peita’i, e ui i se le fiafia o nisi i lenei tala, a o le tala lenei o loo fai ma tala autu i tapuaiga tetele e 3: o le tapuaiga fa’a-Iutaia, o le tapuaiga fa’a-Musalema, ma le tapuaiga fa’a-Kerisiano. O le avega o Isaako e osi ai le taulaga, o loo fa’aatata mai ai Iesu, o le taulaga mo agasala o le lalolagi.

Tatalo: Le Atua e afua ai le alofa, ia tatala e lau afio la matou fa’alogo ina ia mafai ona matou fa’ataunu’uina lou finagalo mo i matou, **Amene.**

Earth Day (Aso o le Siosiomaga) – 50 Tausaga

Aso Lulu – Aperila 22: “Tagi ‘Auvale” (*Lamentable*)

Tusi Faitau – Iopu 7:4-19

Matua – ff.7b, 11: *“E le toe iloa e o’u mata se mea lelei, o le mea lea ou te le taofi ai lo’u gutu, ou te tautala i le puapuaga o lo’u agaga, ou te tagi atu i le tiga o lo’u lotu.”*

A o’o ina tutupu fita ma faigata, e pau lava le tali o le sa’i. Iopu, ina ua le maua se moe i le po atoa, ua leiloa fa’avasega pe fa’apefea ona taunuu mai lona olaga i fita ma faigata o loo feagai ai nei: ua maliliu uma lana fanau, ua ave fa’agaai ana lafu manu, ua fasiotia ana auauna. Fautua lana uo o Elifasa ia te ia, *“Iopu, e leai se isi e ta’usalaina fua: talia le fa’asalaga ma aga’i pea i luma.”* Peita’i, ua silafia lelei e Iopu, e leai sana mea sese na fai ua mafua ai fita ma faigata ua o’o nei ia te ia.

O le muimui tautalatala, o le sa'i lea. O se faiga ua seāseā toe v'aaia i totonu o ni 'aulotu, ae e masani tele ai le tusi o Salamo. E tele atu pese o loo sa'i ai le fai Salamo i totonu o le tusi o Salamo nai lo se isi lava itu'aiga pese. O le uiga moni o le sa'i, o le tu'u atu lea i le Atua o mea uma o loo tatou tiga ai, sei tali mai ai o Ia. O se gaiogiga e tatau ona fai, ina ia faigofie ai ona talia i le loto ma le mafaufau o le tagata, le tiga ma le matuitui o mea faigata o loo feagai ai.

Tatalo: Le Atua o taimi ma aso uma, fa'alogo i le tagi a le lalolagi ma ona tagata, ma se'i e tali mai i o matou fa'anoanoa, **Amene.**

Aso Tofi – Aperila 23: “O le itula o le Agaga” (*The Spirit's hour*)

Tusi Faitau – Salamo 119:145-152

Matua – ff.147a, 151a: *“Ua muamua i le tafa o ata ona ou alaga atu; ua latalata mai oe, le Ali'i e.”*

O le 3 i le vaveao – o le taimi o le Agaga. I tusi faitau ua mavae atu, sa tatou va'ava'ai i taimi o le fa'apupulaina ma taimi o le tiga e masani ona tula'i mai i le vaveao. Ae ua fa'amanatu mai le fai Salamo i le tusi faitau o lenei aso, o le taimi foi lea o le vaveao, o le taimi o le tatalo. E tele taimi e lagona ai faigata o le ola, ma tau saili ai ni 'auala e fofo ai ia lagona. Peita'i, i lenei Salamo, e maua ai mafaufauga lelei. O tatou mafaufauga loloto, ia tatou tatalo mo le filemu o le Atua ae maise ai o lona lotolotoi fa'atasi ma i tatou. E pei ona ofoina o le tatalo a le fai Salamo i luma o le Atua, o le taimi o le Agaga tatou te liliu ai i le Atua ma manatua ai le Atua e latalata mai.

Tatalo: A'oa'oina i matou i le tatalo ma matou tausii ai i aso uma, matou te maua ai pea le mafutaga ma le Agaga i taimi uma, **Amene.**

Aso Faraile – Aperila 24: “Miti pea” (*Dream on*)

Tusi Faitau – Kenese 40:5-19

Matua: f.8b: *“Ona faiatu ai lea o Iosefa ia te i laua, 'E le o i le Atua ea fa'amatalaga? Ina tala mai ia ia te a'u.”*

O le miti na mafua ai ona o'o Iosefa i Aikupito, ina ua fa'ailoa lana miti i ona uso ma latou taumafai ai e lafoa'i ia te ia. Sa avea foi Iosefa ma tagata va'ai i le fale o Potifara. Ae na mulimuli ane avea ma pagota ona o lona le taliaina o le mana'o o le avā a Potifara. Sa ia fa'amatalaina foi le miti a se tasi sa i ai fa'atasi ma ia i totonu o le falepuipui. Ae mulimuli ane, ona avea lea o ia ma tagata va'ai i le maota o Farao ina ua ia fa'amatala ma tali i le mana'o o Farao. I le fa'aiuga o le tala, o lona fa'amatala miti, ua lavea'i ai foi lona aiga mai le oge.

E le fesiligia le 'auai o le Atua i a tatou miti. O le finagalo o le Atua ia maua lona filemu i le lalolagi, fa'atasi ai ma alofa le fa'atuaioia. Ina ia fa'ailoa o tatou mafaufau, ua avea le miti ma malosiaga i o tatou olaga e ala i le fa'ataunuuna.

Tatalo: Le Atua e, ia matou iloa ona fa'ataunuu o lou finagalo mo i matou e ala i a matou miti, **Amene.**

Aso Toonai – Aperila 25: “Taeo segisegi” (*Early in the morning*)

Tusi Faitau – Mareko 1:35-39

Matua – f.35: “O le taeao ua ala po ai o ia, ona ulufafo lea o ia ma maliu atu i le mea tu’ufua, ma tatalo ai.”

E i ai le taūa i le taeao po a o lei oso le La i lona tafa’ilagi. E na te aumaia le filemu i o tatou lagona. E faapena se lagona na va’aia e Iesu ina ua ia va’aia le malamalama o le taeao fou – o se mea’alofa. O le taimi tonu lea e feso’otai atu ai i lona Tamā ma molimau ai i le aso fou ua foa’iina, a o le a se mea ua ia finagalo ina ia faia. E molimau le ‘au faievagelia, sa tu’ua e Iesu le nofoaga i le taeao po, ina ia mafuta atu i lona Tamā.

I le molimau a Matini Luteru, “e tele loa ni ana galuega e fa’atino, ona ia fa’aogāina lea o le tolu itula muamua o le aso e tatalo ai i le Atua. Auā o le tele o lona pisi, o le tele fo’i lea o le filemu o le Atua e na te mana’omia. O le malosi ma le ‘auai o le Atua i ana galuega, e tapena ai o ia mo galuega o le aso.”

Tatalo: Le Atua foafoa, vala’au mai ma feso’ota’i mai lau afio; atoa ai ma mea uma na e faia. Ina ia ou ola ma alofa e pei ona e finagalo ai, **Amene.**

1 & 2 TESALONIA 1 – O Galuega o le Alofa

Aso Sa – Aperila 26: “Va’ai i tua, va’ai i luma” (*looking back, looking forward*)

Tusi Faitau – 1 Tesalonia 1:2-3

Matua – ff.2-3: “Matou te fa’afetai pea lava i le Atua, ona o outou uma lava, o loo ta’uta’ua outou i a matou tatalo. E le aunoa ona matou manatua la outou galuega i le fa’atuatua, ma le fa’amalosi i le alofa, ma le tumau pea i le fa’amomoe i lo tatou Ali’i o Iesu Keriso, i luma o le Atua o lo tatou Tamā lea.”

O le tusi lenei o mea ua manatuina. Ua manatua e Paulo ana uo i Tesalonia. Sa amatalia lo latou olaga fa’a-Kerisiano i tiga ma faigata. Ina ua tauto ma ofoina atu mo le Tala Lelei, sa latou fetai’i ma faigata, i tagata o le nu’u ua latou tete’e i le Tala Lelei. O le tusi la lea a Paulo ia Tesalonia, o le to manatu o Paulo i le ‘au Kerisiano i Tesalonia, i le agaga o le fa’anoanoa fa’atasi ai ma le mitamitaga, i faigata sa fetai’i ma i latou ma lo latou loto tetele e fa’afesaga’i ma ia faigata. Na fa’aailoa e Paulo le manatuina o i latou i talosaga, ma le fa’afetai i le Atua i fa’aailoga sa ia molimau i ai e ala i le galuega a le Agaga Paia mo i latou.

O le ola fa’amoemoe i le mea sa amata e le Atua, e fa’apena ona Ia lagolagoina. O le isi lea vaega o le Tala Lelei na aumai e Paulo – o le ola fa’atalitali. Fa’atalitali i le Atua e galue mai, e tulimata’i ai lo tatou lumana’i, ona maua lea e le fanau a le Atua le malosi. O loo i ai nisi vaega o le lalolagi o loo leotele ai lenei mataupu, i le ola lamatia ona o la latou talitonuga i le Ali’i o Iesu. Ia tatou manatua pea nei tagata ma ia nofoaga i a tatou tatalo.

Tatalo: Ia i ai le alofa mausali ma le filemu o le Atua i ē o sauāina ona o lo latou ola talitonu ma le fa’atuatua i le Atua soifua, **Amene.**

ANZAC Day (Niu Sila/Ausetalia)

Aso Gafua – Aperila 27: “A’oa’o ma talitonu” (*Teach and trust*)

Tusi Faitau – 1 Tesalonia 2:1-12

Matua – f.8: *“Sa fa’apea lava lo matou maelega i le alofa ia te outou, na matou mana’o i le fia avatu ia te outou e le na o le talalelei i le Atua, a o matou lava ola fo’i, auā na alofaina outou e i matou.”*

E amana’ia e tagata lo tatou fa’atuatuga pe afai latou te talitonuina i tatou. E fa’apea le tulaga sa i ai le vaitau o le Feagaiga Fou. O le ta’uleleia o le talalelei fa’aKerisiano, sa fa’alagolago i ē sa fa’amatalaina ma fa’asoaina atu lenei tala. O le amio o le ‘au Kerisiano sa ta’uleleia ai. O le amio sa’o sa talitonuina ai. O uiga tausaaafia foi, sa lagolagoina le moni o le Tala Lelei i le va’ai mai o tagata ese.

A o upu ia ua aveva ma matua i lenei aso, e lei tusia ina ia tauleleia ai le fa’a-Kerisiano i tagata ese. Peita’i, sa tusia mo le ‘au Kerisiano fou i Tesalonia, e fa’amanatu ai le amio ma uiga lelei o tagata ia sa aumaia le Tala Lelei ia te i latou. O le fa’amoemoe, ina ia fa’amalosia ma toe lalaga le fesootaiga i le va o tagata, ia avatu se ata fa’ata’ita’i o le olaga e mulimulita’i ai le ‘au Kerisiano i Tesalonia, ma ia fa’aali atu ia te i latou, o le olaga fa’a-Kerisiano o se olaga e sili ona lelei.

Tatalo: Le Alofa e, ia fa’afouina lo’u alofa mo i latou ua matou mafuta. Fesoasoani ina ia ou iloa ona fa’amaoni e pei ona faia e Iesu, **Amene.**

Aso Lua – Aperila 28: “Fa’amanuiga ma manu’aga”

Tusi Faitau – 1 Tesalonia 2:13-16 (*Blessing and bruises*)

Matua – f.13: *“O le mea lea matou te fa’afetai ai i le Atua, o i matou lava e le aunoa, auā na talia e outou le afioga le Atua na outou fa’alogo mai ai ia i matou, ua le talia e outou le upu a tagata, ae peita’i o le upu a le Atua, (e moni lava lea), ua matuā galue fo’i lea i totonu ia te outou o e fa’atuatua.”*

O tusi i aso ua mavae sa amata muamua i le agaga fa’afetai, e pei ona i ai le tusi lenei (1:2). Ua tumu Paulo i le fiafia ona o le ta’utinoga a ana uo i Tesalonia, ma le fa’aailoa atu lea o lo tatou ola fa’atuatua i le Atua. Manatu Paulo, o lo latou malosi e fai ai le galuega e mai le Atua lea, e ala i le malosi ma le fa’amaoni o le Tala Lelei a le Atua e ala i le Ali’i o Iesu Keriso.

Ua fa’aailoa e Paulo i ana uo le malosi o a’afiaga o le galuega, e pei foi ona i ai le tauiviga a le lotu i le a’ai paia i le fete’ena’i ai ma ta’ita’i o le lotu ma salalau atu ai i nu’u ese. O le tele o manu’aga a Paulo i le galuega, sa mafai ona manino i ana tusitusiga. Ae o loo taumafai pea ina ia tumau i le fa’atuatua, ina ia fausia ai se so’otaga e ala i le ola pulea ma le ola filemu ma tagata Iutaia.

Tatalo: Le Talalelei a Iesu, ia fai ma fa’amalosi i o matou olaga, ma aumaia le onosa’i ma le poto, pe a o’o ina taia i matou i lu’itau o le ola fa’atuatua, **Amene.**

Aso Lulu – Aperila 29: “Vāvā mamao ma mana’oga” (*Distance and desire*)

Tusi Faitau – 1 Tesalonia 2:17–3: 5

Matua – ff.19-20. *“Auā se a ea so matou fa’amoemoe, ma se fiafia, ma se pale e mitamita ai? E le o outou ea i luma o lo tatou Ali’i o Iesu Keriso, i lona afio mai? Auā o outou lava o lo matou vi’iga ma lo matou olioli.”*

Ua tu'ua e Paulo Tesalonia, ae sa lagona lona fa'anoanoa ona o le mamao o le mea lea o le a aga'i atu i ai. Ua mana'o pea o ia e fia feiloa'i i ana uo i Tesalonia. Sa manatu o ia o loo feagai pea i latou ma le malosi o finauga fa'aleagaga, ina ne'i avea nei malosiaga leaga e ta'ita'i sese ai i latou, ma ua ia manatu ai e tatau ona toe foi e lavea'i i latou. Lea na ia auina atu ai Timoteo, lana fesoasoani, mo Tesalonia. Timoteo o se tagata e amio tausa'afia, ma e mafai ona avaga mai ai loto o tagata. E na te avea le feau i se 'auala e filemu e aunoa ma se vevesi, ina ia mafai ai ona latou u'u mau i le ola fa'atuatua.

I le Feagaiga Fou, e tãua tele le ola feso'ota'i o Ekalesia, e tusa lava po le a le vãvã mamao. O le naunauta'iga fo'i lena o le au Kerisiano i le aso o le toe afio mai o Iesu, ina ia tatou fa'asoa fa'atasi ai i mea sa tatou faia i le lalolagi ina ia tatou maua fa'atasi le olioli i le lagi.

Tatalo: Manatua pea i latou e pele o loo matou valavala mamao, tatalo mo latou uma ae maise ai ni fa'afitauli o feagai ma i latou, **Amene.**

Aso Tofi – Aperila 30: “Talalelei o le olioli tele” (*Good news of great joy*)

Tusi Faitau – 1 Tesalonia 3:6-13

Matua – ff.11-12: *“A ia ta'ita'iina la matou malaga ia te outou e le Atua lava, lo matou Tamã, atoa ma lo matou Ali'i o Iesu Keriso. Ia fa'atele fo'i e le Ali'i, ma ia fa'asilisili ona tele o lo outou alofa, o le tasi i le tasi, atoa ma tagata uma, fa'apei o i matou nei lava ia te outou.”*

Ua toe foi ane Timoteo mai lona malaga e asiasi atu ai i Tesalonia. O le taimi foi lea o loo i ai Paulo i Korinito. Matagofie le ripoti a Timoteo i lana asiasiga. O le 'au Kerisiano fou i Tesalonia, ua latou taofi mau i le fa'atuatua ma ua latou ola fealolofa'i o le tasi i le tasi. Ua avea lenei molimau e fai ma fa'amalosi loto ia Paulo, ma mea ua atili ai ona tatalo Paulo mo i latou. Ona o lana upu o loo tumau i o latou loto, ma ua fai ma la'au ua fua tele mai.

I le vaega o le tusi ua fai nei ma matua, ua fa'aigoaina lenei fuaitau o le 'tatalo fa'amanuia.' E le masani ona va'aia lea ituaiga tatalo i tusi nei e lua a Tesalonia. Ae ua mafua ona fa'apea se manatu, ona o le fa'aupuina. E ui i ni popolega sa i ai, ae na maualuga lava le manatu o Paulo ia Tesalonia, o tagata ua lagolagoina e le Atua e mulimuli ma le loto atoa i le ala ua uma o tapena lelei. Ma o le fiafiaga tele lena o Paulo e tusa ai ma le molimau sa tu'uina mai e Timoteo.

Talosaga: Ia manatua se tala fiafia sa olioli ai lou loto, ma ia fa'afetai i le Atua mo le uiga o lea tala mo oe, **Amene.**

Aso Faraile – Me 1: “Ola mo le Atua ma lou tua'oi”

Tusi Faitau – 1 Tesalonia 4:1–12 (*Living for God and neighbor*)

Matua – f.1: *‘O lenei, le au uso e, o le toe upu lenei, matou te aioi atu ma apoa'oa'i atu ia te outou ona o le Alii o Iesu, fa'apea ona talia e outou mai ia te i matou le uiga o le ala e tatau ona outou savavali ai, ia fiafia mai ai le Atua ia te outou, ia fa'asilisili pea i ai outou’.*

E to'atele tagata i Tesalonia ua tu'uina atu o latou loto i le Alii. Peita'i, e i ai nisi e tatau ona toe a'oa'o atu, ina ia fa'asa'o ai le olaga fa'atuatua, ma le olaga

fetausia'i. O le feusua'iga ma le faita'aga, o loo fa'asesēina ai tagata. O tu ma aganu'u a Roma, fa'apea Eleni, e le matua manatu tele i le soifuaga fa'aulugali'i. A o lea ua fa'amanatu atu e le Aposetolo le taūa o le olaga o le tagata ua mafuta fa'atasi i le olaga fa'apaiaina.

O le mea taūa le fa'asoa atu o le alofa, o le tiute mo tagata uma. O nisi taimi ua fa'asoa atu le alofa i tuafafine ma uso i mea o mo'omia. Peita'i, o le toatele o tagata Tesalonia ua fiafia e maua mai le tamāoaiga o tagata alolofa, o tagata o loo atagia ai le fa'atamala, ma le nofo fa'asamasamanoa. O le manatu o le Aposetolo, ina ia 'aua le faia fa'apea le olaga, a ia taumafai le tagata e atia'e i ona lava lima ma ona taimi, ma ia le matitiva i latou i se mea e tasi.

Tatalo: Le Alii e, seia e fa'atumuina o tatou loto i lou tamāoaiga, fa'apea le leoleoina o matou loto ua vaivai ma fa'atamala, **Amene.**

Aso Toonai – Me 2: “Fa'anoanoa i le fa'amoemoe” (*Grieving in hope*)

Tusi Faitau – 1 Tesalonia 4:13–18

Matua – ff.13-14: *'Matou te loto ina ia outou iloa, le au uso e, e uiga i e o momoe, ina ne'i outou fa'anoanoa, pei o isi e leai so latou fa'amoemoe. Auā afai ... ua maliu Iesu ma toe tu mai, e fa'apea fo'i ona aumaia e le Atua fa'atasi ma ia e o momoe ona o Iesu.'*

O le isi nei o faigata sa tauivi ma le 'au Kerisiano fou i Tesalonia: o le fa'anoanoaga. O le a se tala a le fa'atuatua e mafai ona fai pe a to'esea sē ua pele ona o le oti? O fea e aga'i ai i latou pe a maliliu? O le a so latou fa'amoemoe mo le ola e fa'avavau? E fa'apefea i latou pe a toe afio mai Iesu? O lenei fa'amoemoe, i le mamalu o le Atua o le a molimauina e le lalolagi, e tupu ai le fa'anoanoa pe afai e le mafai ona 'auai ai le 'au uso ua maliliu.

I lenei fa'anoanoaga ma le le mautonu o lagona, e lei fa'aitiitia upu a Paulo i le apoapoa'i atu i le fa'anoanoaga ona o ē pele ua maliliu. O le manu'a o le loto ona o le to'esea o ē pele e loloto lona tiga. Peita'i, e mafai pea e le Kerisiano ona fa'ailoa atu le 'fa'amoemoe', ina ia va'ava'ai atu i le lumana'i ma le fa'atuatua. O le satauro o Keriso Iesu o lē na fa'atuina mai le oti, e fa'aolaina ai tagata uma. Pe a o'o ina afio mai o Ia, e toe tūtū fa'atasi i latou uma ma Ia i lona malo e fa'avavau. Ia va'ava'ai atu i le fa'amoemoe ua faia e Keriso Iesu, o lē na te liua le fa'anoanoa i le fa'amoemoe fou ua ia faia mo i tatou.

Tatalo: Ia manatua i latou o fa'anoanoa, ia maua le fa'amafanafanaga a le Alii a o savalia o ala faigatā, **Amene.**

1 & 2 TESALONIA 2 – 'Aua ne'i Lūlūina

Aso Sa – Me 3: “O so'o o le vaveao” (*Disciples of the dawn*)

Tusi Faitau – 1 Tesalonia 5:1-11

Matua – ff.3-4: *'Auā pe a latou fai ane, 'O loo filemu, ua le afaina,' ona o'o lea ia te i latou o le fano fa'afuasei; fa'apei o le fa'atiga o le fafine to a fanau mai,*

latou te le sosola ai lava. A o outou, le au uso e, toe te le o i le pouliuli, ia maua mai ai outou e lena aso, e pei o se gaoi'.

E mafai e le Kerisiano ona va'ava'ai ma le mautinoa i le luman'i i le afio mai o le Alii e aunoa ma ni popolega poo ni mea e mafatia ai, ae e tatau ona 'fa'atali ma le mataala ma le fa'atuatua'. Ia fa'atalitali ma le loto talitonu ma le mautinoa, ae le o le nofoa'i ma le fa'atamala. E ta'ua le mataala, e le ona mo le va'ava'ai atu i mea o le a tutupu i le lagi pe a afio mai le Alii i lona mamalu ma lona silisili ese, ae mo le nofo sauni o le loto ma le agaga mo le Alii pe a afio mai.

E le gata i le soifua mataala, ae lua nisi fa'atonuga ta'ua e ao ona teu fatu e le so'o. Muamua, o le sauniuni. O lona uiga, e 'aua ne'i tafea fa'afulu-i-vai o tatou lagona ma manatu i faiga o le lalolagi, ae ia sauniuni lelei mo le o'o mai o Keriso. Lua, ia nofo o le tagata ua fa'a-a'upegaina. E le o 'aupega mo se taua, a o 'aupega o le fa'atuatua, o le fa'amoemoe, aemaise ai le alofa. O nisi ia o va'aiga ta'ua i le fa'atinoga ma le leoleoina o lou tagata, ina ia le fa'afuase'ia oe le o'o mai o le Alii.

Tatalo: Le Alii e, aumaia le loto mata'ala e fa'atino ai galuega, ma le loto fa'atalitali i le aso e te toe afio mai ai, **Amene.**

Aso Gafua – Me 4: “Fa’atinoga a faifeau” (Pastors in practice)

Tusi Faitau – 1 Tesalonia 5:12-28

Matua – ff.12b, 13b-14: *‘...ia outou iloa e o galulue ia te outou, ma pule ia te outou i la le Alii, ma latou apoapoi atu ia te outou ... ia outou nonofo fefilemuai. Matou te aioi atu foi ia te outou, le au uso e, ia outou apoapoi atu i e amio fa'atalanoa, ia fa'amafanafana i e loto iti, ia fesoasoani i e ua vaivai, ia outou onosai i tagata uma lava.'*

O le vaega mulimuli lea o le mataupu e 5, o upu fa'amavae ma upu fa'amafanafana a le Aposetolo i le 'au Kerisiano i Tesalonia. E tele mataupu sa apoapoi ai le Aposetolo: o tagata, tatalo, onosa'i, o le viiga, o ma meaalofa, o le auauunaga ma le galulue fa'atasi. O le soifuaga e sili ona matagofie ma fiefia ai le Atua, o le soifuaga o le galulue fa'atasi ma le fefa'asoaa'i o auauunaga o lana fanau.

E le o mautinoa poo ai tonu sa fai ma ta'ita'i o le ekalesia i Tesalonia. Poo se ua leva lana auauunaga i le lotu, poo se na ia fa'aavanoa lona fale e mafuta ai, poo se sa tele le tamaoa'iga e fa'asoaa'itu i e ua matitiva, poo se tagata sa i ai le mea alofa e tautala i le Upu folafola i la le agaga? Pau le mea o loo fa'aailoa mai e le tusi faitau, e iloa le ta'ita'i i lana soifua auauunaga, i lona galue malosai, ma lona ofoina atu. O uiga ia o le ta'ita'i e tatau ona fa'ata'uaina.

A o le galuega a le ta'ita'i i le tausiga o le Ekalesia, o le amana'ia o tagata, ma ia fesoasoani i tagata uma i mea o loo latou mana'omia. E tele 'auala e mafai ona fa'atino ai e le ta'ita'i i le tausiga o le Ekalesia. Ae tasi lava le 'auala e laugatasia ai 'auala uma: ia galue ma le onosai i tagata uma lava. O le galuega fa'a-faifeau e faifai lemu, e le fa'atinatia, ona o le galuega e faia i tagata.

Tatalo: Ia manatua galuega a faifeau mo tagata uma, aemaise i latou ua le lava le onosai. Aumaia ni manatu fou, e fa'atino ai le galuega ma le fiefia, **Amene.**

Aso Lua – Me 5: ‘Tauivi ma le malosi’ (*Struggle and stamina*)

Tusi Faitau – 2 Tesalonia 1:1-5

Matua – ff.4-5: *‘O lea matou te mitamita ai ia te outou – o i matou uma lava – i le ekalesia a le Atua, ona o lo outou onosai ma lo outou fa’atuatua, i ona po o sauāga uma ma puapuaga ... O le fa’ailoaga lea o le fa’amasinoga tonu a le Atua ina ia ta’uamionuina outou i le malo o le Atua, o le mea lea e tigaina ai outou’.*

E tele mataupu taūa mai le tusi muamua o Tesalonia o lea ua toe alia’e mai i le tusi lona lua. E tutusa tusiga tusitusi o tusi uma e lua. A o le leo ma lagona o loo atagia i upu o loo fa’aaogāina, e fai si malosi atu o le tusi lona lua. E foliga mai e tele atu ni fa’aletonu o loo atugaluga ai le tusi lona lua nai lo le tusi muamua, e afua mai i mea o loo tutupu i totonu o le Ekalesia.

E i ai tala fou ua o’o mai ia Paulo e uiga i fa’afitauli o loo feagai nei ma le ‘au Kerisiano i Tesalonia, ma ua popole Paulo po ua fa’apefea mai le ‘au Kerisiano e tusa ai ma ia fa’afitauli. E le gata i le tele o tagata Tesalonia sa tete’e i le Tala Lelei e pei ona aumaia i le tusi muamua, a o lea foi ua maua tala i tauiviga ma sauaga o loo feagai nei ma le ‘au Kerisiano.

Ua fa’ailoa e Paulo lona mitamita i le ekalesia i Tesalonia ona o lo latou onosa’i ma lo latou tumau i le fa’atuatua. Ua fa’amanatu atu foi le Aposetolo, e tau i le Atua le tagata fa’atuatua e onosa’i i puapuaga. O le ‘ausia o le ola fa’afouina, o le lu’itau lea mo tagata Kerisiano uma. Mo le ‘au Kerisiano i Tesalonia, o le avanoa lelei latou te ‘ausia ai le ola lea, pe a finau ma tauivi ma le malosi i faigata o loo feagai ai. O le fa’atuatua e tofotofoina i ala faigatā. A o le aga’i atu ma le mautinoa i le ala moni mai le Alii, e manuia ai.

Tatalo: Manatua nisi o loo feagai ma puapuaga i lenei taimi. Ia fesoasoani atu le Alii ina ia maua le toa malie ao feagai ma ala faigatā, **Amene.**

Aso Lulu – Me 6: “O upu le nofo lelei” (*Uncomfortable words*)

Tusi Faitau – 2 Tesalonia 1:6-12

Matua – ff.6-8a: *‘Auā ua tonu i le Atua e tau i ai atu le puapuaga i ē ua fa’apua-puagaina ai outou; e ia te outou fo’i, o e puapuagaina, o le mapusaga fa’atasi ma i matou, pe a fa’aalia le Alii o Iesu mai le lagi, fa’atasi ma agelu o lona malosi, i le afi mumū, na te tau ma sui i e ua le iloa le Atua ...’*

O le fa’amasinoga a le Atua, o se mataupu e le fiafia ai le tele o tagata Kerisiano e talanoa ai. E fiafia e talanoa i le alofa o le Atua. A o lana fa’amasinoga, e aloalo mamao ai le to’atele. Peita’i, o loo fa’ailoa mai e le Tusi Paia, o le fa’amasinoina o mea uma, o loo i ‘aao o le Atua. Ma, o ata ia ma le gagana o loo fa’aaogā e le Tusi Paia e fa’amatalaina ai, o loo aumaia ai le lagona, e le o se matāupu leaga poo se mea e ono mata’u ai le tagata ua moni lona fa’atuatua. Auā o le fa’amasinoga a le Atua, o le taimi tonu lea o le a alia’e ai le mea moni. O mea sa sesē ona fai, o le a fa’asa’o e le Atua. O ē saisaitia ma olopalaina, o le a fa’asolotoina ma fa’afouina. Ma, o loto sa nutimomoia, o le a latou iloa e ‘au le Atua fa’atasi ma i latou. O mea uma ia o le a tutupu, auā e amiotonu le fa’amasinoga a le Atua.

O le ituaiga mafauauga lea e talafeagai tonu ma le tusi faitau o lenei aso. To’atele le ‘au Kerisiano i Tesalonia ua olopalaina ma saisaitia ona o tagata sauā ma tagata e tete’e i le Tala Lelei. O le fa’amanatu a le Aposetolo, o mea ia o loo

latou tigaina ai, e le umi. E i ai le taimi o le a o’o mai ai le mapusaga; ma toe fa’asa’o ai le mea sesē ua fai. O Iesu o le Alii, ma e i ai le aso o le a fa’afou ma fa’alelei ai le foafoaga atoa, e le pule a le Alii.

Tatalo: Le Alii e, le fa’amasino sili, a’oa’o mai le fa’atinoga e tatau ona matou faia, ina ia iloa ai lou finagalo mo tagata uma, **Amene**

Aso Tofi – Me 7: “Popolega ma talitonuina” (*Concern and confidence*)

Tusi Faitau – 2 Tesalonia 2:1-12

Matua – ff.1b-3: “... matou te aioi atu ia te outou, le au uso e, ina ne’i vave lūlūina o outou loto...peisea’i ua o’o mai le aso o le Alii... ‘Aua nei fa’asesēina se tasi ia te outou i se togafiti e tasi; auā e le o’o mai lena aso, se’ia mua’i ona taunu’u o le tete’a ese, ma ia fa’aalia mai o le tagata o le amio leaga, o le tagata lea o le malaia.”

E i ai vaega o le tusi faitau o lenei aso, e faigata ona fa’amatalaina. A o fuaiupu amata ia o loo fai nei ma matua, e matuā manino lava. E i ai le mea sa tupu na mafua ai ona manatu le ‘au Kerisiano i Tesalonia, ua o’o mai le ‘Aso o le Alii’. Masalo na mafua ona o upu a Paulo i lana tusi muamua i le ekalesia, lea na faimai ai, o le afio mai o Iesu e fa’ate’ia lona o’o mai, ma e le iloa e se tasi le taimi e tupu ai (1Tesa.5:1-11). Masalo ua i ai nisi ua fa’asalalauina le tala e fa’apea, ua uma ona afio mai Iesu, ae leai se isi o le ekalesia o iloina. O atugaluga ia o le ‘au Kerisiano i Tesalonia, sa taumafai Paulo e fa’afilemu i le tusi faitau o lenei aso.

Fa’amatala e Paulo le ‘Aso o le Alii,’ e o’o mai i le vai tau tonu o le a mamafa ai tauiviga ma faigata, e taualuga a’i le tele o isi mea o le a tutupu i le fa’aiuga o le tala fa’asolopito. O le a muamua mai le fa’aosoosoga tele e ta’ita’iina e le “tagata o le amio leaga” (ff.3-8). O ia lea na te fa’ataute’e i le Atua, ma o loo fa’aalia lana pule i le lalolagi e pei o ia o se atua. O le taimi lava e manumalo ai lenei leaga i le ola o tagata, ona fa’atoa afio mai lea o Iesu i lona mamalu ma lona malosi atoa, na te fa’afouina ma fa’afoisia le lalolagi i lona matagofie sa i ai; na te fa’amautaina foi le pule a le Atua i mea uma ma tagata uma. O le fa’amanatu a Paulo i le ‘au Kerisiano i Tesalonia, e le mafai ona tutupu ia mea e aunoa ma la outou silafia. O le fa’amoemoe o le Kerisiano, e i ai le aso e afio mai ai le Alii i le lalolagi ma liutino tagata ai, i lona mamalu ma le silisili ese.

Tatalo: Le Alii e, aumaia le loto tele ma le fa’amoemoe, ma aveesea le popole vale ma le atuatuvaletu o matou loto, **Amene**.

Aso Faraile – Me 8: “Malosiaga o le ola” (*Life forces*)

Tusi Faitau – 2 Tesalonia 2:13–3:5

Matua – ff.13b-15a: ‘... auā ua filifili le Atua ia te outou nai le amataga, ia fa’aolaina i le fa’apaiaina i le Agaga, ma le fa’atuatua i le upu moni. O lena le mea na vala’auina ai outou e ia i la matou tala lelei, ina ia maua le manuia o lo tatou Alii o Iesu Keriso. O lenei, le au uso e, ia outou tumau...’

O le tusi faitau o ananafi sa fa’amautinoa ai le ‘au Kerisiano i Tesalonia i fuafuaga fa’alaua’itele a le Atua: o a mea o le a tutupu i le lalolagi? A o le tusi faitau o lenei aso, e autu i le va’aiga e patino i le tagata lava ia: o a mea o le a

tutupu i lo tatou ola? O le molimau a Paulo, e tolu ni malosiaga sa fesoasoani tele i le fa'afaileleiona o le fa'atuatua o le 'au Kerisiano i Tesalonia.

Muamua, o le Atua amata mea. *"Ua filifili le Atua ia te outou..."* ae le pei le tagata o se ma'a musa e felafoa'i solo. Na a'apa le Atua i le tagata, e ala i lona alofa, ina ia liliu le olaga o le tagata mai le itu i totonu. A osofia le Agaga i totonu o le tagata, ona amata lea o le ola fa'apaiaina. E avea ai i tatou ma tagata paia; o tagata e ola fa'a-Keriso. O le finagalo lea o le Atua mo i tatou. O le Atua na te fa'atupuina, o Ia foi na te fa'ataunuaina.

Lua, o le fesoasoani a isi tagata. O le folafolaina o le Tala Lelei, e pei o se uila o le malamalama e susulu i le loto o le tagata. E le o se susulu e tupu i se mea tu'u fua. Ae tupu ona o le fesoasoani mai ma le folafolaga a le isi tagata. O le olaga fa'a-Kerisiano e le o se olaga tu'u fua. E amata i le ola fefaasoa'i o le tasi i le isi; e tali atu ai le feau sa tatou fa'alogoa ai i le folafolaga a isi.

Tolu, o le ola fa'a-Kerisiano e mana'omia ai le ofoina atu atoatoa o le tagata, ma ia tumau ai. *"O lenei, le au uso e, ia outou tumau..."* O le galue mai o le Atua e ala i o tatou tagata, o se fa'amalosi 'au lea mo i tatou e aga'i ai pea i luma ma le mautinoa, e aumaia e le Atua le malosiaga o le ola e fa'atino ai lona finagalo.

Tatalo: Manatu i latou na fa'ailoa mai le tala lelei ia Iesu. O le tatalo ina ia manatua suiga o le olaga i nei vaitau, **Amene.**

Aso Toonai – Me 9: "O le pa'i e patino" (*Personal touch*)

Tusi Faitau – 2 Tesalonia 3:6-18

Matua – ff.7-8, 17a: *'Auā ua outou iloa lava, e tatau ona outou fa'aaao mai ia te i matou...ina o ia te outou... a ua matou galulue i le galuega mamafa ma le tiga i le po ma le ao, ne'i mafatia so outou. O le alofa o a'u o Paulo ua tusia i lo'u lava lima'*

Ua pa'i le tusi faitau o lenei aso i se tasi o autū sa aumaia foi i le tusi muamua (1Tesa.4:9-12) – o le ola fetausia'i. E i ai nisi o le Ekalesia ua fiafia pea e ola fa'alagolago i le agalelei o isi, ma ua fautua le Aposetolo, e tatau ia i latou ona saili ni a latou galuega e galulue ai, ma maua ai so latou tau. O le 'au Kerisiano foi o loo ola fa'asamasamanoa ma fe'alo'alofa'i solo, ua fautua le Aposetolo i le Ekalesia e tu'u ai pea i latou e 'aua ne'i toe tigaina ai fua. Sa manatua e Paulo le taimi a o fuafua lana galuega tala'i i Tesalonia, na te lei fesiligia se fesoasoani mai o nisi i lana tapenaga. Peita'i, na ia talia le mea'alofa sa aumaia, na fesoasoani ai i lana galuega i isi nofoaga (2Kori11:7-11). Ona o lea, na apoapoa'i ai le Aposetolo i le Ekalesia i Tesalonia, ina ia tusia e i latou o latou lava, i le malosi e mafai ai.

I le fa'aiuga, fa'ailoa e le Aposetolo lona tusia o lenei tusi, ma tu'uina ai lona suafa. O lenei pa'i e patino i le Aposetolo, o se taumafaiga ina ia manatua pea lana galuega sa fita i tuga ai. Ina ua talanoa Paulo i le filemu ma le alofa tunoa i le f.16 ma le f.18, e peiseai o loo tu'u sa'o e Paulo ia meaalofa i 'aao o le 'au Kerisiano ua ia alofaina.

Tatalo: Ia tumau atu le alofa ma le agalelei o le Alii le fa'aola i mea uma tou te mananao i ai, **Amene.**

I LUGA O LE ALA 1 – La’asaga Muamua

Aso Sa o Tinā

Aso Sa – Me 10: “O le alofa fa’a-Tinā” (*Motherly love*)

Tusi Faitau – Esoto 2:5-9

Matua: ff.5-6: “*Ona alu ifo lea o le afafine o Farao e taele i le vaitafe, o savavali ane foi lona galu teine i le auvai o le vaitafe; ua iloa atu e ia le ato o loo i le vao utu’utu, ona au atu lea e ia o lana auauna. Ua ia tatalaina, ua iloa ai le tama, fa’auta foi, ua tagi le tama; ona alofa lea i ai’*,”

E tele mea e ao ona tatou fa’afetai ai i le Atua ona o Tinā. I le tusi faitau o lenei aso, o le isi meaalofa e patino i Tinā e tataua ona tatou fa’afetai ai i le Atua – o le alofa fa’a-Tinā. E ese lea mai le alofa fa’a-Tamā, poo le alofa fa’ale-uso. Auā o le alofa fa’a-Tinā, o le alofa e sau mai i le manava o le Tina, poo le toala fanau. O le uiga lea o le upu Eperu o loo fa’aaogāina ma fa’aliliuina e le tusi faitau, “...ua tagi le tama; ona **alofa** lea i ai.” I le talitonuga fa’a-Eperu, o le manava o le Tinā, poo le toala fanau, o le nofoaga lea e sili ona malosī ai le so’otaga o le alofa i le va o le Tinā ma lana tama. E leai se alofa e sili atu ona malosī. Masalo o le mea lea ua ala ai ona fa’aaogā e tusitala o le Feagaiga Tuai le upu Eperu lava lea e tasi, e fa’amatala ai le alofa o le Atua.

E iloa le malosī o lenei alofa, i uiga ma aga e masani ona faia e le Tina mo lana fanau. E ofo atu e le Tinā lona soifua e laveaiina ai le ola o lana fanau. E leai se mea e le faia e le Tinā mo lana fanau. E sauā le Tina i fanau, ae sauā ona o le alofa ma le naunau ina ia maua e fanau se mea lelei i le lumanai. Poo a fita ma faigata e fa’amata’u mai, e le solomuli ai le alofa fa’a-Tinā, e tusa lava pe ono lamatia ai lona soifua. E ta’u le alofa fa’a-Tinā i isi taimi, o le alofa fa’avalea, auā e faia ai e le Tinā mea e le talafeagai ma fesootai ma le mafaufau.

O le ata lea o loo aumaia e le tusi faitau o lenei aso, aemaise le alofa sa fa’a-alia e le afafine o Farao mo le pepe sa maua i le atoato o fa’atafeafea mai i le vai, o Mose lea. E le taumate na silafia e le afafine o Farao le tulafono ua uma ona faia e lona Tamā, e uiga i le fasiotia o tama e fananau mai i le ‘au Eperu. E le gata i lea, sa iloa foi e le afafine o Farao o le pepe lea e tafeafea mai i le atoato, o le sa Eperu. E ui i ia fa’aletonu ma mea e ono lamatia ai lona soifua, ae lei liua ai le lagona o le afafine o Farao, talu ai, “...ua tagi le tama; ona **alofa** lea i ai.”

Pau le alofa tatou te maua i totonu o le Tusi Paia e lalata i le alofa fa’a-Tinā, o le alofa na fa’aalia e Iesu. O le upu peretania, o le “*compassion.*” E sau lea mai le upu Eleni, e tutusa lelei ma le upu Eperu lea i le Feagaiga Tuai – o le alofa e sau mai i le manava, poo le toala fanau, o le Tinā. Ua le manumanu lava Iesu ia te ia lava. Na ofoina mai atoa lona ola i luga o le satauro, ina ia ola ai le lalolagi agasala. Amuia outou Tinā, auā o le alofa lea e patino ia te outou, ua fa’aaogā e le Tusi Paia e fa’amatala ai le alofa o le Atua, ma le alofa fa’a-Iesu.

Tatalo: Le Alii e, ia matou iloa ona fa’ataūa nai o matou Tinā i nei aso, ma ia matou manino i lou alofa, o le alofa e atagia mai i o matou Tinā, **Amene.**

Aso Gafua – Me 11: “Tatalo savali” (*Prayer walking*)

Tusi Faitau – Kenese 24:1-21

Matua – ff.15-18a: “...a ua sau Repeka...sa i lona ūa lana kate...ua alu ifo o ia i le vai, ua utu lea o lana kate ma toe fo’i atu. Ona momo’e atu lea o le auaua e fa’afetaia’i ia te ia, ua fa’apea atu, ‘So’u inu a’e sina vai a’i lau kate’. Ona fa’apea atu lea o ia, ‘Le alii e, taumafa ia;’”

I le mālū o le afiafi na o’o atu ai le fafine i le vaieli, fa’atasi ai ma isi tamaita’i e utu vai, e fa’apea foi tagata faimalaga e malōlō i le vaieli e feinu ai ma fa’ainu a latou manu (kamela). O le tasi auaua na malaga mai e pei o le poloaiga a Aperamo, e saili atu se avā mo lona atalii o Isaako ina ia fa’auau le gafa o le ‘āiga. O le tagata o loo savali ma le tatalo, ina ia maua se teine na te ‘au mai se vai mo ia, fa’apea ai le fa’ainuina o ana manu.

O Repeka, sa fa’apea lava ona faia o ona tiute masani, na te lei sailia lava o se tane, a o le ā sona fa’amoemoe mo ia ma lona lumanai? O le tala ofoofogia, na tau ave e le teine o lana vai. Peita’i, ua lagona e lona loto le fa’ailoa e le tagata, na ia tu, ma iloa le tagata faimalaga, na fa’alogologo i lona leo, ma ia iloa le talosaga, se’i ‘aumaia se vai mai lana kate e inu ai. O le tamaita’i ua fa’afogaina e ia le tatalo, ma fa’ataunu’u le ofoina atu o ia na faia o lona finagalo.

O le tatalo ua fa’ailoa atu ai mea ofoofogia, o le loto fa’atoese, loto fa’afetai, o le loto ua moomia se fesoasoani peitai, o le tatalo e le aogā, peā tatalo ma le loto o le tagata lava ia e fa’atinoina ai o ona lagona. O le tatalo, e fa’apea ona mafuta mai le Alii mai tatou, i aso uma o lo tatou ola.

Tatalo: Aumai ia le vai ma fa’atumuina ai o lo’u fia inu i lou Agaga. Aumai e lau Afio lou siufogaga e lagona ai e le lalolagi uma le valaau atu i le tatalo, **Amene.**

Aso Lua – Me 12: ‘Auala tapunia - leai se ala’ (*Road closed – no way*)

Tusi Faitau – Numera 20:14-21

Matua – ff.18-20a: “A ua tali mai Etoma ia te ia, ‘E te le ui lava i lo’u nu’u, ne’i ou alu atu e tete’e ia te oe i le pelu’. Ona fai atu lea o le fanauga a Isaraelu, ‘O le ala tele matou te ui atu ai; afai foi matou te feinu i ni ou vai...ona ou avatu ai lea o sona tau’i...na ona ui atu lava o’u vae.’ Ona tali mai lea o ia, ‘E te le ui mai lava.’”

O le faitauga o le asō e manatua ai le va’aiga i nusipepa ma televise, o le le fa’atagaina o tagata e sopoia o tuaoi, fa’apea le fausia o pa pupuni e taofia ai le sao atu o nisi, e pei ona va’aia ia Amerika ma Mexico, fa’apea foi le pa pupuni i le va o Isaraelu ma Pakisitani.

O le tala fa’asolopito o le ‘au Eperu, o tagata feofeoa’i ua talosaga i le nuu o Etoma ina ia fa’aavanoa lo latou tuaoi e ui atu ai i le ala. Fa’ailoa e le tusitala le taumafaiga a le fanauga a Isaraelu e fa’ailoa atu ia Etoma latou te le faia ni mea e fa’aleagaina ai lo latou nu’u. O a foi ni mea ua latou manana’o i ai, latou te tau’i atu i ai latou. Peitai, o le tali a Etoma, ‘e te le ui mai lava.’ ‘Leai se ala,’ o le tali lea a tagata ua fefefe ma tete’e atu i mea e eseese ai ma isi.

Tatalo: Le Alii e, o i matou uma o tagata faimalaga, fesoasoani mai ina ia o matou talia o tagata uma ua vala’auina e fa’atino lou finagalo, **Amene.**

Aso Lulu – Me 13: ‘E le o le ala lenei’ (*This is not the way*)

Tusi Faitau – 2 Tupu 6:8-23

Matua – ff.19a, 21-22a, 23a: “*Ona fai atu lea o Elisaia, ‘E le o le ala lenei, e le o le aai foi lenei; mulimuli mai ia te au’...Ua iloa mai i latou e le tupu o Isaraelu, ona fai mai ai lea o ia ia Elisaia, ‘Sena e, a a’u fāsia ea, a a’u fāsia? Ona tali lea o ia, ‘Aua e te fafasi’...Ona sauni ai lea e ia o mea e ‘ai e tele mā latou; ua latou aai ma feinu, ona tu’uina atu lea o i latou e ia, ua latou o i lo latou alii.’*”

O le ata o loo aumai e le tusi faitau o lenei aso, ua si’i taua le tupu o Suria i le tupu o Isaraelu. O le perofeta o Elisaia, o ia ua pei o se leoleo nanā i le va o tupu ia. Ua na ia fa’ailoa i le tupu o Isaraelu fa’atinoga uma sa tapena ai le vaega ‘au a Suria. Ina ua iloa e le tupu o Suria le mea ua faia e le Elisaia, ona auina lea o lana vaega ‘au i Totana e pu’e i le perofeta. Ua fa’ate’ia le auauna a Elisaia ina ua feala i le taeao, ua si’omia atoa le fale i vaega ‘au a le tupu o Suria. Peita’i, sa fa’alototele e le perofeta lana auauna, ina ua fa’ailoa ia te ia vaega ‘au a le Atua, o loo si’o le ‘aai atoa i solofanua ma kariota afi.

Ona tatalo lea o Elisaia i le Atua e fa’atauaso vaega ‘au a Suria, ma sa fa’apea ona faia. E pupula, a ua latou leiloa se mea. Ona fai atu lea o Elisaia ia te i latou, “*E le o le ala lenei...*” Ona fa’asino lea ma ta’ita’i e Elisaia le vaega ‘au, ua o’o lava i Samaria, le laumua o loo fa’atalitali mai ai le tupu o Isaraelu ma ana vaega ‘au. Ua naunau lava le tupu o Isaraelu e fasioti vaega ‘au a Suria sa ta’ita’i mai e Elisaia, ae ua vavao e le perofeta, ma toe fai atu fa’alua, “*E le o le ala lenei...*” Fa’atonu e Elisaia le tupu o Isaraelu e fai se taumafataga tele e fafaga ai vaega ‘au a Suria, ona fa’agafua lea ma fa’asa’olotoina i latou.

Sa fa’apea ‘ai o le a fa’ateteleina le toto masa’a ma le soifua fa’amaumauina i lenei ata. Ae peita’i, ua na’o faiga ‘ai, fefaamagaloga, ma le folafolaga e tausi le filemu. Anusa foi, o taunuuga lava ia o ata e tama autū ai le Atua.

Tatalo: Le Alii e, ia fa’ailoa mai o lou alofa, atoa ai ma vaaiga fa’atinoa e malutia ai tagata. **Amene**

Aso Tofi – Me 10: “Savali i totonu o le togāla’au” (*Walking in the garden*)

Tusi Faitau – Kenese 3:1-13

Matua – f .8: “*Ua fa’alogo i la’ua i le siufofoga o le Alii le Atua o loo savali i le fa’atoaga i le itu aso e agi malie mai ai le matagi; ona lalafi ai lea o Atamu ma lana avā ai luma o le Alii le Atua i la’au o le fa’atoaga’*”

O le Atua ua sāvalia le eleele. O le Atua na faia mea uma ma totōina, fa’apea ai ma le tagata na ia faia. Na fa’apea foi le fiafia o tagata e tafafao ma fiafia i le fa’atoaga na faia e le Atua. Peita’i, o le Atua ua sāvalia le fa’atoaga, a ua lalafi tagata, (Atamu ma Eva) ona ua iloa le agasala. O le a le isi laasaga o le a sāvalia?

O la tatou sāvaliga ma le Atua, e i ai taimi ua le aga’i ai le sāvaliga e pei ona fa’atonuina, a ua sese ese ma le mea e tatau ona o’o atu i ai. E le o le Atua, a o le tagata e mafua ai. E lenei vaitau, e leai se tagata e fia tu’ua’ina lona olaga. Ua tupu tele le lē fiafia i soo se tagata, fa’apea le fefe, e fa’apea se vaaiga ua iloa i mālō ua fausia pa puipui ma poloka le ala mo tagata. Peita’i, o le Atua na te fa’ailoa mai o ala o le tagata ua lē mautonu, e savavali ai.

Tatalo: Fa’ailoa mai le Alii e, o ala e tonu ai la matou savaliga e aunoa ma le faitio, ina ia maua e tagata uma o lou alofa, **Amene.**

Aso Faraile – Me 15: “Alu ia i vaipuna uma” (*Go to the springs*)

Tuai Faitau – 1 Tupu 18:1-16

Matua – ff.1, 5: “...Ona o’o mai ai lea o le afioga a le Alii ia Elia i le tolu o tausaga, ua fa’apea mai, ‘Ina alu ia oe, ma fa’aali oe ia Aapo, ou te fa’atotoina foi le ua i le eleele’....Ua fai atu Aapo ia Opetaiā, ‘Ina alu ia oe i le nu’u i vaipuna uma...pe tatou te maua ni mutia e fa’aolaina ai solofanua ma falata...”

Ua mamago le laueleele talu le lamala. Ua matua vevela ma oge le nu’u o Samaria. O tamā ua saili i vaipuna ua mamate. E fa’apea foi le sailiga a Aapo ina ia maua se mutia e fa’aolaina ai o ana manu. Na fa’apea ona vaelua Aapo ma Opetaiā i le sailiga o le vai ma le mutia. O le taimi tonu lea a o saili Elia ia Aapo ina ia la talanoa fesagai, le tagata sāua ma le le fa’atuatuaaina, ona fa’atotoina mai lea o le timu e fa’aolaina ai le eleele.

Peita’i, o Opetaiā ua lavea fua i lenei talanoaga, a o ia o le tagata e mata’u i le Atua, o le tagata foi na faia se galuega ma le le iloa e Aapo le fa’asaoina o perofeta i ana, ma fafaga i latou i areto e pei ona sauaina e Iesapela o perofeta. E manatu Opetaiā e fa’aolaina e Aapo o Elia, ae fasiotia o ia e Aapo. E ui ina fefe e fa’ataunu’u le upu ia Aapo, ae na faia e pei ona fa’ailoa e Elia, na fetaiāi ma le tupu, ma toe fa’amaligi mai ai o timuga i le laueleele.

Ua toe fa’amanatu mai le taūa o vaipuna, e iai itu aso e mate ai peitai, i le loloto o papa ua le puna ae o se vai, o loo i ai lava le vai o loo taoto i le fogatai e fa’apea ona puna mai ai. E fa’apea Elia ma Opetaiā ona o le fefe i le tupu, na o’o atu ma papai i le vaipuna ma le lototele. E fa’apea foi Aapo mo le fia maua o se fesoasoani mo ana manu.

Tatalo: I latou uma ua feagai ma puapuaga, o le vaipuna ua fa’ailoa mai, o le Alii lava lo tatou fa’aola, **Amene.**

Aso Toonai – Me 16: “Mafaufau i lau la’asaga / Ta’ita’isesēina”

Tusi Faitau – Fa’ataoto 7:6-18 (*Mind your step / Being led astray*)

Matua – ff.7-11: “*Ua ou vaai atu ai lea i e faigofie; na ou iloa ua i taulele’a le tasi tama, ua leai sona mafaufau; na ui ane o ia i le ala e lata ane i le fetaulaigā-ala e nofo ai le fafine; na ia alu ane i le ala i lona fale...na fetaiā’i ma ia le fafine ua ofu i le ofu o le fafine talitane...ua le nofo tumau ona vae i lona fale.”*

Ua aumai e le tusi faitau o lenei aso se ata tau lu’ilu’i e fa’aiu ai foi le tele o tala o lenei vaiaso sa musuia ai le loto. O le ata o le tama ua ta’ita’isesēina e le fafine talitane. O le tagata sa fealua’i ma le fa’asamasamanoa, ae ua vala’auina e le fafine faita’aga e ulufale i lona fale. O le fa’ailo: e faigofie lava ona ta’ita’iina i tatou i fa’atinoga sesē. I tua atu o lenei fa’ailo o loo taoto ai le ata o feusuaiaga e fa’ataatai i fafine – o se ata ua leva ona aveā ma fa’afitauli ua taotaomia ai ‘aia tutusa o fafine, e le gata i totonu o tapuaiga, ae fa’apea le va’aiga lautele.

Peita’i, a tatou tu’ua’i solo poo le a le pogai ua taotaomia ai ‘aia tatou o fafine i nei ona aso, ona toe fo’i lea o le mataupu i tua ia Eva, ma lona utia ai i le va o le gata ma Atamu. E tataua ona fa’asoa fa’ataasi a tatou tiute tauave e fo’ia ai le tele o

mea sese o loo tupu i lenei lalolagi. Ma, e tatau ona tatou mafaufau poo le a la tatou laasaga o le a fai; a leai foi, mafaufau i le va o le fa'autautaga tatau ma mana'oga lasi fa'aletagata.

Tatalo: Le Alii e, ua ta'ita'i sesēina pea o matou ala e le fili o le lalolagi. Seia e fa'apulaina pea o matou mata ma mafutaina i matou i lou poto silisili, **Amene.**

I LUGA O LE ALA **2 – Savavali ma Iesu**

Aso Sa – Me 17: “O se malaga” (*A pilgrimage*)

Tusi Faitau – Luka 2:41-52

Matua – ff.49-50: *“Ona fai atu lea o ia ia te i la'ua, ‘Se a ea le mea na oulua saili mai ai ia te a'u? Lua te le iloa ea e tatau ona ou i le fale o lo'u Tamā?’ A ua le lagona e i la'ua le upu ua ia fai mai ai o ia ia te i laua.”*

O le tala i le tamaitiiti e tumau ma fa'aailoa atu le amiotonu, atoa ai ma le lē manatu mamafa o matua. E faigofie lava ona tu'ua'ia Maria ma Iosefa i le faletonu o le va'aiga o le tama. Le tamaitiiti o le a avea ma fa'aola o le lalolagi, ae ua leiloa poo fea o i ai i le vevesi o tagata malaga mai i Ierusalem e tapua'i ai.

E faigofie foi ona itagia le 'au a'oa'o sa nonofo i totonu o le malumalu ma fa'alogologo i le poto a le tamaitiiti o Iesu. Faimai foi o a'oa'o – o tagata ua uma ona a'oa'o ina i mea tau i le Atua – a o lea ua latou le iloa le poto moni o loo tu nei i o latou luma, e ala ia Iesu.

O tagata uma o loo ta'ua i totonu o le tala, o loo tofu lava ma le gaioiga o loo fai e fa'atino ai le tapuaiga sa'o, poo le malaga atu i Ierusalem, poo le nofo foi i totonu o le malumalu i le aso atoa. Masalo ua avea lo latou naunau ma le maelega i ia fa'atinoga o le tapuaiga sa'o, ua fai ma ala ua latou misi ai Iesu – o ia lea o le autu ma le ogatotonu o le tapua'iga sa'o lea e vevesi le vaega lea e fa'atino.

Tatalo: Le Atua ou te saili atu ai, saili mai ia te a'u; o lau afio ou te naunau ina ia ou iloa, ia e silafia a'u; o le Atua ua ou misia, pu'e mau mai ia te a'u, **Amene.**

Aso Gafua – Me 18: “Savaliga i le mauga” (*Hill walking*)

Tusi Faitau – Mareko 3:13-19

Matua – ff.13-15: *“Ua maliu ae o ia i le mauga, ona valaau atu lea o ia i e ua ia finagalo i ai; ona latou o mai lea ia te ia. Ona tofia lea e ia le toatinogafulu ma le toalua, ina ia latou fa'atasi ma ia, ina ia aauina atu foi i latou e tala'i le tala lelei; ina ia tu'uina atu fo'i le pule ia te i latou, latou te tutuli ai temoni’*

O le tala i le valaauina e Iesu o ona soo, a o le vala'au e fa'atasi ma ia i luga o le mauga. E ese foi le va'aiga tatou te maua mai i luga o le mauga. E iloa ai le matagofie o le si'osi'omaga ma mea o loo i ai. E iloa ai foi le fegasoloa'i o tagata i feau ma galuega masani o le aso. E fa'agaetia ai le agaga i le va'ava'ai atu i le matagofie o galuega a le Atua i le lalolagi, aemaise le mamā a'ia'i o mea na Ia faia. O le va'aiga matagofie e maua i luga o le mauaga, e fa'aosofia ai foi le lagona maualuga, e te mafaia mea uma sa e manatu e le mafai ona fai.

Peita'i, e ui i le matagofie o le va'aiga, a o le aga'i atu ma le savaliga i luga o le mauga e le o se mea faigofie. O avega mamafa ma mea totino e tauaveina mo le savaliga. O le mapuea i le sela ma le fiu e savali. O le a'e i luga ma le ifo i lalo. E lagona ai le musa ma le fiu i le tele o taimi.

Molimau le Tusi Paia, o mauga o le nofoaga e fetai'a'i ai ma fa'ailoa mai ai le finagalo o le Atua i le tagata. O nofoaga e sili ona pa'ia ma fa'aliliuina ai le tagata; e fa'atutū ai foi fata faitaulaga e tapua'i ai i le Atua. O le ave ma so'o o le Alii, o le vala'au e savavali fa'atasi ma Iesu i luga o le mauga e fa'aliliuina ma fa'afouina ai le so'o i lona silafia loloto o le Atua. O le savaliga, e i ai taimi o le a tauivi ai e fa'atino. Ae tatou te savavali fa'atasi ma lē tatou te saogalemu ai, ma e leai se vaipanoa o le mauga na te le silafia.

Tatalo: Le Alii e, ua e vala'auina i matou i lou amo e mama ma faigofie. Seia e aveese le mamafa o loo saisaitia ai a'u i mea o lenei lalolagi, **Amene.**

Aso Lua – Me 19: “Savavali ma Iesu” (*Walking with Jesus*)

Tusi Faitau – Luka 9:57-62

Matua – f.62: “*Ua fetalai atu Iesu ia te ia, ‘O lē tago lona lima i le suotosina ma tepa i tua, e le tatau ia i le malo o le Atua.’”*

Ua masani le olaga lea tatou te ola ai ona ave le fa'amamafa i mea le aogā, ae fa'atuatuaana'i mea aogā e tatau ona ave ai le fa'amamafa. I se tulaga faigofie, e matua moni lava lea mau pe a tatou va'ava'ai i nei ona aso i fale e fa'atau ai oloa ma faiga ua masani ai le tele o pisinisi. Peita'i, e le o fa'apena le va'ai a le tusi faitau o lenei aso; e fai si loloto atu.

Ua ave e Iesu le lu'itau ia i latou ua fia ave ma ona so'o, ina ia tu'u i 'autafa tiute ma mana'oga fa'ale-tagata, ae auauna atu ia te ia. O se a'a i tui lea lu'itau mo tagata i le vaitaimi o Iesu, ona o le fa'asinoga a le tulafono fa'a-lutaia i nisi o tiute ma mana'oga fa'ale-tagata e ao ona fa'amuamua nai lo mea fa'ale-lotu. O le tausiga o aiga, o le nofoaga e nofo ai, ma tofiga fa'amoemoeina; o isi ia mana'oga fa'ale-tagata e tatau ona fa'amamafaina. I le soifuaga fa'a-tekenolosi foi lea ua tatou i ai nei, e i ai foi ona ia fa'amamafa taūa mo le gasologa o le olaga e ao ona tausia ma fa'asilili nai lo mea fa'ale-lotu. E malamalama foi Iesu i le tulaga lea o le fa'amamafaina o mana'oga fa'ale-tagata, e pei ona fa'aalia i lona naunau e 'auai fa'atasi ona soo ma ia i Ketesemane, fa'atasi ai ma lona naua'i i luga o le satauro ina ia i ai se tasi na te tausia lona Tinā pe a mavae atu lona maliu. Peita'i, o loo saunoa le Alii i le taimi fa'anatinati. A ave loa oe ma soo a le Alii, e fa'apefa ona e ola ma soifua i totonu o le lalolagi, ae 'aua ne'i ave ma tagata o le lalolagi?

Tatalo: Le Alii e, fesoasoani mai ina ia ou saili i lau afio, e pei ona e faia ma e a'oa'o mai, **Amene.**

Aso Lulu – Me 20: “Le tagata aisi i le ala” (*A beggar by the road*)

Tusi Faitau – Mareko 10:46-52

Matua – f.47: “*Ua fa'alogu o ia o i ai Iesu le Nasareta, ona alaga mai ai lea, ua fa'apea mai, ‘Iesu e, le alo o Tavita, ia e alofa mai ia te au.’”*

I le afuafua mai o le fa'a-Kerisiano, sa fa'aigoa e ulua'i Kerisiano i le igoa, "O le Ala." O le tusi faitau o lenei aso, o le tala i le savaliga fa'atasi ma Iesu e autu i le tauaso 'aisi. E amata le tala, faimai sa i *'autafa o le ala'* le tauaso 'aisi. Ae fa'ai'u le tala, ua avea ma tagata ua mulimuli ia Iesu *'i luga o le ala.'* O le savaliga a lenei tauaso 'aisi, sa fa'alavelave ai nisi o tagata sa fa'atasi ma Iesu, ina ua latou vavao ia te ia i le taimi sa alaga ai; o lona uiga, ua latou *'punitia le ala'*.

O lenei tala, i se va'aiga faigofie, ua na o se vavega masani, mai le tele o isi vavega sa faia e Iesu. Peita'i, ua manatu le 'au su'esu'e, o lenei tala – fa'atasi ai ma le tala i le tauaso i Petesaita i le mataupu e 8 – o tala ia o loo tua'oi ai le vaega lea o le Evagelia o Mareko o loo fa'amamafa ai le avea ma soo o Iesu. O tala ia i tauaso, e pei o ni ata fa'atautu e mafai ona fua aga'i ai le tulaga ua o'o i ai le ola fa'asoo pe a savavali fa'atasi ma Iesu. E aga'i ina manino lo tatou va'ai ma lo tatou iloa i nisi o taimi, ae o loo nenefu pea ma le manino lelei.

Tatalo: Le Alii e, ia fa'apupulaina ou mata e pei o Patimaio ina ia ou iloa le mea sili e tatau ona sailia, **Amene.**

Aso Tofi – Me 21: "O uo i luga o le ala" (*Companions on the road*)

Tusi Faitau – Luka 8:1-3

Matua – ff.1b-3: *"Ua fa'atasi mai foi ma ia le to'asefulu ma le to'alua, atoa ai ma nisi fafine sa i ai agaga leaga ma ma'i, a ua fa'amaloloina; o Maria ua ta'ua o le Makatala, na o i fafo ia te ia o temoni e to'afitu, ma Ioana le avā a Kusa le auaua pule lea a Herota, ma Susana; atoa ma isi fafine e toatele, e na auaua atu ia te ia i a latou mea."*

E fa'aleiloga fuaiupu ia o loo amata ai le mataupu e 8 o le Evagelia o Luka, auā ua na o ni upu amata e tomua ai le aano autu o le mataupu o loo mulimuli mai i tua. Peita'i, e i ai le itu pogisa o ia fuaiupu, aemaise le ta'ua ai o fafine, e pei ua 'eu i autafa o le tala. O le va'aiga lava lea i fafine sa i ai mai le amataga, ma le tala fa'asolopitoa atoa o le fa'a-Kerisiano – ua na o ni tagata ua 'eu i autafa o le tala. Ae o loo manino le molimau a Luka, e tele fafine sa i ai i le amataga a o gasolo le galuega tala'i a Iesu. Peita'i, e le o tele se fa'amatalaga o loo aumai ai.

Masalo ona o le itiiti o tala o loo fa'amatalaina ai galuega sa fa'atino e le Alii, ua mafua ai ona faitaulia e Luka le tala lenei ma upu ia fai ma matua i lenei aso. Maumau pe ana fa'apea o fa'amatala auiliili mai ai tiute o fafine i le galuega tala'i a Iesu. Ae ui i lea, o se tala o loo talanoa i soo uma – o le tiute o nisi o loo savavali ma Iesu, o le fa'aaogāina o a latou meaalofa e fesoasoani ai i isi o loo fia savavali foi ma Iesu.

Tatalo: Ua ou sau ia te oe le Alii e, tau lava o le tulaga ou te i ai. Ia avea le tala o lou olaga ina ia avea ma tala mo lau tala'iga, **Amene.**

Aso Faraile – Me 22: "O fiafiaga i tafa o ala" (*A roadside carnival*)

Tusi Faitau – Ioane 12:12-19

Matua – f.13b: *"Osana! Ia manuia le afio mai i le suafoa o le Alii, o le Tupu o Isaraelu!"*

A o fa'aitiiti pea le numera aofa'i o tagata Kerisiano i le itu sisifo o le lalolagi ona o le vaivai o le soifua tapua'i, e tele taimi o tatou taumafai e ati a'e i luga pa o falesa e vavae ese ai i tatou mai le lalolagi, nai lo le taumafai e talepe i lalo ia pa, e fa'asoa atu ai le fiafia ma le olioli o le Tala Lelei i le lalolagi.

O le tusi faitau o lenei aso, e masani ona fa'alogoina i le Aso Sa o Laupama. O le alalaga fiafia o tagata ma fofola laupama i le ala a o aga'i Iesu i Ierusalemia i luga o le asini, o loo fefiloi fa'atasi ai le tiga ma le masalosalo. Ua 3 tausaga o gasolo le galuega tala'i a le Alii, ma, o i latou uma sa savavali ma Iesu, e le taumata se fa'atumulia i le fiafia. E ui na latou le malamalama ma le iloa le mafuaaga, ae ua fiafia lava i mafuta ma le to'atele o tagata savavali, fa'atasi ai ma le ta'uta'ua o Iesu – ua ta'uta'ua atu ai ma i latou. A o aga'i le galuega a Iesu i lona taualuga, ua le mafai ona taofiofia le fiafia ma le olioli o tagata ina ua latou savavali fa'atasi ma Iesu. E o'o foi i ma'a, e pepese ai foi ma i latou (Lk14:40).

Tatalo: Le Alii e, o lenei aso ou te mapu ane ai ma ou pese fa'atasi ma lau foafoaga e vivii i lau afio. Ou te vivi'i atu ia te Oe i lou olaga atoa, **Amene.**

Aso Toonai – Me 23: “O le tagata mulimuli moni” (*A true follower*)

Tusi Faitau – Ioane 21:22-25

Matua – ff.21-22: *“Ua iloa atu o ia e Peteru, ona fai mai lea o ia ia Iesu, ‘Le Alii e, pe fa’apefea o ia nei?’ Ua fetalai atu lea o Iesu ia te ia, ‘A’fai ou te loto ina ia tumau pea o ia se’ia ou sau, pe se a lea mea ia te oe? Ia mulimuli mai oe ia te a’u!’*

O le fa'ata'ita'i i mea e fai e isi, e i ai le taimi e mafai ona lelei ai, ae e i ai foi taimi e i'u ai i le fa'aletonu. E tele taimi tatou te fia fa'apei o isi tagata, i ofu latou te la'ei ai, o tifica latou te faia, o seevae e se'e, fa'atasi ai ma isi mea. E i ai foi taimi e aafia ai mea tatou te faia, ona o le mafaufau fua i isi tagata. Ua tatou popole i tala a tagata e fai mai. Ua tatou popole ne'i faifai mai ni upu a tagata. Ua fua uma mea tatou te faia, i le manatu o isi.

O le valaau mai o Iesu e avea i tatou ma ona so'o, o le savaliga a le tagata lava ia e to'atasi, ae le o le taumafai e savali pei o le isi. E tatau i le soo lava ia ona malamalama ma fa'atuatua mo ia lava. A o tatou taumafai e saili se ala savali mo i tatou lava, e i ai taimi o le a fetau ai o tatou ala ma ala o isi tagata savavali fa'atasi ma Iesu. E i ai mea o le tatou eseese ai, a o vaega uma ia o le savaliga.

Tatalo: Le Alii e, seia tatou savavali fa'atasi ma Oe, **Amene.**

I LUGA O LE ALA

3 – O le Faigamalaga o le Fa'atuatua

Aso Sa – Me 24: “O a mea ua e va'aia?” (*What do you see?*)

Tusi Faitau – Galuega 3:1-10

Matua – ff.3-4: *“Ua iloa mai e ia o Peteru ma Ioane a ulu atu i le malumalu, ona fa'atoga lea o ia i se meaalofo. Ona pulato'a lea o Peteru ma Ioane ia te ia, ua fa'apea atu, ‘Vaai mai ia ia te i ma'ua.’”*

A o aga'i atu Peteru ma Ioane i le malumalu, sa la va'aia se tagata pipili o loo nofo i le pa puipui e ulufale atu ai i le malumalu. Poo ai na fesoasoani e ta'ita'iina lenei pipili e nofo i le pa e ulufale mai ai tagata, na faia ma le manatu, o tagata uma e omai i le malumalu e le mafai ona misia le pipili i lo latou va'ai.

Sa iloa lelei e Peteru ma Ioane le pipili. E lei 'alo foi lo la va'ai, ae faimai ua *pulato'a*. Ua la va'ava'ai atu, ma ua la valaaulia foi le pipili, e va'ai mai. Sa manatu le pipili o le a maua sana mea mai ia Peteru ma Ioane i lo la puna'oa fa'ale-tupe, ae ua foa'i atu Peteru ma Ioane, mai lo la puna'oa fa'ale-fa'atuatua.

A o tatou aga'i i le falesa, o ai e te va'aia? O ai tatou te va'aia o loo mana'o-mia le fesoasoani, le fa'amafanafanaga, le fia tausami, ma le fia mafuta? Fa'amata e le ua tele lo tatou fa'amamafa i le falesa o loo tatou aga'i atu ai, ae galo ai ia i tatou, o tatou o le Ekalesia, o ave feau o le Tala Lelei i le Upu ma fa'atinoga?

Tatalo: Le Alii e, ia matou iloa ona savavali fa'atasi ma fa'atino le olaga fa'atuatua i lau Afio, a o savavali i luga o le ala, **Amene**.

Memorial Day (Amerika)

Aso Gafua – Me 25: “O a mea ua va'aia e isi?” (*What do others see?*)

Tusi Faitau – Galuega 5:12-16

Matua – f.15: “*Ua o'o ina 'au mai e latou i ē mamai i 'auala, ma fa'ataoto ai i moega ma fata, tau lava ina ia lafoia le ata o Peteru i nisi o i latou pe a ui ane.*”

I le tusi faitau o lenei aso, e le gata sa va'aiva'ai tagata ia Peteru ma le 'au aposetolo, ae sa iloa foi latou e tagata. Ua fa'amamalu i latou e tagata. O tagata sa i le ala ua latou maua le fa'atuatua ona o mea sa latou va'aia: o fa'ailoga ma vavega sa faia e Peteru ma le 'au aposetolo; ma mea sa latou molimauina: o le fa'aliliuina e ala i le fa'aolataga. O loo atagia le mana o le Atua e ala i le 'au aposetolo. Ua ta'uta'ua i latou ona o upu sa latou tautalala ai, o talitonuga sa latou maumautu'ū ai, fa'atasi ai ma vavega ofoofogia na latou faia sa momoo i ai tagata; e o'o i le ataata lafoia o Peteru, ua latou talitonu e 'auala mai ai le fa'amalologa!

I nei ona aso, o le a se va'aiga mai o tagata fa'atuatua ia te i tatou? E fa'apefea ona latou iloa mea ua tatou fa'atuatua ma talitonu i ai? E atagia i lo tatou tautala – tautala i upu fa'atupu fa'amoemoe, ae le o upu faitio ma tau fa'aleaga. E atagia foi i a tatou galuega – ofoina atu le fesoasoani i isi. O atagia le mana o le Atua i lo tatou ola? O avea o tatou tagata ma ala e fa'atino ai ni suiga lelei mo le manuia o tagata lautele?

Tatalo: Le Alii e, seia e fa'atonu o matou ala e fesootai ai tagata uma i lou alofa. Ia atagia lou mana i galuega uma matou te faia, **Amene**

Aso Lua – Me 26: “Valaau i le le nofo lelei” (*A call to discomfort*)

Tusi Faitau – Galuega 8:26-40

Matua – ff.26-27a: “*Ua fai mai foi le agelu a le Atua ia Filipino, ua fa'apea mai, 'Ina tu ia, ina alu i le itu i toga, i le ala e alu ifo mai Ieruselema i Kasa; o le mea ua tu'ufua lea'. Ona tu lea o ia i luga, ua alu.*”

O le valaauina o Filipino, na ia filifilia ai le toafa e aumau ai, e le ona o se mea na lolafolaina, ae pau o le nofoaga sa mafai ona maua e tusa ai ma mea sa tutupu.

O lana tali atu i fa'atonuga a le agelu, e afua mai i lona fa'atuatua i le Atua. O lona fa'atuatua lena sa atagia i lona usita'i. O lona uiga, e le masalomia na silafia lelei e Filippo, o le a fa'aaogāina o ia e le Atua i totonu o le toafa.

Na gaiioi Filippo i luga o le fa'atuatua, ma na ia maua se tagata Atiope i le toafa na te le masani ai, o loo sailia le fa'atutua ma manaomia le fa'amalamalamaina. Ona fa'amatala lea e Filippo le tagata na ia masani ai, o Iesu lea, fa'atasi ai ma mea uma sa ia molimauina fa'atasi ma ia. Sa fesoasoani lea i le tagata Atiope, ma ua malamalama ai foi o ia i le tusi o Isaia sa ia faitauina, e fa'ataua ia Iesu

Fa'amata seiloga ua e silafia le tulaga lelei o le nofoaga o le a e galue ai, ona fa'atoa e ofo laia e avea ma soo o le Alii?

Tatalo: Le Alii e, ia avea o au e pei o Filippo, e le popole i le nofoaga e galue ai, ae tau lava o le fa'atuatua ma le usita'i i lou finagalo, **Amene.**

Aso Lulu – Me 27: “Valaau i le ola e le masani ai” (A call to radical living)

Tusi Faitau – Galuega 9:1-19

Matua – ff.17b-18a: *“Lo'u uso e Saulo, ua auina mai au e le Alii o Iesu, sa fa'aali ia te oe i le ala na e sau ai, ina ia e toe va'ai, ma ia fa'atumuina oe i le Agaga Paia' Ona pauu loa lea o mea nai ona mata peiseai ni una; ona toe vaai lea o ia.”*

E feoloolo le auina atu e galue i se nofoaga e le nofo lelei ai. A o le valaau lea e galue i se nofoaga e lamatia ai le ola, e sala le fa'alotolotolua o le so'o. Na vala'uina Anaia e fesoasoani ia Saulo, le tagata ua lauiloa i lona sauaina ma lona fasiotia o tagata Kerisiano. O ai a mana'o i se vala'auina faapea? O le upu moni, e lei taliaina e Anania le vala'au, e iloa i ana upu tete'e. Peita'i, ina ua iloa e Anania le finagalo o le Atua i le fa'aaogāina o Saulo e fai ma ana mea faigaluega e o'o atu ai le Tala Lelei i nu'u ese, o iina na talia ai e Anania le vala'au.

I se isi foi va'aiga, o le avanoa lelei foi lea mo Anania e tui ma sui atu ia ia Saulo ona o le tele o uso Kerisiano sa ia fasiotia. Peita'i, ua filifili Anania na te talia le finagalo o le Atua mo Saulo. Sa le faigofie mo Anania. Ae ua iloa lona taliaina o le vala'au, ina ua fai atu ia Saulo, *‘Lo'u uso e...’*

Aumaia e Anania se lu'itau lelei mo i tatou, ina ia tatou maua le lototele e fesaga'i ai ma o tatou fili, pe afai o le misiona lea o le Atua mo i tatou.

Tatalo: Le Alii e, 'aumaia le lototele e fa'atinoina ai le fa'atuatua e pei ona e valaauina ai i matou, e ui ina ou fefe i mea o le a o'o mai, **Amene.**

Aso Tofi – Me 28: “Pe a faia e le Atua mea e le mafaia”

Tusi Faitau – Galuega 12:6-19 (When God does the impossible)

Matua – ff.15-16: *“Ua fai mai i latou ia te ia, ‘Ua e valea’. A ua finau atu pea ia, ‘E moni lava’. Ona fa'apea mai lea o i latou, ‘O lana agelu ia’. A ua tu'itu'i atu pea o Peteru; ona tatala lea e i latou, ua iloa atu ia te ia, ona ofo ai lea o i latou.’*

E to'atele le 'au Kerisiano i nei ona aso, a o'o mai puapuaga e afaina atoa ai se atunuu poo se faigamalo, ona taalo lea o se aso tatalo, e tatalo ai tagata uma o le atunuu i le Atua mo se laveaiina mai i puapuaga o loo feagai ai. O le fa'a-fale puipuiina o Peteru e pei ona aumai e le tusi faitau o lenei aso, e moni lava e le o se puapuaga fa'ale-atunuu, ae mo le 'au Kerisiano i le ulua'i senituri, o se fa'alave-

lave ogaoga tele – le ta'ita'i o le 'au Aposetolo sa tu'u i ai e Iesu lana galuega latou te fa'aaauaina, a o lea ua taofia i le fale puipui.

Faimai na potopoto le 'au Kerisiano i le fale o Maria e tatalo ai mo Peteru. E le o se mea le tatalo o le 'au Kerisiano. I le mataupu muamua o le tusi o Galuega, faimai se loto atu le 'au Kerisiano i le tatalo i aso uma (Gal1:14). Molimau foi Iakopo i le potopoto fa'atasi o toeaia o le Ekalesia e tatalo mo e mama'i (Iak 5:14). Fa'amalosi foi e Paulo le olaga tatalo i taimi o fa'ama'i pepesi ma taimi o ta'utinoga ma mana'oga e momoli i le Atua (1Tim2:1).

O le mata'utia o le 'auala na fa'asa'olotoina ai Peteru mai le falepuipui, na mafua ona o talosaga a le 'au Kerisiano i le Atua, o i latou sa potopoto i le fale o Maria (Gal12:5). Afai sa potopoto le 'au Kerisiano e tatalo mo Peteru i le fale puipui, aisea na le talitonu ai le 'au Kerisiano ina ua fai atu Rosa sa ia fa'alogoia le leo o Peteru o loo tu'itu'i i le faitoto'a? Aisea na latou ofo ai ina ua latou va'ai ia Peteru? Pe sa i ai se masalosologa e le tali le Atua i o latou talosaga mo le laveaia o Peteru? O le malosi o le tatalo na faia ai e le Alii le mea ofofofoga mo tagata ua valaau atu.

Tatalo: O le a se mea e te iloa e ona tupu mai i le tatalo? Pe e te tatalo atu i le Atua ma fa'atuatua, e faia e Ia mea ua e tatalo atu i ai? **Amene**

Aso Faraile – Me 29: “O oe ea lena, le Atua?” (*Is that you, God*)

Tusi Faitau – Galuega 16:6-15

Matua – ff.7b-9: *“Ona taumafai ai lea e i latou ona o atu i Pitunia; a ua le mafai...Ona ui fa'atafatafa ane lea o i latou i Musia, ua o'o ifo i Teroa. Ua iloa foi e Paulo le fa'aaliga i le po; o le tasi tagata Maketonia ua tu mai, ma aioi mai ia te ia, ua fa'apea mai, 'Sau ia i Maketonia, ma fesoasoani mai ia te i matou.'”*

I le savaliga o le fa'atuatua, o le a so tatou iloa o fa'alavelave e tutupu mai, aemaise o fa'alavelavele e fai ma lu'itau o le fa'atuatua? Fa'amata e le o se avanoa lelei ea lea e fa'ailoa ai lo tatou ola tumua i le fa'atuatua, e ala i lo tatou onosa'ia ma lavatia fa'alavelave e tutupu mai? Poo fa'alavelave, o se mea mai le Atua, e taofia ai i tatou mai le faia o se mea e le tatau ona tatou faia? O se fa'ata'ita'iga: ua le ola lou ta'avale i le taeao, ma ua tuai ai ona e usu e faigaluega. Ae toe iloa ane mulimuli, e i ai le fa'alavelave tau ta'avale na tupu tonu lava i le taimi ma le 'auala lea e masani ona e ui ai i le taeao e aga'i ai e faigaluega. Ua aoga le pe o lou ta'avale, se manū e te afaina ai i le fa'alavelave tau ta'avale lea.

O le misiona a Paulo o le tala'i atu lea o le Tala Lelei ia Keriso ma atia'e le Ekalesia. Sa malaga atu i lea 'aai ma lea 'aai e fa'atino ai lona misiona. Ae aisea ua vaioa ai e le Atua lona o'o atu i le 'aai o Pitunia? E i ai se mea o fa'aletonu ai? Masalo e leai se fa'aletonu o Pitunia, ae pei ona faimai le tala, o le taimi tonu lea na sili ai ona mana'omia Paulo i Maketonia nai lo Pitunia. E le tatau ona tatou vavevave e fa'amatala fa'alavelave e tutupu mai e pei o se fa'ailo mai le Atua. Peita'i, e le tatau foi ona tatou fa'apea, e le o manatu mai le Atua ia te i tatou.

E fa'apea ona tatou iloa le eseese o lagona e tula'i mai ona o le Agaga Paia, ma le fa'aali sa'o mai o le Agaga Paia? O le upu moni, e i ai taimi e tutusa ai mea ia e lua. Peita'i, o le faifai pea o le mafutaga fa'atasi ma le Atua, o iina e iloa ai le eseese o mea ia e lua. Talanoa ma fa'alogoa pea i le Atua mo lona si'ufofoga.

‘Aua ne’i vavevave ni ou fa’aiuga e fai. Ae fesili i le Atua e fesoasoani mai e te malamalama ai. E le faigata ona tatou iloa le finagalo le Atua, ae fa’amoemoe i le vāvā lalata o lou mafutaga ma le Atua, na te ta’ita’iina i tatou. Ma, e pei o Paulo, o le taimi tatou te mautinoa ai lona finagalo, usita’ia loa ma fa’atino.

Tatalo: Mafutaina i matou e lou Agaga, e ta’ita’iina ai i matou ina ia manatua le tala lelei e pei ona fa’ailoa mai, **Amene.**

Aso Toonai – Me 30: “O a mea o i luga o lou lisi o mea fai?”

Tusi Faitau – 1 Korinito 16:5-12 (*What’s on your ‘to do’ list?*)

Matua – ff.8-9: “*Ou te nofo pea i Efeso seia o’o i le Penetekoso. Auā ua fa’aavanoa mo a’u le faitoto’a lautele ma le matuā aogā, e to’atele foi o ē fa’atu’i ese.*”

O lenei vaiaso sa tatou: su’esu’e i le auala tatou te tali atu ai i ē tatou te fetai’i a o tulimata’i lo tatou ola mafuta ma le Atua, mafaufau i le va’ava’ai mai o isi ia te i tatou i taimi tatou te mafuta ai, taga’i i lo tatou naunau e malaga atu mo le Atua i nofoaga lē to’a ma lē saogalemu, tatala atu o tatou tagata i le Atua ma le ofoofogia o ana mea e fai, ma tatou taumafai e malamalama pe fa’apefea ona tatou iloa moni le ta’ita’iiga o le Agaga Paia i o tatou tagata. O le ā se lu’itua a Paulo mo i tatou e fa’aiuina ai lenei vaiaso?

O le tusi faitau o lenei aso, e pei le vaega lea o le tusi o se kalena a se Pule o se Kamupani; ua uma ona tu’u matāmagaina lona lisi o mea e fai. O faiga ia a le tagata e ola mo le misiona. Ua fa’ailoa mai e Paulo, o le vala’auina o le Kerisiano: ia tala’i atu ma folafola le Tala Lelei, ina ia talia e tagata le alofa o le Atua ma savavali ma le fa’atuatua ia te Ia. O le Kerisiano e tataua ona tausiniō e fa’atino le galuega a le Atua, ia maua avanoa e feagai ai ma tagata e o’o atu i ai le Upu folafola. E i ai taimi e iloa ai e Paulo avanoa lelei e o’o atu ai le talaiga. Peita’i, e i ai pea isi ua lē talia. O le vala’au mo i tatou uma, ina ia fa’amalolosi e folafola atu le Tala Telei a le Atua: ia savavali ma le fa’atuatua tagata uma, ia Keriso Iesu.

Tatalo: Le Alii e, fesoasoani mai ina ia mataala ma fa’atino avanoa e folafola ai le talaina o le Tala lelei ia Keriso Iesu, **Amene.**

O LE AFI I LE TUSI PAIA

1 – O le Atua ma le Afi

Aso Sa Penetekoso

Aso Sa – Me 31: “Laulaufaiva afi” (*Tongues of fire*)

Tusi Faitau – Galuega 2:1-13

Matua – f.3: “*...ua iloa foi e i latou o laulaufaiva peiseai o le afi ua vaevaeina, ua nofo i o tatou luga ta’ito’atasi.*”

O le Atua ma le afi le autū o lenei vaiaso, ma, o le a tatou va’ava’ai faitauga o lenei vaiaso i auala eseese tatou te iloaitino ai le afi lea e sau mai i le Atua, e pei ona fa’amaumauina i le Tusi Paia. O le afi e 2 ona itu e aogā ai: e aoga mo le fa’amamāina o se mea (*purifying agent*), ma e aoga mo le fa’aumatiaina o se mea (*agent of destruction*).

O le tusi faitau o lenei aso o loo fa’ailoa mai ai le afi na sau mai le lagi, na mafai ai e tagata ona tautala i gagana o isi tagata, e fo’ia ai le fevaevaea’i o le gagana na ta’apeape ai tagata i le taimi na fausia ai le Olo i Papelu (Ken11:1-9). E ui o le Olo sa fausia ona o manatu fa’amauululuga o tagata ua fia o’o i le lagi e afio ai le Atua, ae na mafua ona potopoto fa’atasi tagata i Papelu, na omai e tapua’i i le Atua e ala i le fa’amanatuina o le tausamiga o le ulua’i seleselega.

E nei foi ona aso, ua fausia e le tagata ia lana ia lalolagi e ala i le fa’aogāina o lana laulaufaiva. O fa’aogāina o tatou laulaufaiva e fa’afaigofie ma fa’amatagofie ai le olaga lea tatou te ola ai mo i tatou ma isi tagata o loo tatou mafuta fa’atasi, poo fa’aogā lou laulaufaiva mo oe lava ia ma se lelei na o oe? O le fesili lea o loo aumai e le tusi faitau mo i tatou i lenei aso. A o la tatou tali, e iloa i a tatou mea e fai e lea aso ma lea aso.

Tatalo: Le Alii e, ua avea lou laulaufaiva e fa’atupuina ai le mafuta fa’atasi, ae lē o le fe’ese’eseai. Ia fa’apena foi le fa’aogāina o matou laulaufaiva, **Amene.**

Queens Birthday (Niu Sila)

Aso Gafua – Iuni 1: “Mū, ae le fa’aumatia” (*Burning, yet not consumed*)

Tusi Faitau – Esoto 3:1-10

Matua – f.2: “*Ua fa’aali mai ai ia te ia le agelu a le Alii i le afi mumū i totonu o le la’au talatala; ona vaai atu lea o ia, fa’auta, o loo mu lava le la’au talatala i le afi, a e le’i fa’aumatia le la’au talatala.*”

Tatou te tauane pea i taimi o fa’amasinoga lē tonu. A e o le a sau tali atu i ia tulaga? O le tele o mea ua tatou faia e tali ai lea fa’afitauli, ua na o se fa’atinoga e fa’anofu filemu ai le lagona lē fiafia ma tu’u ai pea! E foliga fa’apea se ata o loo va’aia i le molimau lenei a le Esoto. Ua va’aia e Mose le laau talatala ua mumū i le afi, a e le fa’aumatia. E atagia soo foi lea amio i mea tatou te faia. Tatou te manana’o ia faia, a e le fa’atinoina lava. E tataua ona fa’aali ma fa’atino, peitai, e faigofie lava ona saili auuala a e nofonofu fa’afifilemu ma fa’apalapala ai lava.

E foliga e fa’apea foi i uiga o Mose, i le amataga. O le uluai fesootaiga a Mose ma le Atua, e peiseai na taumafai Mose e ‘alo ‘ese mai le fa’atinoga. Peitai’i, o le siufofoga o le Atua na fa’amalosia Mose ia alu e feagai ma le fa’atinoga o le amiotonu, e ui o loo fefe ma lē mautinoa le mea e ao ona fai.

O loo fetalai mai pea le Alii i aso uma, a o tatou vaavaai atu i le mumū o le afi, o faigata ia ma puapuaga o loo aafia ai i tatou i le tele o aso. Pe tatou te le fa’amalolosi ‘ea e fa’alogo i le si’ufofoga o le Alii, ua fa’apea mai: Ia tatou fa’amalolosi e fa’atino le fa’amasinoga tonu, e fa’apei ona faia e Mose? Pe tatou te tutumau ‘ea i le fefe ma le masalosalo i le mana o le Atua e mafaia ai mea uma? Ua uma ona tu’uina mai le sa’olotoga e filifili ai i lou loto. Ia fa’amalosi e tali atu i le, “IOE”. Ou te fa’amalosi e tete’e atu i mea sesē ma le amioletonu, a e fai lau amiotonu e pei ona finagalo ai.

Tatalo: Le Alii e, ia matou maua le agaga e fa’atino le fa’amasinoga tonu, e ui ina mumū fa’a-afi uiga le alofa ma manatu fa’apito o le lalolagi, **Amene.**

Aso Lua – Iuni 2: “O le afi fa’aniutu” (*A pillar of fire*)

Tusi Faitau – Esoto 13:17-22

Matua – f.21: “*Ua afio le ALII i o latou luma i le ao fa’aniutu i le ao, e ta’ita’iina ai i latou i le ala, a o le afi fa’aniutu i le po e fa’amalamalama a’i i latou, ina ia savavali i le ao atoa ma le po.*”

O se vaai e faigata ona malamalama ai---o le afi e mumū i luma ae mulimuli ai tagata i tua. A tu’u mai i o tatou augā tupulaga, e sosola tagata pe a vaavaai i se afi mumū tele i o latou luma. O le afi fa’aniutu ma le ao fa’aniutu i le po, o se ata e faigata ona malamalama i ai i o tatou aso.

A e afai tatou te manatunatu loloto i le fa’auigaina o lenei ata, ona fa’apea lea: E foliga o le malamalama i le ao, o le pupula malosi mai lea o le la; ma le ao fa’aniutu i le po, o le sau mālū lea o ao o le lagi, e fa’atusa i ai le mafuta mai pea o le Agaga o le Atua na te taitaiina ma puipuia lo tatou saogalemu.

Tatou te faimalaga fa’atasi ma le Alii, e fa’apei ona faia e Isaraelu. O ao ma po o loo tatou vaai ai fa’aioiga ofoofoga, auā o loo mafuta mai pea le Alii. O le malamalama i le ao ma le sau mālū o le po, o le fa’amanatu mai lea o le Agaga o le Atua e puipuia lo tatou ola. E ‘auai mai le Agaga o le Alii i le ao fa’apea le po, e o fa’atasi mea ia e lua i le silafaga a le Atua soifua. O le malamalama o le afi fa’aniutu i le po ma le ao fa’aniutu i le ao, e i ai fa’atasi ma lu’itau eseese i le olaga fa’aauu o le tagata.

Se’i o tatou manatunatu loloto ifo i o tatou tagata ta’ito’atasi, poo fa’apefa ona tatou talia mea-alofa e tele ua foaiina mai mo i tatou ta’ito’atasi. O loo mafuta mai le Alii, o loo ta’ita’iina ma puipuia i tatou e le Alii: Poo tatou iloa ‘ea ma malamalama i le agalelei lea o le Alii ia i tatou ta’ita’otasi?

Tatalo: Le Alii e, o le Atua o loo fa’atasi pea ma i matou, se’i ta’ita’i i matou ia iloa moni lou fa’atasi mai i o matou olaga ta’ito’atasi, **Amene.**

Aso Lulu – Iuni 3: “Tauluga mu o le fa’afetai” (*Burnt thank offerings*)

Tusi Faitau – 2 Nofoaiga a Tupu 7:1-11

Matua – f.1: “*Ua fa’ai’u e Solomona lana tatalo, ona pa’ū ifo ai lea o le afi mai le lagi, ua fa’aumatia ai le tauluga mu ma taulaga; ua tumu foi le fale i le pupula o le ALII.*”

Ua fa’aalia e le tupu o Solomona, i le nofoaga ua saunia e avatu ai le taulaga o le fa’afetai; ua fo’i tagata o le nu’u i lona aiga ua fa’atumulia i le agaga fiafia ma le olioli auā ua fa’aalia ia Tavita, o Solomona ma le nu’u o Isaraelu, le agalelei ma le alofa o lo latou Alii le Atua. O le afi mumū mai le lagi o le fa’aioiga ua talia e le Atua le taulaga na saunia e Solomona. \

O le taulaga o le fa’afetai, o le fa’atinoga lea o le loto ua fa’amalieina ona o mea lelei ua maua. Ua i ai atunu’u ma malo o le lalolagi ua latou fa’atulagaina aso e fa’amanatu ai pea, “Aso Fa’afetai”, ona o le tamāoaiga ua maua i fua o fa’ato’aga ma le laueleele, o le ‘ea foi ma le sami. A e le gata i lea, o le fa’amanatuina ma o le loto fa’afetai, ona o le sa’olotoga ua maua nai le pologa ma faigata sa ui mai ai.

A fuafua atu i o tatou foi aso, ua tatou fiafia ma fa’afetai ona o taumafa e tele ua maua i aso ta’itasi. Peitai, ua tatou le iloa poo fea e ‘aumai ai, a o ai foi na

totōina ma fa'atupuina. Ua avea lea lagona le mautinoa, ma auala ua tatou fa'afetai ai i le tele o kamupani eseese o loo gaosia ma tufatufa atu oloa e fa'atau.

Ua fa'aopoopo pea sailiiliga ma su'esu'ega fa'asaienisi i vailaau eseese ua gaosia, ina ia vave tutupu ai ma olaola laau i fa'ato'aga. Peitai, ua avea ia fuafuaga ma fa'apogai o faigata ma fa'afitauli i le laueleele ma le si'osi'omaga, ona o vaila'au e fefiloi ai ma mea e aafia ai le soifuaga maloloina o le tagata. Pe afai o le a fa'auau pea lenei faiga, o lona uiga, o le a fa'alagolago tele i mea e fausia e le tagata. A o mea e fausia e le tagata, e le tumau sona lelei. O le vaifofo e sili ona fa'amoemoeina--o mea lelei ia ua uma ona saunia e le Atua mo le tagata i le lalolagi e soifua lelei ai, ma manuia ai.

Tatalo: O le Alii le Atua na foafoaina mea uma i le lalolagi. O le laueleele, o le 'ea ma le sami, ua saunia lelei mo le lalolagi e ola ma fiafia ai, **Amene.**

Aso Tofi – Iuni 4: “O le afi e fa'aliliuina” (*Transforming fire*)

Tusi Faitau – Luka 3:15-18

Matua – f.17: “*O i lona aao lana asu, e fa'amama ai e ia lana fa'aputugasaito; e fa'apotopoto foi e ia le saito i lona fale saito, a e susunuina le otaota o saito i le afi e le matineia.*”

O lenei vai taimi o le soifuaga fa'ale-tagata i totonu o nu'u ma atunu'u, ua fa'aopoopo pea uiga fa'ailoga-lanu ma fa'ailoga-tagata, ua o'o ina tutupu ai faigata ma taotaomia ai le soifuaga sa'oloto o le to'atele. O le tusi faitau mo lenei aso, ua fa'atatau lea i le fa'amamaina o le fa'aputugasaito, e ala i le 'ave'esea o le otaota. E tu'u pea le saito lelei, a e 'ave'ese le otaota. O le fa'atusa lea o e faia le amiotonu a le Atua, ma i latou e le o faia le amiotonu, e tatau ona tu'u'eseina.

O lenei ata fa'atusa, ua tatou iloa ai e 'au le Atua ma e faia lona finagalo, e fa'apei ona valaauina ai i tatou e 'avea ma Kerisiano fa'amaoni ma usiusitai. O le fa'atinoina o le amiotonu e fa'avae i le alofa ma le agalelei o le Atua, o le fa'atinoina lava lea o le soifuaga to'a filemu ma le olaga sa'oloto i le lalolagi o faigata ma puapuaga. Po ua tatou sauni 'ea e fa'afeagai ma faigata ma puapuaga o le lalolagi? Ia avea i tatou e fai ma saito lelei, a e le o le otaota e susunu i le afi!

Tatalo: Le Alii e, ia avea i matou e fai ma “saito lelei” e ala i le fa'atinoina o lau amiotonu. Ia matou usiusitai e fa'atino lou finagalo i lalolagi, **Amene.**

Aso Faraiile – Iuni 5: “Taulaga e faia i le afi” (*An offering by fire*)

Tusi Faitau – Levitiko 6:14-17

Matua – 17b: “*...Ua ou avatu ai e fai ma latou i taulaga ia te a'u e fai i le afi; ua matua paia lava...*”

Ua fa'aailoa mai e le Tusi Faitau o lenei aso le fa'atinoga o le taulaga e osia i luma o le Atua o Isaraelu, o le taulaga o le fa'afetai e tusa ma fua o fa'ato'aga. I aso anamua ia Isaraelu ma ana aganu'u, o ositaulaga e osia le taulaga i le Atua i luga o le fata faitaulaga, a o fa'amumū pea le afi. O le fa'amumūina o le afi, o le fa'aailoga o loo mafuta mai le Atua, i le osiga o le taulaga, e paia ma mamalu.

Ua fa'augaina le afi mumū, o le fa'aailoga o le mana o le Silisili Ese. O lona uiga, ua 'avea le afi o se mea paia. O le mea lea, o aganu'u masani a tagata Initia,

e fa'amumū pea le afi i se tulaga pito maualuga. O le fa'amumūina o le afi i le malumalu e tapua'i ai, o le fa'aailoga o le afi e mumū pea i le ola fa'avavau, e fa'amumū pea i le malumalu e tapua'i ai i le Atua.

E mumū pea le afi i totonu o le tanoa siliva, ma ua na o le ositaulaga e ulufale ina o mumū pea le afi. E tatalo le ositaulaga e fai ma sui o i latou o loo tapua'i. Tatou te talitonu o le fa'atinoga lava lenei o le fa'amasinoga tonu, e fa'apei o le taulaga ua osia i le afi mo le manuia o tagata uma. Afai o le a fa'amumū pea le afi o le fa'aailoga o le fa'amasino tonu, e avea lea avanoa e fia silasila mai ai le Atua i taulaga ua tatou osia. Po ua tatou sauni 'ea e fa'amumū pea le afi o le fa'amasinoga tonu?

Tatalo: Le Alii e, ua fa'atusaina lou malosī e fa'apei o se afi e mumū pea i o matou olaga. Ia matou fa'amumū atu lea afi e tineia ai mea leaga uma, **Amene.**

Aso Toona'i – Iuni 6: “O tigā ma mafatiaga o le afi”

Tusi Faitau: Luka 16:19-31. (The agony of fire).

Matua (f.24): *“Ua alaga atu foi o ia, ua fai atu, Lo'u tamā e, Aperaamo, ia e alofa mai ia te a'u, ma ia e auina mai Lasalo, na te fufui i le tumutumu o lona tamatama'ilima i se vai, e fa'amālilū a'i lo'u nei laulaufaiva; auā ua ou puapuaga i le mumū o le afi nei.”*

E leai se tasi e sao mai le sesē. E tupu soo i totonu o mafutaga fa'a-aiga, i matua ma fanau---e tofu lava le tagata ma ona sesē i le va feagai ma isi. Peitai, e i ai pea le avanoa e fa'ato'ese ai ma fa'amaulalo le tasi i le isi, pe a o'o ina mautinoa mulimuli ane, o ai ua sesē a o ai foi ua tonu.

Ua fa'amatala i le tusi faitau o le aso lenei, le tala i le manatu fa'atauua o le tagata mau'oa i le tagata mativa o loo nofo i fafo o le faitotoa o lona fale, ua galala i le fia'ai ma fia inu. E tele faigata ma puapuaga o le olaga. E tele foi taimi e maua ai le tamāoaiga a e fa'aaogā lē tataui tu'inaanu o le olaga, e fa'apei o le tagata mau'oa.

O le manatu alofa e fafaga ma fesoasoani i e matitiva, o se uiga taūa e i ai i so'o se Kerisiano. E i ai taimi i le olaga e maua uma ai mea e loto i ai le tagata, peitai, e fa'afuase'i ona mou atu ia mea a e fa'amativaina le tagata. A e o le fa'amativaina lea e tupu a'e ai se lagona fou, e peiseai ua i ai se fa'atinoga sa lē tonu ona fai. O le Tala Lelei i le Keriso, ua a'oa'o mai i tatou ia ola fiafia e fa'asoa ma fesoasoani i e ua lailoa i le fia 'a'ai ma fia inu.

Fa'amata o le tala i le mau'oa ma lana 'ai'oi ia Aperaamo e 'auina mai Lasalo, e i ai sona lu'itau ia te 'oe, ina ia e alofa ma fesoasoani i e ua lailoa i le fia 'a'ai ma fia inu? 'Aua ia ne'i avea lenei lu'i o se fa'amata'u, a e ia fausia ai se lagona fou, ina ia manatua ane i lau fa'asoa, pe a mafai ona fa'atino, i sou tamāoaiga fa'asilī e fesoasoani ai i e o loo mafatia i le olaga mativa ma le lē tagolima.

Tatalo: Le Atua e, foai mai le loto ma le lagona e fia fa'asoa atu i e mana'omia le fesoasoani. 'Ave'ese i o matou loto le manatu fa'apito e fa'aputo ma taofiofi le fa'asiliga o mea lelei ua matou maua, a e fa'asoa lea fa'asiliga o mea lelei mo le manuia lautele. **Amene.**

O LE AFI I LE TUSI PAIA

2 – O le Malosi o le Afi

Asa Sa – Iuni 7: “Mauga mumū” (*A mountain ablaze*)

Tusi Faitau – Teuteronome 4:9-14

Matua – ff.11-12: “*Ona outou fa’alatalata atu lea ma tutu i lalo o le mauga, na mu foi le mauga i le afi, ua o’o lava i le lagi, ua i ai foi le pouliulu, ma ao, ma le pogisa. Ona fetalai mai lea o le Alii ia te outou mai totonu o le afi, ua outou fa’alogologo i le siufofoga, a ua outou le iloa atu se mea e tino a’i mai, na o le siufofoga lava.*”

O le mauga ma le afi mumū tele ua tusia i le Teuteronome, o se vaaiga ua masani ai Mose, o loo fa’aalia ai le silisili ese ma le siufofoga o le Atua ua fa’atusa i se afi mumū i atu mauga. Ua le o se vaaiga muamua lea i le mauga o Horepa. Auā o le tusi o Esoto 3, o loo fa’aalia ai foi le Atua i le vaovao mumū a e lē fa’aumatia. E foliga o loo i ai se fe’au taūa o loo ‘aumaia i lenei ata: e tumau le finagalo o le Alii, e paia o Ia ma mamalu, e ‘auala mai ai lona finagalo.

Na va’aia i le mauga o Horepa le mafuta mai o le Atua i le fa’aliliuina o le olaga o le tagata. Na feagai Mose ma le fa’aali mai o le Atua mo le ‘aumaia o le fe’au mo ona tagata, ina ia ola ma soifua ai e tusa ma tulafono ma poloaiga e mulimuli ai. Na amata mai Mose o ia o se leoleo manu, seia o’o ina avea ma ta’ita’i o se malo tele ma taualoaina; o iina na auala mai ai le fa’atinoga ma le osiga o le feagaiga e tusa ma le finagalo o le Atua, o le fe’au lea e ao ina fa’aauuina i le lalolagi uma.

O le soifuaga fa’afeagai ma le Atua, o le olaga e fa’afouina pea! O se feagaiga e fa’aituala lua, aua o lou fa’afouina e mafaia ai ona fa’afouina ai le olaga o le to’atele. Ua lē fa’apea o se ata o le mauga ma le afi mumū pea, o le auala lea mo le Atua ma le tagata i nei ona po. Peitai, e i ai pea le “Horepa” i o tatou olaga ta’ito’atasi, o le mea lea, e tatau ai ona fa’afouina o tatou olaga. Fa’amata o fea e te vaaia ai le Atua “i le afi” i lenei vaiaso? E fa’apefea ona fa’aliliuina lou olaga, ina ia fa’afouina ai nisi?

Tatalo: Le Alii e, ia e fa’ailoa mai ia te a’u le ‘ala i le Mauga o Horepa’, ina ia fa’aliliuina ai lo’u olaga, ma maua ai le ola-fa’afouina, **Amene.**

Queen’s Birthday (Ausetalia)

Aso Gafua – Iuni 8: “Ua lafo i totonu o le afi” (*Thrown in the fire*)

Tusi Faitau – Tanielu 3:19-30

Matua – ff.24b-25: “*... Pe na tatou le lafoina ‘ea tagata e to’atolu e fusifusia i totonu o le afi? Ua tali mai i latou, ua fa’apea mai i le tupu, Le tupu e, sa fa’apea lava. Ua tali atu o ia, ua fa’apea atu, Fa’auta, ua ou iloa tagata e to’afa, ua tatalaina, ua feoa’i i totonu o le afi, ua lē afaina lava i latou; ua tino mai lona to’afa ua pei o se alo o le Atua.*”

E i ai le muāgagana e fa’apea: “E sili le vaai e talitonu ai.” Ua fetau tonu i le tupu o Nepukanesa lea muāgagana ma lana va’ai i totonu o le ogaumu vevela. O le upu moni, e lei fa’a’ole’ole le va’ai o ona mata! Ua va’ava’ai atu i taulele’a e to’atolu o loo feoa’i e le o afaina lava, ua i ai ma le isi tagata e to’afa a’i na iloa

mulimuli e le tupu, o le agelu pei ona ta'ua i le fuaiupu e 28. E lē fesiligia le maofa o Nepukanesa i lana va'ai, peitai, e le fesiligia foi le folafolaga e tusa ma le poloaiga a le ALII i ona tagata, e pei ona molimau Isaia 43.2.

Ua fa'amaonia i lenei va'aiga, e moni e mafuta mai le ALII, na te puipui i ona tagata mai faigata uma, e o'o lava i le lafotuina i le afi, e i ai le mana o le Atua. E fa'atasi mai le Alii i taimi o puapuaga, e ui ina foliga ua leai so tatou fa'amoemoe. O le talitonu ma le fa'atuatua o Sataraka, Mesako, ma Apeteniko, i le mana malosi o lo latou Atua, ua lava lea e fa'asaoina ai mai totonu o le mumū malosi o le afi.

Tatalo: Le Alii alofa e, ia e fesoasoani i e ua mafatia ma tigaina, ua leai so latou fa'amoemoe. O lou Mana e mafai ai mea faigata uma, **Amene.**

Aso Lulu – Iuni 10: “Le mafanafana o le afi” (*The warmth of a fire*)

Tusi Faitau – Mareko 14:66-72

Matua – f.67: “*Ua iloa e ia o Peteru o loo mumūlu, ua na vaai atu foi ia te ia, ua fa'apea atu: “O 'oe foi sa fa'atasi ma Iesu i Nasareta.”*

“*E ui lava ina tausuai o tagata uma, ou te lē fa'apea a'u*” (14:29). O le ta'utinoga lea mai ia Peteru e fa'amaonia ai lona loto ia Iesu. Na ia taumafai i se auala e taofi mau ai lana ta'utinoga ia Iesu, seia o'o ina ta'ita'iina o ia i luma o le laulau a le 'au ositaulaga sili. Peita'i, na i'u lava na fa'afiti, faimai na te le iloa lava Iesu.

Ua fa'aalia lona pala'ai ona o le fefe, o le pogai lea ua saili ai i se auala e fa'amafanafana ai i le mumū o le afi. Fa'amata na avea lona mafanafana i le afi, ma auala e te'a ai lona le fa'amaoni i lana ta'utinoga? Pe na 'avea le afi, ma auala e tu'u'eseina ai lona fa'atuatua i le mafutaga ma lona Alii? Atonu ua ia fa'amoemoe, e avea le afi ma auala e fa'amamaina ai ona manatunatuga leaga.

E sili ona faigofie le saili i le mea e fiafia ai, nai lo le taumafai pea ae ono taunu'u i se mea e sili atu ona faigata. O ia manatunatuga uma e tutupu ona e tau pupuni ai le to'ilalo sa i ai. E fa'apea foi le tulaga o le lalolagi ma mea sesē o loo tutupu ai. O le fa'amoemoe na ia Peteru, o le afi e fa'amafanafana ai, a o lea ua fai ma avanoa e fa'aalia ai mea sa natia. O lona uiga, o le afi e aofia ai mea e lua: o le fa'aliliuina, atoa ma le fa'alauiloaina. O le toilalo sa natia, ae ua fa'aali.

Tatalo: Le Atua e, ia e alofa ma ia e agalelei mai; a o'o ina matou agaleaga ma agasala, ia fa'amagalo mai, ia fa'atupu le fiafia e mafuta ma lau Afio, **Amene.**

Aso Tofi – Iuni 11: “O le laulaufaiva o le afi” (*The tongue is a fire*)

Tusi Faitau – Iakopo 3:1-6

Matua – ff.5b-6: “*Fa'auta, o le afi itiiti e mu ai le vao laau e tele! O le laulaufaiva, o le afi lea. O le laulaufaiva o le faupu'ega lea o amio leaga ua tu'uina i o tatou itu tino, o loo leaga ai le tino uma, ua fa'amuina ai le olaga nei uma lava; ua fa'amuina foi lona mai Kēna.*”

O se afi e mumū e fa'afuase'i ona tupu, e le iloa sona mafua'aga, a e o'o ina mumū tele ma fa'aumatia ai ni mea se tele pe a fai e le tineia. O le afi e amata i sina 'aloi afi itiiti ma ola pea se ia o'o ina malosi; e foliga fa'apea le laulaufaiva, e fa'apei ona molimau le tusi o Iakopo, o le afi lava lea.

O le laulaufaiva, o se vaega itiiti o le tino atoa o le tagata, a e i ai lona malosi e a'afia ai le olaga o le tagata. Ua fa'amatala i le Fa'ata'oto 18:21, "O le oti ma le ola, o loo i le pule a le laulaufaiva ia; ..." O natura iloga ia e va'aia ai le malosi o le "laulaufaiva", e fa'apei o le ao ma le po, le alofa ma le inoino, o le lelei foi ma le leaga. O le laulaufaiva e fa'amoemoe i ai fesootaiga i upu ma fa'amatalaga, e fa'amoemoe i ai viiga o le Atua; a e fa'apogai mai ai foi upu taufa'aleaga.

E fa'aopoopo i ia mea, o le faitatala, taufa'aleaga ma le talapepelo, o fa'aailoga uma ia o le laulaufaiva e lē pūlea, e tutupu mai ai maseiga ma le feitaga'i. O tulaga uma ia e mafua ai ona avefa le "laulaufaiva" ma a'upega malosi e fauina ai, e talepeina ai, e fa'amalosia ai, e fa'amaloloina ai, e fa'atama'ia ai foi ma toe fauina.

A o le laulaufaiva foi, o le a'upega e fa'asalalau atu ai le Tala Lelei; e ta'uta'u atu ai le finagalo o le Alii le Atua, i lona alofa ma lona agalelei; e tineia ai foi fa'amatalaga tau fa'a'ole'ole ma le lei o se fa'amaoni. Poo e fa'aogāina 'ea le laulaufaiva e auala mai ai fa'amanuia, poo le fa'atoilaloina?

Tatalo: Le Atua alofa e, ua matou tatalo atu e pei o la le fai Salamo: "*Ia e tu'uina se leoleo i lo'u nei gutu, ia e leoleo i le faitoto'a o o'u laugutu.*" (141:3), **Amene.**

Aso Faraile – Iuni 12: "O le afi fa'afeiloa'i" (A welcoming fire)

Tusi Faitau – Galuega 28:1-10

Matua – f.2: "*Ua ma'eu lava le alolofa mai o le nu'u ese ia i matou; aua ua latou tafu le afi, ma talia mai i matou uma lava, ona o le uaga ua to ifo, ma le malulu.*"

E masani i atunu'u malulu ona iloa le eseese o le 'ea mafanafana ma le 'ea malulu pe a o'o i masina o le tau malulu. A o'o i taimi e ulufale atu ai i totonu o maota tapua'i, e mana'omia lava le mafanafana o le 'ea. E logo i tino le pa'i mai o le mafanafana i taimi o tapuaiga! E fa'apea foi se lagona, pe a o'o i taimi o matagi malolosi, e fia maua lava se mapusaga e malu ai ma saogalemu ai.

E fa'apena le tulaga sa o'o i ai le faiga malaga a Paulo ma lana 'au malaga. Sa afatia i luga o le va'a i le malosi o galu ma le sousou o le vasa i matagi malolosi, e pei ona molimau le tusi faitau o lenei aso. O faigata fa'apea, e masani ai lava le olaga o le tagata i le lalolagi---o aso ua sousou, o aso foi ua to'amalie.

A e mo Paulo ma le 'au malaga, ua tuana'i nei faigata ma puapuaga, ua o'o ina tuta le vaa i le faga oneone. Ua o ane tagata o le nu'u, e ese la latou gagana ma e mata sāuā foi. Ae na fa'afeiloai i latou mafanafana o le afi. Fa'amata o se taunu'uga lea e mapu ai ma saogalemu mai faigata sa i ai? Fa'amata o se tali lelei lea e tua i ai le lamatia ma le popole sa i ai? O a lava tigā ma faigata ona o le eseese o gagana ma talitonuga, o le mafanafana o le afi o se to'omaga e mana'omia tele. O le i ai o le afi, o le avanoa lea e fesootai ai ma toe fa'afuina ai! O mea e faia i le agaga o le agalelei ma le alofa, e tele lona taūa i le loto o le tagata ua na maua, tusa lava poo a isi tulaga e fetaia'i ai.

E tofu mafutaga eseese fa'ale-Ekalesia ma taimi ma aso e faia ai a latou mafutaga ma fa'atasiga, e maua ai le mafanafana ma le to'amalie o le vevesi i le tele o fuafuaga e fa'atino fa'ale-ekalesia. E fa'apena foi i le fa'afeagai o Ekalesia ma talitonuga eseese, o talitonuga fa'ale-itumalo poo talitonuga fa'ale-tulafono---ui ina eseese loto ma fuafuaga fa'atino, a e mana'omia lava se avanoa e mafuta fa'atasi ai, ma maua ai le mafanafana i le loto.

A e o le mafutaga tu'u fa'atasi a le tagata talitonu ma fa'atuatua ma lona Alii o Iesu Keriso, o le fa'atusa lea o le mafutaga fiafia a Paulo ma le 'au malaga na faia i Melita, na fa'aalia ai le alofa ma le agalelei o le Atua i lana taitaiga filemu i taimi faigata ma puapuga o le olaga nei.

Tatalo: Le Atua alofa e, ia e fa'atupuina i o matou loto le mafanafana o lou alofa tunoa, lea ua fa'aolaina ai le lalolagi mai le leaga o le agasala. **Amene.**

Aso Toonai – Iuni 13: “O le afi e toe fa'afouina ai” (*A refining fire*)

Tusi Faitau – Isaia 48:9-11

Matua – f.10: *“Fa'auta, ua ou fa'ate'a le otaota ia te 'oe, a e le pei o le ario; ua ou filifilia 'oe i le ogaumu o i ai le puapuga.”*

O le afi e fa'afouina ai! E iloa le lelei o se mea ina ua fa'afouina i le afi! O le fa'afouina i le afi, o le fa'amamaina lava lea! O le toe fa'afou, o se tulaga e le faigofie ona fa'atino: e tu'u le u'amea i le ogatotonu o le ogaumu 'a'asa i se vaega e pito sili ona vevela, ina ia fa'aumatia le otaota le aogā, a e tu'u ai le u'amea ua fa'afouina e sili ona malosi. O le fa'afou i le afi, o se fa'atinoga e maua ai le vaega pito sili ona lelei---ua tu'u 'ese mea le aogā---a e totoe le vaega pito malosi ma lelei. O le taunu'uga o lenei fesuia'iga, o le otaota ma le fa'amamaina, e iloa lea i u'amea e vave ona palā ma 'elea, ma u'amea e umi aso ma tausaga o lelei pea.

A e le gata i lea, e tāua le tagata faigaluega o loo va'aia ma tausia le ogaumu ina ia tonu ma lelei mea uma---ia mataala ma fa'autauta lelei. O nei fa'atinoga uma, ua manino ma mautinoa ai e le faigofie le toe fa'afou, e ui lava ina taūa. A e le fa'apea e gata ai i le fa'afouina i le afi, i auala ua filifilia e isi, e o'o lava i le 'au Kerisiano. E i ai isi auala e māmā ma faigofie ua filifilia e nisi.

Peitai, afai e le susunuina ma fa'aumatia, afai foi e le māmā ma fufulu'eseina le otaota, ona leai lea o sona aoga o le fa'afouina i le afi. O le fa'atusa va'aia foi lea o le 'au fa'atuatua e lē atagia ai le soifuaga ma le olaga fou ia Keriso Iesu. O le ola fa'afouina e ala ia Keriso, o le fa'afouina lea o tatou loto ma amioga tatou te faia, e fa'apei ona molimau Paulo: *“O lenei, afai o ia Keriso se tasi, o le tagata fou ia; ua mavae le ola tuai, fa'auta, ua o'o mai le ola fou (2 Kori.5:17).”*

Tatalo: Le Alii, o le na te fa'afouina ma fa'amamaina o matou loto atoa uma, ia atagia i o matou olaga a'oa'oga taūa a Iesu, **Amene.**

EVAGELIA A MATAIO (2):

1 – Ole Atu, Saili, Tu'itu'i Atu

Aso Sa – Iuni 14: “Le faitoto'a ua matala” (*A door opens*)

Tusi Faitau – Mataio 7:7-12

Matua – f.7: *“Ia outou ole atu, ona foa'iina mai ai lea ia te outou; ia outou saili, ona outou maua ai lea; ia outou tu'itu'i atu, ona tōina ai lea ia te outou.”*

O loo tatou tutū nei i le ogatotonu o lalolagi e 2 – o le lalolagi e pule ai le Atua ma lona malo, ma le lalolagi e pule ai malo e ta'ita'iina e tagata. Talu ai e le o lata

mai se taimi e maua ai se fa'amasinoga tonu i le lalolagi, ua vala'auina i tatou se'i o tatou 'auai i se isi faiga fou.

O le "ole atu, saili, ma tu'itu'i atu" -- o fa'atinoga ia o le faiga fou lea e mafai ona tatou folau ai le ogatotonu o lalolagi ia e 2, e ala lea i le fegalegalea'i o mafaufauga ma le ola mautinoa e aunoa ma le fefe. I le faiga fou lea, o le "ole atu," o le sailia lea poo fea le mea tonu ma le mea sa'o. E fuafua le "ole atu" i le fa'atinoga o le agalelei atu i isi ma le ola mataala. "Saili," o lona uiga, o lou 'auai i soo se mea, e ala i le fa'atinoina o le agalelei atu i isi. E faigofie atu ai le "ole atu" nai lo le "saili." Ma, o le "tu'itu'i atu," o lona uiga, o le vala'aulia: 'Pe mafai ona ou faia?' 'E mafai ona e vala'aulia a'u i totonu?'

O fa'atinoga ia e tolu, na te fo'ia ai uiga masani o loo ola ai le lalolagi e pulea i ta'ita'iga fa'ale-tagata, e pei o le fa'amauuluga, o le sailiga o le malosi, ma le naunau i le pule. O le ola i le lalolagi e pule ai le Atua, e autu i le alofa tunoa, o le agalelei atu, ma le alofa na te suia ai le mafaufau mai le fa'amamafaina o mea e maua mai ma mea fa'asili, ae fa'amamafa le fa'asoa atu ma le fa'amativaina. O le autu lea o lo tatou "*ole atu, saili, ma tu'itu'i atu,*"

Tatalo: Le Atua ua foa'i mai le ola atoatoa mo tagata uma, ia matou iloa ona ole atu mo mea sili, saili i le amiotonu, ma tuitui atu mo le alofa tunoa, **Amene.**

Aso Gafua – Iuni 15: "I fea le ala?" (*Which way?*)

Tusi Faitau – Mataio 7:13-14

Matua – f.14: "*Aua e va apiapi le faitoto'a, e lauitiiti foi le ala e tau atu i le ola, e to'aitiiti foi i latou o e maua.*"

O le upu "va apiapi" e tele ona uiga sa fa'amatalaina ai i le tala fa'asolopito. O le isi uiga, o le "muimui." Ana mafai ona tatou 'alo ese ma nofoaga va itiiti, o gaioiga fa'atapulaaina, poo sa laina umi e to'atele tagata o tutu ma fa'atalitali ai, se manū tatou te 'alofia. E le fesiligia lea tulaga pe ana mautinoa o loo i ai se isi ala e mafai ona tatou uia e faigofie ai mea uma. O le ala faigofie – o le ala e le tele se galuega e faia ai – o le ala lena e mautinoa tatou te uia.

Leitua a mumūsu le to'atele sa mulimuli ia Iesu. O lana vala'au i le motu o tagata e uia le ala va apiapi – le ala tigaina e alofia e le to'atele – ua fai lea ma lu'itau ua le lavatia e isi. E ui i le matagofie o le tau i loo fa'atalitali mo ē latou te uia le ala lea e fetalai ai Iesu, a o le masani lava fa'ale-tagata, e naunau i se ala e iloa e saogalemu ai, ma talafeagai i le mafaufau ona uia.

O le ala faigofie, o le ala lena o le lalolagi e pule ai malo e ta'ita'iina e tagata. A o le ala va apiapi, o ala ia fa'a-Iesu – e le tutusa lona fa'amamafa ma le lalolagi. O le ala o mea faigata e lamatia ai le ola o le so'o. O le ala e tete'e i faiga o le lalolagi ma lona naunau i mea faigofie. O le ala lea a Iesu e manino lava i le va'ai o mata. Peita'i, e to'aitiiti lava i latou e mafai ona uia ma mulimuli atu ia Iesu.

Tatalo: Le Alii e, o le pogai o mea lelei uma, ia e ta'ita'i i matou ia matou maua au fa'amanuiaga, ae maise o mo'omo'oga ia faia lou finagalo, **Amene.**

Aso Lua – Iuni 16: "Amio" (*Character*)

Tusi Faitau – Mataio 7:15-20

Matua – f.16a: "*Tou te iloa i latou i o latou fua. ...*"

Ua to'atele tinā poo tamaita'i ua soifua mai i le lalolagi e le va'ai i foliga, ae taga'i i le amio. E to'atele ua lauiloa i o latou uiga lelei ma le tausaaafia. O le amiolelei ma uiga tausaaafia, e i ai lona taūa. O foliga va'aia o le tagata, e gata lava i le vaai o mata. A o uiga tauagafau ma le amio tausaaafia, e i ai lona taunu'uga i le lelei ma le fiafia; e aofia ai ma le ususita'i, agalelei ma le alofa.

I le tusi faitau o lenei aso, o uiga lelei ia ua fa'atinoina e le tagata, ua fa'atusaina o "fua lelei o le la'au". O fua leaga o le laau, e lafoa'i ma tia'i ona e leai sona aogā---e fa'atusaina foi i ai le tagata amio leaga. O le amiolelei ma fa'atinoga aogā, e tele le avanoa e tuputupu ai pea ma fa'alauatele. E inosia ma itagia le tagata faifai amio leaga. E fia silasila le Alii i ē fai amio lelei, auā o le fa'avae lea o galuega uma na faia e le Alii---ua lelei ma atoatoa.

E tele upu ma fa'amatalaga taūa fa'ale-Atua e fa'atatau i le amio lelei. E i ai fa'atinoga lelei ua molimauina i auuuna filifilia a le Atua mo le tala'iga o le Tala Lelei; e i ai foi e ua fa'atamala ma fa'avaivai i le fa'atinoina o le finagalo o le Alii. Ua valaauina i tatou e folafola le finagalo o le Alii, a'oa'o atu ma mulumuli i a'oa'oga a le Alii o Iesu, ia faia ia mea uma i le loto fiafia ma le agamalu.

Tatalo: Le Alii e, ia e filifilia i matou e tala'i atu lou finagalo tonu; fa'aaogā lo matou malosi fa'ale-maufaufau e fa'alauatele ai lou finagalo, **Amene.**

Aso Lulu – Iuni 17: “Misia le va'a” (*Missing the boat*)

Tusi Faitau – Mataio 7:21-23

Matua – f.23: “Ona 'ou ta'utino atu ai lea ia te i latou, 'Ou te le'i iloa lava outou; ina o 'ese ia outou ia te a'u, o outou o ē fai amio leaga.’”

Ua fa'aliliuga o le tusi faitau o lenei aso e le Message Bible, e ese foi le malie. I le fuaiupu lea ua avea ma matua (f.23): “*And do you know what I am going to say? You missed the boat! All you did was use me to make yourselves look important. You don't impress me one bit. You're out of here!*” Ua tatou misia le va'a, pe afai e taula'i la tatou fa'amamafa poo fea le talitonuga sa'o, nai lo le olaina o le mea sa'o. E mafai e tagata uma ona talitonu ma ta'utino lo latou fa'atuatua i upu ma tala. A o le olaina o le fa'atuatua, o le mea sili lena e fia maua.

O le avea ma so'o a Iesu e fa'avae i le alofa faifai pea o le Alii e tafe atu ai le ola ma le alofa i taimi uma. A toe fa'aupu, o le ave uma mo Iesu. O le olaina o le olaga ia atagia ai le loloto o le alofa mo e o loo manaomia le fesoasoani. Afai tatou te le mafaia, o lona uiga, ua tatou misia foi le va'a.

Tatalo: Ia avea lou soifua atoa e molimau i le alofa ma le agalelei o le Atua e ala ia Iesu Keriso – o le fa'atinoga o le alofa ua atoatoa mo le lalolagi uma, **Amene.**

Aso Tofi – Iuni 18: “Fau ia lelei” (*Building well*)

Tusi Faitau – Mataio 7:24-29

Matua – f.24: “*O lenei, a i se fa'alogi a a'u upu nei, ma faia e ia, ou te fa'atusaina o ia i le tagata poto, ua na faia lona fale i luga o le papa.*”

O se manatu autū lenei e fa'aauu pea. E le taumate ua silasila ma taga'i pea le Alii o Iesu i le tulaga fa'aletonu o le soifuaga o loo ola ai le lautele o tagata i ia ona po, a o ia a'oa'o atu ma fa'atino le finagalo o lona Matai. E foliga ua i ai le eseese i le fa'atinoga o le finagalo o le Alii o loo lauga atu e le 'au failotu, ua le

o gatasi uiga ma amioga o e ua fa'ailoa lo latou fa'atuatua i le Alii. Ua ese le fa'amamafa o mana'oga fa'ale-Lotu, o upu e logo malie i le fa'alogo, ma ta'uta'u le agaga foa'i mo e matitiva: ua na o upu ma fa'amatalaga a e leai se fa'atinoga. Ua uma ona fa'ailoa mai le alofa tunoa e tatau ona amana'ia: e ala i le ola tapua'i ma vivii i le Atua e ala ia Iesu Keriso.

O le savavali i ala o Iesu, e tatau ona ola e tusa ma ana a'oao'ga, e tupu ai le fiafia ma le olioli i le manuia ua foa'iina mai. Ua vala'auina i tatou ia ola i le mafutaga ma le Atua. E ese le olaga fa'atasi ma le Atua, ese le olaga e fa'atautu ma mana'oga o le lalolagi. O le fausia o le olaga e fa'avae i le Atua, e mausali ma tumau aua o le fa'avae pito sili lea ona malosii ma tumau i fa'avae uma lava.

Tatalo: Le Atua agalelei e, fesoasoani mai e fa'amalosia lo matou talitonu e mulimuli i lou finagalo, ma fa'atino ai mea lelei ma mea matagofie, **Amene.**

Aso Faraile – Iuni 19: “Fa'atuatua e salalau solo – sopo'ia tua'oi”

Tusi Faitau – Mataio 8:1-17 (*Messy faith – transgressing boundaries*)

Matua – f.3a: “Ona 'a'apa atu lea o Iesu o lona 'a'ao, ua pa'i atu ia te ia, ua fa'apea atu, “Ou te loto i ai, ina mamā ia 'oe...”

E tolu vavega ua aofia i le tusi faitau o lenei aso: fa'amaloloina o le lepela (ff.2-4); fa'amaloloina le auua a le ta'ita'i o le to'aselau (ff.5-13); ma le fa'amaloloina o le tinā o le avā a Peteru (ff.14-17). O le ma'i o le lepela, o se ma'i e mata'utia lona leaga. Ua fa'atusaina le faigata o le ma'i lepela, i le leaga o le agasala. Ua tusia e Mataio: “...ua sau le lepela, ua ifo mai ia te ia, a e finagalo i ai e te mafaia lava ona fa'amamā mai ia te a'u.” Ua lē o se fa'aailoga lenei o le 'fa'atuatua e salalau solo', a e o le fa'aailoga e i ai le tua'oi---e mafaia ona fa'amalolo i ma'i o le tino, fa'apea i ma'i o le agasala. O le pa'i mai o le Mana o Keriso i o tatou loto ma agaga, e 'ave'esea ai le 'fa'atuatua tauaso', a e fa'apupu-laina o tatou mata fa'ale-tino ma fa'ale-agaga i le Togiola na saunia e Keriso Iesu mo tatou agaga.

Tatalo: Le Atua alofa e, fesoasoani mai lou Agaga e aveese le pogisa ua tauaso ai la matou vaai i le pupula o lou malamalama, **Amene.**

Aso Toonai – Iuni 20: “Sopo'ia - mulimuli ia Iesu”

Tusi Faitau: Mataio 8:18-22 (*Crossing over – following Jesus*)

Matua – f.18: “Ua silafia e Iesu le motu o tagata e to'atele ua vagavagai mai ia te ia, ona fetalai atu ai lea o ia ia o atu i le tasi itu.”

Pe afai e faitau i le Tusi Paia, ia taumafai e faitau ma le lagona e fia iloa atili le uiga loloto o le fuaitau ua faitauina. Ia le gata ina faitau ia malamalama i upu ma fa'amatalaga, a e ia mafaufau i ni ata fa'atusa o aofia ai. Mo se fa'ata'ita'iga, e maua soo ia fa'amatalaga e uiga ia Iesu ma ona so'o, ua “sopo'ia”, po o le o'atu o Iesu ma ona soo i se tasi itu: E lelei ona toe faitau i ai, ma sa'ili pe i ai se isi fa'aopoopoga, e fesootei ai ma se mata'upu e atili tupu ai le naunau ma fiafia e faitau pea. O se tulaga e maua so'o i taimi o mafutaga a Iesu ma ona soo: “O (sopo'ia) atu i le tasi itu.” O le tu'ua o le nofoaga ua masani ai, ae sopo'ia i se isi nofoaga fou, o loo aofia ai ma le tu'ua o le nofoaga o loo saogalemu ai, po ona o

le fefe i se nofoaga e le o mautinoa. Peitai, ua valaauina i tatou e Iesu, ia tatou ‘o atu i le tasi itu’: Ia tatou ‘sopo’ia’ le tasi itu---o le Alii o Iesu, o loo fa’aloaloa mai ‘a’ao o le alofa tunoa.

E faigofie ona sē se faiga malaga i le vasa, pe a leai se tapasa; e fa’apea foi i se malaga i luga o le fogaelele pe a leai se fa’afanua. O Iesu na fetalai, “...O a’u nei le ala, ma le upu moni, ma le ola; e le alu atu lava se tasi i le Tamā, pe a le ui mai ia te a’u.” (Ioane 16:4b). Ina ua fa’ailoa atu e Iesu le o’o mai o lona Maliu, ona ia fetalai lea ma a’oa’o atu: “...Ai se tasi e fia mulimuli mai ia te a’u, ia fa’afiti o ia ia te ia, ma ave lona satauro, i le mulimuli mai ia te a’u.” (Mataio 16:24b).

O le avea e fai ma so’o o le Alii, ia mafaufau loloto i le mataupu o le fa’atua-tua, ia talitonu ma fa’atino. O le mulimuli ia Iesu, o le valaauina lea e fa’afeagai ma mea ofoofogia, o le olaga e finafinau ma tauivi---a e i ai pea nisi e taumafai e saili se fa’asinoga i le ala. Peitai, ia laasia atu i le tasi itu’, o loo fa’atali mai ai le Alii – o ia o le fa’asino ala ma le Upu Moni. Tatou te le fefe ai, auā o Iesu Keriso lava na saunia le Fa’aolataga tatou te mapu ai i mea faigata uma.

Tatalo: Le Atua o le Upu Moni ma le ola, ia matou iloa le ala tonu matou te ui atu ai, e le gata i ala o le lalolagi, a e fa’asilisili i le ala i le lagi, **Amene.**

EVAGELIA A MATAIO (2)

2. O le Matagi ma le Pelu

Aso Sa o Tamā (Amerika)

Aso Sa – Iuni 21: “Fa’atuatua ma le fefe” (*Faith and fear*)

Tusi Faitau – Mataio 8:23-9:1

Matua – f.26b: “...*Se a le mea ua outou matata’u ai, outou ē fa’atuatua itiiti?*”

E le tau fa’amalamalamaina le soifuaga ua masani ai tagata e nonofo i atumotu o le Vasa Pasefika, auā ua masani i le sami ma le vai. I tausaga ua mavae, ina o fa’alagolago faiga malaga a tagata Samoa, mai i le tasi nu’u i le isi nu’u, o le tasi foi motu i le isi motu, poo le va foi o lea atumotu ma lea atumotu, sa savavali lava ma feoa’i i vaa-alo ma fautasi.

Peita’i o aso nei, ua tele ina faimalaga i taavale, i vaalele, ma vaa la’u pasese. A e ui lava ina faigofie ma televavave ia ‘auala, a e le ‘ave’esea ai lava le lamatia ma a’afia i fa’alavelave ma faigata e ona tutupu i luga o ‘auala e faimalaga ai. O lona uiga, e i ai pea le loto popole ma le atuavale, ona o faigata ma puapuaga e fetaia’i ai i le ala, tusa lava po ua lelei ‘auala ua saunia i nei ona po.

Ua tusia i le tusi faitau mo lenei aso, le tala i le faigamalaga a Iesu ma ona so’o i totonu o le sami o Kalilaia: “*Fa’auta foi, ua to mai le afā tele i le vai, ona osofia mai ai lea o le va’a e peau...*” (f.24). Ua tupu le loto popole ma le fefefe o le ‘ausoo. Ona fetalai lea o Iesu, “*Se a le mea ua outou matata’u ai, outou e fa’atuatua itiiti?*” O le “fa’atuatua”, o lona uiga: o le talitonu ma le mautinoa i le loto, e i ai le lavea’i; e i ai le avanoa e mapu ma to’a i ai, ina ua fa’afeagai ma faigata ma puapuaga o le olaga. Na tula’i Iesu, ua vavao i le matagi ma le vai. E le mafaia e se tagata soifua, ua na o le Atua lava e mafai ai mea faigata uma.

Sa le gata le fefefe ona o le matagi malosi, a e ofoofogia foi le tutuliina o temoni sa ulutinoina ai tagata e to'alua. Na alalaga i laua, "*Se a lau na ia te i matou nei, Iesu e, le Alo o le Atua?*" (f.29b). "*Ina o ia:*" *Fa'auta, ua feosofi ifo le lafu puaa uma i le tofē i le vai, ua mamate ai i le vai.* (f.32). O le fa'atuatua e mafai ai mea uma, e 'ave'esea ai foi le fefe.

Tatalo: Le Alii e, ia e alofa mai ma aveese le fefe i matagi ma peau malolosi o le olaga nei, ma tumau ai pea le fa'atuatua, nei e o'o lava i le fa'avavau, **Amene.**

Aso Gafua – Iuni 22: "Fa'atuatua ma le sa'olotoga" (*Faith and freedom*)

Tusi Faitau – Mataio 9:2-13

Matua – f.5: "*Auā po o le fea e faigofie? Po o le fai atu, 'Ua fa'amagaloina au agasala'; po o le fai atu, 'Tula'i ia, ina savali?'"*

O le a'oa'oga ua tu'uina mai i le tusi faitau o lenei aso, o loo totonugalemu ai le tāua: poo le fea e sili i le filifiliga a le tagata e mulimuli ia Iesu: "Po o lē fea e faigofie?" O tua atu o lau filifiliga, e atagia ai lou iloa tau 'ave lou "fa'atuatua", e atagia ai foi le ituaiga o sa'olotoga e te o'o i ai ona o lau filifiliga.

E lua ni "ata" (fa'atinoga) tāua o loo aofia i totonu o le tusi faitau. Muamua, o le fa'amaloloina o le tagata ua maua i le ma'i supa (ff.2-8). Lua, ua vala'auina ma fai'aiga fa'atasi Iesu ma Mataio i le aiga o Mataio (ff.9-13). Ua fa'aalia i nei fa'atinoga e lua, le tele o ituaiga filifiliga e iloa ai le fa'atuatua, ma le sa'olotoga o le filifiliga a le tagata ua talitonu i le fe'au ua aumaia e Iesu Keriso, mo le manuia o le tagata i le lalolagi agasala.

"*Ua silafia foi e Iesu lo latou fa'atuatua, ona fetalai atu lea o ia i le supa, 'Lo'u atalii e, ua fa'amagaloina au agasala.*" (f.2). O le galuega alofa a isi e fa'amaloloina ai le ma'i. "*Ua iloa e le 'au faresaio, ona latou fai atu ai lea i ona soo, 'Se a le mea ua aai fa'atasi ai lo outou a'oa'o ma ē ao lafoga ma ē ua agasala?'" (f.11). O le fa'aailoga o le lotovale ma le fa'atuatua e sesē lona fa'avae. E 'ese le ma'i fa'aletino, ese foi le ma'i fa'aleagaga. O le ma'i i le tino e fa'alagolago i vailaau ma togafitiga fa'ale-tagata; a o le ma'i o le agaga, ua na o le fa'aolataga na saunia e Keriso e malolo ai.*

Tatalo: Iesu Keriso e, alofa mai i lo matou vaivai i la le tino ma la le agaga. Taitai i matou ia matou maua le fa'atuatua moni, **Amene.**

Aso Lua – Iuni 23: "Fa'atuatua ua naunau" (*Fervent faith*)

Tusi Faitau – Mataio 9:14-26

Matua – f.22a: "*A ua fāliu Iesu, ua silafia o ia, ona fa'apea atu ai lea o ia, 'Lo'u afafine e, ina fa'alototele ia 'oe, o lou fa'atuatua ua e mālōlō ai....'"*

E i ai taimi tatou te loto popole ai ma atuavale, ona o mea tutupu i le olaga, aemaise lava o ni mea patino e a'afia ai lo tatou ola, a o mea sa lē mafaufauina lava e tupu. Ioe, e faigofie ona tatou fesoasoani atu i isi o loo popole ma mafatia. Faufautua, tatalo, fa'asoa ma foa'i atu mo i latou, ina ia lagomalaina ai tiga o loo feagai ma i latou. Ae faapefa la pe a tupu i ai tatou ia fa'afitauli? O fea tatou te liliu ai pe afai e aafia i tatou i ni fa'avelave patino?

O le fa'atuatua e naunauta'i, e le faigofie. Poo le a le tiga o le pa'i mai o mafatiaga, a o le fa'atuatua e naunau e aga'i pea i luma. E fa'apea se ata o loo aumai e le tusi faitau o lenei aso. E lua fa'amalologa sa faia e Iesu: o le afafine o le ta'ita'i o le sunako, ma le fafine sa maua i le ma'i punatoto. O tagata ua a'afia i fa'alavelave patino. A o lo la sailiga o Iesu, e atagia ai le fa'atuatua ua naunau – naunau i le fia malolo – naunau e fia maua le mapusaga, mai i tiga ma faigata patino e pei ona mafatia ai.

O le feau o loo aumai i le tala, e fa'afofoga ma tali Iesu i mea uma tatou te ole atu ai ma le fa'atuatua ua naunau. Peita'i, e tali mai le Alii i ona lava taimi, ma, o lona tali mai, e i ai taimi e le tusa ai ma o tatou mana'o. O le ta'ita'i o le sunako na mana'o ia malosi lona afafine ma'i, a o le fafine ma'i punatoto, na fia malolo e aunoa ma se iloa mai e nisi. Peita'i, e le o le mea lene na i'u ai le tala, ae na i'u i le lelei e sili atu. Fa'atū e Iesu le afafine o le pule a le sunako mai le oti, ae toe fa'afoisia le fafine ma'i punatoto i totonu o le nu'u sa inosia ma tu'ulafaoiina ai. O le fa'atuatua e naunau na te maua mea e sili atu nai lo le mea sa manatu i ai.

Tatalo: Keriso e, fa'afofoga alofa maia i a matou olega ua faia i le fa'atuatua ua naunau. Ia fa'afouina o matou tagata tuai ia fou i lau silasila, **Amene.**

Aso Lulu – Iuni 24: “Fa'atuatua ma mulimulita'i” (*Faith and following*)

Tusi Faitau – Mataio 10:1-15

Matua – f.1a: “*Ua valaau atu e ia ona so'o e to'asefulu ma le to'alua, ona tu'u atu lea e ia ia te i latou le pule...*”

So'o se 'au ta'a'alo ua saunia lelei mo le ta'aloga, e tatau ona fa'atulaga ai'aiga tatau ma tulafono o le ta'aloga e mulimuli tonu ai. O ē ua filifilia e fai ma faiaoga, e tatau ona agava'a lelei i le fa'afoeina o taualumaga uma, e le gata i va'aiga o tagata ta'a'alo, a ia malamalama lelei i tulafono ma aiaiga o le ta'aloga. E ta'ua uma vaega ia e lua: o tagata ta'a'alo ma faia'oga e a'oa'oina le 'au ta'a'alo.

O le tusi faitau o lenei aso, ua atagia ai le filifilia lelei o i latou o le a feagai ma le tala'iga o le finagalo o le Alii---o e 'ta'a'alo e saili ai le manumālō mo le 'Malo o le Lagi.' O Iesu lava o le Faia'oga o faia'oga, na ia mua'i a'oa'oina le 'ausoo e fa'atino le finagalo o le Matai: a'oa'oina i le loto usiusita'i ma fa'alogi, na a'oa'oina foi ia maua le agaga o le onosa'i, mata-alofa ma le fa'apalepale. A e le gata i lea, “*Ona tu'u atu lea e ia ia te i latou le pule...*” O le pule ua tu'uina atu, a e le fa'alagolago i le tagata ia te ia lava; o le pule e fa'amoemoe ma le loto talitonu e fesoasoani mai le Agaga o le Atua e mafaia ai mea uma lava.

E le gata i le fa'atuatua, ae tatau foi ona mulimulita'i i le Alii. O ana a'oa'oga, o uiga ma amioga, aemaise o lona alofa na fa'aalia i tagata uma na saili fesoasoani mai ia te ia; o mea uma foi ia e tatau ona fa'aauegaina ai i tatou.

Tatalo: Iesu e, foai mai le loto tele matou te auauna ai mo lau Afio. Avea lo matou fa'atuatua e fa'amalosia ai lo matou galulue pea mo lau Afio, **Amene.**

Aso Tofi – Iuni 25: “Finau ma le fa'atuatua” (*Fight with faith*)

Tusi Faitau – Mataio 10:16-33

Matua – f.16: *“Fa’auta, ou te aau atu ia te outou e pei o mamoe i le va o luko; o lenei, ia outou atamamai pei o gata, a ia fifilemu e pei o lupe.”*

Sa ta’atele i tausaga ua mavae i Samoa ia a’oga nonofo tumua – o a’oga e sapaapaia e Ekalesia, e fa’apea foi i le malo. Sa lei faigofie le faigamalaga mai o tama ma teine a’o’oga e mamao nu’u e nonofo ai, e le pei o aso nei ua tele taavale ma vaa e feoa’i ai i Samoa mai le tasi itu i le isi itu o le atunu’u. E le gata i lea, sa le lelei foi ni auala tetele e feoa’i ai e fa’apei o aso nei.

E i ai le eseesea i a’oga nofo-tumau, ma a’oga e tau-savali teine ma tama a’o’oga: afai e te a’oga nofo-tumau, e tatau ona tapena uma ou lavalava ma au mea faigaluega mo le tausiga i totonu o le aai o le a’oga, e leai se fa’amoemoe e te toe mafuta vavalalata ma ou matua ma lou aiga, e te nofo tumau i le tausaga atoa vagana aso o tu’uaga. O le tasi o tulaga faigata i le a’oga nofo-tumau, e fa’ailoga le tausaga na e ulufale ai i le a’oga. O le tausaga muamua, e tatau ona e fifilemu ma ususita’i i soo se fa’atonuga e fai atu ai le tausaga lua, tolu, ma le fa. Afai e te le mafaia lenei lu’itau, o lona uiga, e te toe foi i lou aiga a e tu’u le a’oga.

O le tusi faitau o lenei aso, e atagia ai ituaiga o faigata ia e pei ona ta’ua i le a’oga-nofo-tumau: *“Ou te aau atu ia te outou e pei o mamoe i le va o luko...”* O le filifilia e fai ma so’o o le Alii, ua le o se galuega e to’afilemu i taimi uma. O le onosa’i ma le fa’apalepale, o uiga ia e mana’omia e le auuuna ua filifilia. E fa’apea foi i le tama ma le teine e ulufale i le a’oga nofo-tumau: O le taimi e te ulufale ai, ua ia te ‘oe le pule e te onosa’i ai i le tausaga muamua, lua, tolu, se ia o’o i le i’uga o le fa tausaga. O le taimi lea o le fiafia ma fa’afetai ai, auā ua e taunu’u i le i’uga o le fa’amoemoe. O le uiga moni lea o le, *“finau ma le fa’atuatua.”*

Tatalo: Iesu Keriso e, ia puipui mai i matou i le va o faigata ma puapuaga o le olaga nei. Foai mai lou alofa tunoa matou te manuia ai, **Amene.**

Aso Faraiile – Iuni 26: “Fa’atuatua ma aiga” (*Faith and family*)

Tusi Faitau – Mataio 10:34-42

Matua – f.34: *“Aua tou te manatunatu ua ou sau e avatu le filemū i le lalolagi; ou te le’i sau e avatu le filemū, a o le pelu.”*

O le fa’amanatuina o le aso-fanau o se tasi i le aiga, o taimi ia e masani ona mafuta fa’atasi le aiga i matua ma fanau, o uō foi ma e masani. E saunia foi ni mea alofa e avatu i le ua fa’amanatuina le aso soifua. O uiga masani ia fa’ale-aiga, e tupu ai le lagona: o le aiga lava e pito latalata mai ia te ‘oe. Ae fa’apefa la pe a tu’ulafoaiina oe e lou aiga?

O le tusi faitau mo lenei aso, o loo aumaia ai ni lu’itau e tusa ma a’oa’oga a Iesu. O le talitonuga o loo teu i loto ma manatu o Iutaia: O le a afio mai le Mesia na te fa’atino le manumālō, a e le o le to’ilalo ma le fevaevaea’i. Na te fa’amalosia ma fa’amausali le ‘mafutaga vavalalata fa’ale-aiga.’ A o manatu fa’ale-lalolagi o le tagata, ua le o le finagalo lea o le Alii. O loo taumafai Iesu i ona soo ma le motu o tagata, ia liliu’ese mai le fa’asinoga ma a’oa’oga a le ‘au failotu a Iutaia. O upu foi ma a’oa’oga a Iesu, e loloto ma faigata ona malamalama i ai le mafaufau faigo-fie. Na afio mai Iesu i le ala maualalo i manatu o tagata, e le o se fa’atupu maseiga: Ona fetalai atu lea o Iesu ia te ia, *“Ina toe sulu ia o lau pelu.”* Ua silafia e Iesu o lenei fe’au ua ia aumaia, e i ai fa’atasi ma lu’itau: o lona uiga, e

i ai sauaga, e fasiotia fa'amaturo, e i ai fa'atasi ma fevaevaea'iga. O le tulafono mai le Atua: "Ia e ava i lou tamā ma lou tinā..." (Esoto 20:12), e le 'ave'esea lea, a e i ai lu'itau. Pe fa'asili 'ea lo tatou fa'atāua o le aiga, nai lo le mulimuli i tulaga 'a'ao Iesu? O le filemu ia Iesu e itiiti nai lo fa'afiafiaga i le aiga, ia fa'ateleina le fa'aleleiga i le va fa'ale-tagata ma le Atua.

Tatalo: Keriso e, fesoasoani ia matou savavali i au afioga, seia o'o lava i faigata i le satauro. O lou finagalo ia matou tumau i le fealofani ma le fetausi a'i, **Amene.**

Aso Toonai – Iuni 27: "Fa'atuatua i le lumana'i" (*Future faith*)

Tusi Faitau – Mataio 11:1-19

Matua – f.3: "Ua fa'apea mai ia te ia, "O 'oe 'ea lē maliu mai, pe matou te fa'atali i se tasi?"

E va'aia soo lava le fa'ailoilo lenei i Samoa, ma atunu'u e fa'aogāina ai le gagana Peretania, "NO TRESPASSING." O lona uiga faigofie, 'aua ne'i laasia le tua'oi poo le fanua. A e le iloa poo a nisi mea o i talatu o lea fa'ailoilo, poo le fa'aeteete ina ne'i aafia i le fa'alavelave, po o se tulaga mata'utia ina ne'i afaina ai se tasi. E tupu le manatu e fia iloa mea ua le o iloa nei. E le gata i lea, e o'o lava ina sailiili ma su'esu'e atili i le fia iloa ma le fia malamalama pe lelei pe leaga foi.

"O 'oe 'ea le maliu mai, pe matou te fa'atali i se tasi?" Afai e lē o le taimi nei, atonu o le taimi lumana'i. Ua fesiligia po o ai e fa'atinoina le sauniga o le papatisoga, poo Ioane, poo se isi o le a afio mai i le lumana'i. Ua fa'atusaina Ioane o le, "fa'asino ala," o lona uiga, o le ta'imua, o ia na te fa'ailoa mai le ala tonu e ui ai. Soo se 'au malaga e fofou tu'ua le aiga ma le atunu'u, e mana'omia lava se fa'afanua po o se fa'asino ala i le 'au malaga. E mafaufau mo se taunu'u manuia i le taulaga ua fuafuaina.

E le'i itiiti pe fa'atauava le fa'amatalaina o le "lumana'i" e le faievagelia o Mataio (ff.9-10). "A o le a 'ea na outou o atu e matamata i ai? ... "Ou te fai atu ia te outou, E sili lava ia i le perofeta. Auā o ia lea ua tusi mai i ai, "Fa'auta, ou te auina atu la'u savali i ou luma..." Na fa'amoemoe Ioane i le afio mai o le Mesia, peitai, sa ia tau'aveina se isi tiute fa'apitoa mo le o'o mai o le Mesia. Na afio mai Iesu Keriso, na ia fa'ataunu'uina le finagalo o lona Tamā i se ala sa le'i uia lava--- o le ala i le Satauro e fa'amagaloina ai agasala a le lalolagi uma.

Tatalo: Iesu Keriso e, ia e alofa mai ia te i matou. Auina i matou e tala'i i e ua le iloa; a'oa'o ma fa'ailoa ia i matou auala e molimauiina ai lou finagalo, **Amene.**

SILASILA FA'ALE-ATUA

Aso Sa – Iuni 28: "Silasila a le Atua ma le lelei o le Atua"

Tusi Faitau – Kenese 1:1-5 (*God's sight and God's goodness*)

Matua – f.4: "Ua silasila atu le Atua i le malamalama, ua lelei; ona tu'u eseese ai lea e le Atua o le malamalama ma le pouliuli."

O ulua'i mata'upu e lua o le Kenese, e mafai ona faitauiina e fa'apei o se solo, e fa'ataui i le foafoaina o le amataga, ua fa'aalia ai iina le ata fa'atatau e tusa ma

galuega fa'atino a le Atua Poto i le amataga lava. A e o ia foi tala, ua tele ina fa'auga sesē mai le amataga lava, mai lea augā tupulaga ma lea augā tupulga. Ua peiseai o se malosi ua fa'atumauiina: o le tala o le foafoaga, ua o'o ina feteena'i ai upu, "foafoaga" ma le "fesuia'iga" (creation vs. evolution).

I se uiga fa'afeagai, ou te aumaia ai ni fa'atinoga taūa e tolu mai ia mataupu. Muamua, 'ua silasila atu le Atua ua lelei'; Lua, ua lelei i le silafaga a le Atua mea uma; Tolu, o le silafaga a le Atua ua lelei, e fa'ataata i le va o le tasi i le isi.

O le uluai mataupu o le Kenese, o mea ia na silasila atu ai le Atua, ua lelei: malamalama, laueleele, sami, valaau i le fanua, ta'aga i le laufanua, ma le fausia o le tagata. Mai le ulua'i malamalama e o'o i le fausia o le tagata, ua lelei i le silafaga a le Atua. Fa'amata e te talitonu, o le finagalo lava o le Atua, na ia fausia ai mea uma i lana foafoaga ia lelei?

Ua tatou amata i lenei vaiaso i le mana'oga, ia silasila fa'ale-Atua. O i tatou o ni so'o fia mulimuli tonu i le Alii--ia sagatonu la tatou vaai, vaavaai i mea lelei ua saunia e le Atua mo lana foafoaga. O le vala'auina foi lenei mo i tatou: ia lelei la tatou vaavaai; ia tatou fa'amasino ma le tonu; ia to'a la tatou va'ava'ai i mea e iloa ai le malamalama ma le pouliuli. Ia manatua, o Keriso lava, o le malamalama mai le Atua ua fa'amalamalamaina ai lo tatou pogisa i le leaga o le agasala.

Aso Gafua – Iuni 29: “Va'aiva'ai fa'atasi ma le Atua” (*Seeing with God*)

Tusi Faitau – Salamo 11

Matua – f.4: “*O le Atua o i lona malumalu paia o ia; o le Alii o loo i le lagi lona nofoalii; e silasila mai ona fofoga, e tofotofo le fanua a tagata e ona laufofoga.*”

O le fa'atagata pito maualuga i le lalolagi, o loo fausia lea i Initia, o le fa'atagata o le fitafita tau, o Sardar Patel (1875-1950). O lea fa'atagata e 182 meters lona maualuga (598 ft. approx.); a o lona tau e 30 piona tupe Initia (rupees) e tusa lea o le \$4 piona tupe Amerika. Ua fa'aigoaina lenei fa'atagata, o le “Statue of Unity.” O le fesili e ono tula'i mai: Pe fa'apefea ona tu matilatila lenei fa'atagata maualuga, ma lona tau ua matuā telē lava? Peitai, o le tulaga o loo soifua ma ola ai le to'atele o tagata i Initia, o loo fa'aopopo pea pasene o le maualuga o le ola mativa ma le lē tagolima

Ua fa'aalia e le tusi faitau o lenei aso le manatu: Ua na o le Atua lava e to'atasi e tataua ona fa'alagolago ma fa'amoemoe i ai lē ua mafatia ma puapuagatia – a e le o tupu, poo se fa'atagata, poo ni fa'amatalaga foi. O le eseesega ma le “Statue of Unity,” o le fai Salamo e va'ava'ai ma fa'alogo, e fa'apea foi ia i latou na filifilia le laueleele poo le fanua e fau ai le fa'atagata.

Ua molimau le fai Salamo 11, e silafia e le Atua mea uma lava i le lalolagi, e leai se mea na te le silafia. Ua silafia e le Atua le amioletonu o loo faia e tagata o le lalolagi. O i tatou uma ua talitonu ma fa'atuatua i le Atua, ua valaauina i tatou ina ia tatou mataala i taimi uma, ia tatou iloa e i ai le Atua i mea uma; ia tatou mataala i fa'atinoga lē amiotonu ma fa'atinoga sesē o loo faia pea i le lalolagi ua tatou aumau ai. Ua tataua i le lalolagi i nei ona po, ona fa'alogo ma amana'ia le oi ma le mafatia o e o loo saisaitia i sauaga, ma le pule e leai se alofa o i ai.

Tatalo: Le Atua e, fa'amagalo i lo matou vaivai, a e ia fa'amalosia i matou e mulimuli i fa'asinoga, e pei ona a'oa'o e Iesu i ona ulua'i soo, **Amene.**

Aso Lua – Iuni 30: “Le Atua fulifaō” (*Upside down God*)

Tusi Faitau – Esoto 24:9-18

Matua – f.17: *“O le tino mai foi o le pupula o le Alii, sa pei o le afi ma’ama’ai i le tumutumu o le mauga i luma o le fanauga a Isaraelu.”*

A o’o ina tatou talatalanoa e uiga i le Atua e to’atasi, ona maualuga lava lea ma silisili ese lona malosi nai lo se isi lava malosi. Ua tatou fa’asuafaina o: “Le Atua Silisili Ese, Le Atua Malosi, le Atua e ona le tamāoaiga uma”, ma isi lava fa’aupuga e fa’atatau i le paia ma le mamalu. A e ui la i nei fa’aupuga taūa ma le aloa’ia i le Mata’upu Silisili fa’a-Atua, ua lē o gatasi lea ma le va’aiga ta’atele i mafutaga ua ta’ua ai le Suafa o le Alii, e ala ia Iesu Keriso---vaaiga o le ola maualalo i le mativa ma le lē tagolima, ola sauāina ma le tu’ulafoa’iina.

O le tusi faitau mo lenei aso, ua fa’amatala ai le tala ia Mose, Arona, ma le ‘au toeaina o le fanauga a Isaraelu, ua latou fa’afeagai ma le ALII i luga o le mauga. O se va’aiga ofoofogia na latou vaaia ai le ALII i luga o le mauga (f.10). I lalo ifo o lea va’aiga, o loo i ai le pupula o le ALII, e fa’apei o le afi ma’ama’ai lona mumū; o le malamalama lea o loo ta’ita’iina ai Isaraelu i le vaomatua. O loo afio ma mafuta ma le Alii, e taitaiina ai le soifua ma le ola i aso uma.

A o tatou faitau ma manatunatu i le Tusi Faitau o lenei aso, ua valaauina i tatou ia tatou vaavaai ma manatunatu i mafutaga ma fa’alapotopotoga o tagata, i latou o loo faitauina i le olaga maualalo ma le fa’atauvaa i manatu o le lalolagi. O le fa’atusa o le “Atua fulifaō”, e amata atu i lalo e aga’i i luga la tatou vaavaai i le lalolagi, o e fia maua se mapusaga ma se to’afilemu, ona o faigata ma puapuga o loo fa’afeagai pea ma i latou.

O le Atua e ala ia Iesu Keriso, o le Atua e lotolotoi ma fa’atasi ma e ua tu’ulafoa’iina, i latou e fa’atauvaa i ai le manatu o le to’atele; i latou e vaivai ma itiiti le tamāoaiga fa’ale-lalolagi latou te maua. Ua valaauina i tatou, e ala ia Iesu Keriso na fa’asatauroina, ia tatou alolofa ma fesoasoani i e ua vaivai ma leai se malosi o i ai; i latou o loo olopalaina i fa’amasinoga le tonu, i latou ua aafia i sauaga ma le pule leai se alofa. Ua valaauina i tatou e ala i lenei Tusi Faitau: Ia fa’afouina le lalolagi o puapuga ma faigata, a ia fa’atupu se lalolagi fiafia ma le to’afilemu.

Talosaga: Tatou tatalo ina ia fesoasoani mai le Atua, ia ave lenei augā tupulaga e fa’avaeina ai se lalolagi fou---se lalolagi to’afilemu ma ola i le fealofani moni, **Amene.**